


Biblija tu limba
Rrãmãnã



Portions of the Holy Bible in the Aromanian prestige dialect
spoken in central and southern Albania.

Biblija tu limba Rrãmãnã

Portions of the Holy Bible in the Aromanian prestige dialect spoken in central and southern Albania.

copyright © 2024 The Word for the World International

Language: Armãneashti/Arumanisht

Contributor: The Word for the World Europe

Bibla Aromaneshti Frasherot dit Arbenishi

The Word for the World International 2024

www.twftw.org

Aromaneshtli Frasherot easti un din dialectili a limbaljei proto-latine balcanica tsi s-greashti ma multu tu teritorlu a Republicaljei dit Albania, tu Nordul Grecie, tsi s-acljeama Epiru shi tu niscants locurili a Republicaljei dit Nord Machidunia etc. Armanjilji dit Albania, dit Nord Machidunia poati s-lu ghavaseascu textul scriat.

Aromanian Frasherot Bible of Albania

Aromanian Frasherot belongs to the dialects of the Proto-Latin Balkanic language spoken mainly in the territory of the Republic of Albania and of Northern Greece, which was called Epirus and in some other pockets in the Republic of North Macedonia, etc. Aromanians from Albania, and the Republic of North Macedonia can read and understand the printed text.

Bibla Arumune Frasherot e Shqiperise

Arumanishtja Frasherothe iu përket dialekteve te gjuhes proto-latine ballanike te folur të folur kryesisht në teritorin e Republikës se Shqiperise dhe te Greqise Veriore, qe quhej Epir dhe ne disa xhepa te tjere ne Republiken e Maqedonise se Veriut etj. Arumunët e Shqiperisë, te Republikës se Maqedonise se Veriut mund të lexojnë dhe kuptojnë tekstin e shtypur.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 13 Jul 2025 from source files dated 2 Jul 2025
f563e243-ab94-527a-91cd-1da31a44b46d

Contents

Mateu	1
Marcu	49
1 Timoteu	79
2 Timoteu	84
Titu	88
Filemon	91
1 Ioan	93
2 Ioan	99
3 Ioan	100
Iuda	101

Evangelu După Mateu

Gheonologhia al Isus Hristos

¹ Atsea esti cartea a farâljei al Isus Hristos, hiljilu al David, hiljilu al Avraham.

² Al Abrahamu lji s-amintă Isacul, al Isac lji s-amintă Iacovul. Al Iacovu lji s-amintă Iuda shi fratsilji a lui,

³ al Iuda lji s-amintă di la Tamara Faresul shi Zara. Al Faresul lji s-amintă Hezromul, al Hezromul lji s-amintă Aramul,

⁴ al Aramu lji s-amintă Aminadabul, al Aminadabu lji s-amintă Naasonul, al Naasonu lji s-amintă Salmonul,

⁵ al Salmonu lji s-amintă Boazul di la Rahabi, al Boazu lji s-amintă Obedul di la Ruth, al Obedu lji s-amintă Iesseul,

⁶ al Iesse lji s-amintă Davidul amiră. Al amirălu David lji s-amintă Solomonul di la muljeara tsi eara al Uriah,

⁷ al Solomonu lji s-amintă Roboamul, al Roboamu lji s-amintă Abiahul, al Abiahul lji s-amintă Asaful,

⁸ al Asafu lji s-amintă Iosafatul, al Iosafatu lji s-amintă Ioramul, al Ioramul lji s-amintă Oziaul,

⁹ al Oziau lji s-amintă Ioatamul, al Ioatamu lji s-amintă Ahazul, al Ahazu lji s-amintă Ezekia,

¹⁰ al Ezekia lji s-amintă Manaseul, al Manaseu lji s-amintă Amonul, al Amonu lji s-amintă Iosia,

¹¹ al Iosia lji s-amintă Iekonia shi fratsilji a lui tu chirolu a mutariljei tu Babilon.

Mutarea tu Babilon

¹² După mutarea tu Babilon al Iekonia lji s-amintă Salatielul, al Salatielu lji s-amintă Zorobabelul,

¹³ al Zorobabelu lji s-amintă Abiudul, al Abiudu lji s-amintă Eliakimul, al Eliakimu lji s-amintă Azorul,

¹⁴ al Azoru lji s-amintă Sadokul, al Sadoku lji s-amintă Achimul, al Achimu lji s-amintă Eliudul,

¹⁵ al Eliudu lji s-amintă Eleazarul, al Eleazaru lji s-amintă Mathanul, al Mathanu lji s-amintă Iacovul,

¹⁶ al Iacovu lji s-amintă Iosiful, bărbatilu ali Marii, di la ea s-amintă Isusul, tsi s-acljimă Hristos.

¹⁷ Ashă că tuti gheneratili di la Abrahamul până la Davidul s-fac patrusprădzatsi di ghenerati, shi di la Davidul până la mutarea tu Babilon, patrusprădzatsi di ghenerati, shi di la mutarea tu Babilon până la Hristolu, patrusprădzatsi di ghenerati.

Amintarea al Isus Hristos

¹⁸ Amintarea al Isus Hristolu fu ashă: Maria, muma a lui, eara susita al Iosif, ma, năinti tsi s-apărneja s-băna deadun, armasii greauă di la Duhlu Sântu.

¹⁹ Atumtsea Iosiful, susitlu a ljei, tsi eara un om ndreptu sh-nu vrea s-u arushina năintea a oamnjilor, apofăsi s-u alasă ascumtă.

²⁰ Ma, iară minduea singur aestu lucru, s-afânisi tu yis un anghil di la Domnul sh-lji dzâsi: "Iosif, hiljilu al David, s-nu ai frică s-u ljeai Maria ca muljeara a ta, că tsi s-acâtsă tu năsă easti lucru di la Duhlu Sămtu.

²¹ Shi ea va s-amintă un ficior, sh-tini va lji badză numa Isus, că elu va s-ascapă populu a lui di amârtili a lor."

²² Shi tută aestă s-featsi tsi si mplinească zborlu a Domnului după prufitul tsi dzâtsi:

²³ "Ia, virghina va armănă greuă sh-va amintă un ficior, tsi va lj-bagă numa Emanuel," tsi va s-dzâcă: "Dumnidzălu cu noi."

²⁴ Sh-Iosiful, după tsi si sculă di somnu, featsi ashă cum lu avea ursit anghilu a Domnului, sh-u lo ningă năsu muljeara a lui.

²⁵ Ma elu nu u cunuscu, până tsi ea amintă ficiorlu a ljei sh-elu lu acljimă Isus.

2

Shtiutslji dit Răsărit

¹ După tsi Isusul s-amintă tu Betlehem a Iudeiljei tu chirolu al amirălu Ierod. Ia, niscăntsă shtiuts di la Răsărit agiumsiră la Ierusalem,

² dzăcânda: "Tu easti amirălu a Iudeilor, tsi s-amintă? Că vidzum steaua a lui la Răsărit sh-vinim s-nă ncljinăm."

³ Amirălu Ierod, cându avdză aesti zboari, s-tulbură, sh-deadun cu năsu tut Ierusalemu.

⁴ Sh-după tsi lă adună tuts mârilji a preftsălor shi scriblji a popului, lji ntribă iu prindi s-aminta Hristolu.

⁵ Sh-elji lji dzăsiră: "Tu Betlehemlu a Iudeiljei, că ashă easti scriată di la prufitu:

⁶ 'Sh-tini, Betlehem, loc al Iuda, nu eshti ma njic di printsilji a Iudeiljei, că di la tini va easă un conducător, tsi va pască populu a meu, Israelu.' "

⁷ Atumsea Ierodul lă acljimă pi acumtu shtiutslji, sh-ntribă cu mari căsttigă elji, di chirolu cându lu avea vidzută steaua di prota oară.

⁸ Sh-lji pitricu la Betlehem sh-lă dzâsi: "Imnats shi ntribats ghini ti cilimeanlu. Sh-cându s-lu aflats, dimândats-nji tsi s-yin sh-mini s-mi ncljinu."

⁹ Sh-elji, după tsi lu avdzără amirălu, fudziră. Sh-ia, steaua tsi avea vidzută la răsărit, s-dutsea năintea a lor până s-dănăsi la loclu iu eara cilimeanlu.

¹⁰ Elji, cându u vidzură steaua, s-hărsiră multu.

¹¹ Sh-după tsi intrară tu casă, vidzură cilimeanlu cu Maria, muma a lui, shi cădzură pri dzinucljiu shi si ncljinară. Deapoea disfeatsiră ayishtearea a lor sh-durusiră: furii, timeamă shi njir.

¹² După tsi Dumnidzălu lă dimândă tu yis tsi s-nu s-turna la Irod, elji s-turnară tu loclu a lor pri ună altă cali.

Fudzirea tu Eghyptu

¹³ Tora, după tsi shtiutslji s-nchisiră, ia, un anghil a Domnului lji si fânirusi tu yis al Iosif shi lj-dzâsi: "Scoală-ti, ljea cilimeanlu shi muma a lui sh-fudzi tu Eghyptu, shi shedz aclo până s-tsă dzăc mini, că Ierodul va lu caftă cilimeanlu ti vătămari."

¹⁴ Elu, si sculă, lo cilimeanlu sh-muma a lui noaptea shi fudzi tu Eghyptu.

¹⁵ Armasi aclo până muri Irodul, tsi si mplinea tsi eara dzăsă di Domnul prit prufitu: "Lu acljimai hiljilu a meu di Eghyptu."

Vătămarea a Cilimenjilor

¹⁶ Atumtsea Ierodul, vidzânda că shtiutslji lu avea arăs, s-nârâi multu sh-ordină si s-vatâmă tuts cilimenjilji mascuri tsi eara tu Betlehem shi tu tuti locurili di anvârliga a lui, di la doi anji sh-nghios, după chirolu tsi lu avea aflată di la shtiutslji.

¹⁷ Atumtsea si mplini atsea tsi eara dzăsă di la profitul Ieremia că:

¹⁸ "Tu Ramă s-avdză ună zghileari, ună vâitari, un plângu shi patathimă mari. Rachela văita hiljilji a ljei sh-nu va si s-diznjeardă, că elji nu sântu ma."

Turnarea dit Eghyptu

¹⁹ După tsi Ierodul muri, ia un anghil a Domnului si lj-fânirusi tu yis al Iosif tu Eghyptu,

²⁰ shi lj dzăsi: "Scoal-ti, ljea cilimeanlu sh-muma a lui sh-imnă tu loclu al Israel că atselji tsi vrea s-lu vătămă cilimeanlu au murită."

²¹ Sh-elu si sculă, lo cilimeanlu sh-muma a lui shi s-dusi tu loclu al Israel.

²² Ma, cându avdză că Arhelaul, domnea la Iudea tu loclu al Ierod, tatăl a lui, avu frică si s-ducă aclo. Shi, după tsi s-urnipsi di la Dumnidzălu tu yis, s-dusi tu loclu a Galileiljei.

²³ Sh-după tsi agiumsi aclo, shidzu la un cāsăbă tsi s-acljima Nazaret, tsi si mplinea atsea tsi eara dzăsă di la profitsilji: "Elu va si s-acljeamă Nazareas."

3

Ioan Pătidzătorlu

¹ Tu atseali dzăli vini Ioan Pătidzătorlu, tsi predica tu irnjia a Iudeiljei,

² shi dzătsea: "Mitânjiusits-vă, că amirăriljea a tserurilor easti aproapi!"

³ Sh-ti Ioanul avea grită profitul Isaia cându dzăsi:

"Boatsea atsilui tsi aurlă tu irnjii:

'Ndridzets-u calea a Domnului,
ndriptats cārăili a lui.' "

⁴ Ioanul avea nviscută un stranj di lăna a cămilăljei sh-un brân di cheală la mesi. Elu s-hrănea cu carcalets shi njeari-agră.

⁵ Atumtsea oamnjilji a Ierusalemului, di tută Iudea sh-di locurili a Iordanlui s-dutsea cătră năsu,

⁶ shi s-pătîdza di la năsu, tu arău Iordan märtirsinda amărtiili a lor.

⁷ Ma elu, vidzânda că multsă Farisei shi Saducei ma yinea s-pătîdzea la năsu, lă dzăsi a lor: "Pulji di năpărtitsi, cai vâ ari nvitsată tsi s-ascăpats di nărirea al Domnului tsi ma yini?"

⁸ Dats fruti buni tră mitânjiusirea a voastră!

⁹ Sh-nu dzătsets cu mîntea a voastră: 'Noi avem Abrahamul ca tată.' Că mini ma vâ dzăc că Dumnidzălu poati s-da hilji a Abrahamului sh-dit aesti chetri.

¹⁰ Sh-tora tupoara easti tu rădătsina a ponjilor. Itsi pom, tsi nu da fruti buni, va si s-talji sh-va si s-arucă tu foc.

¹¹ Mini ma vâ pătêdz cu apă, tră mitânjiusiri, ma atsel tsi yini după mini easti ma mari di mini, sh-mini nu hiu axiu nitsi s-tsân sandalili a lui. Elu va s-vă pătêadză cu Duhlu Sămtu sh-cu foc.

¹² Elu tsăni tu mănă lupata sh-va lu cătărăsească tut grănarlu a lui, grănlă a lui va lu adună tu hămbar, ma cotsala va lu ardă tu foc niastes."

Pătidzărea al Isus

¹³ Atumtsea vini Isusul dit Galilea la Iordan, la Ioanul tra s-păteadz di la năsu.

¹⁴ Ma Ioanul lu ncuntră dzăcānda: "Mini prindi s-mi pătedzu di la tini, sh-tini ma yinji la mini?"

¹⁵ Sh-Isusul, apāndisinda, lji dzăsi: "Alasă si s-facă tora, cā ashă mplinim itsi ndriptati." Atumtsea elu lu alăsă.

¹⁶ Sh-Isusul, macāt s-pătidză, ishi dit apă. Shi ia, tserurili s-disfeatsiră, sh-elu vidzu Duhlu a Dumnidzălui dipunānda ca un purumbu sh-vininda pristi năsu.

¹⁷ Shi ia, ună boatsi dit tser tsi lj-dzăsi: "Aestu easti Hiljiu a meu vrut, di la cai escu hărăsit."

4*Cărtearea al Isus*

¹ Atumtsea Duhlu lu adusi Isusul tu irnii, tsi draclu su cărtea.

² Shi după tsi tsānu pāreasinj patrudzătsi di dzăli sh-patrudzătsi di noptsă, ma napoi u lo foama.

³ Atumtsea cărtitorlu, după tsi s-apruche, lji dzăsi: "Ma s-hii Hiljiu a Dumnidzălui, dză tsi aesti chetri si s-facă pānji."

⁴ Ma elu lj-apāndisi: "Scritura dzătsi: 'Omlu nu băneadză mash cu pāni, ma cu itsi zbor tsi easi dit gura a Dumnidzălui.'"

⁵ Atumtsea draclu lu adusi tu sântul cāsăbă sh-lu băgă tu măeua a tempului,

⁶ sh-lji dzăsi: "Ma s-hii Hiljiu a Dumnidzălui, arucă-ti nghios, cā Scritura dzătsi: 'Elu va da ordin a anghililor a lui tră tini, sh-atselji va ti tsănă tu mājili a lor tsi s-nu agudeshti cu ciciorlu a tău vără cheatră.'"

⁷ Isusul lj-dzăsi: "Scritura dzătsi tutashă: 'S-nu lu cărteshti Domnul, Dumnidzălu a tău.'"

⁸ Draclu lu dusi dinou pri un munti multu analtu sh-lji spusi tuti amirăriljili a lumiljei sh-mărirea a lor,

⁹ sh-lji dzăsi: "Mini va tsă li dau tuti aesti, macă tini cadz pri dintă năntea a mea sh-va-nji ti-ncijinji."

¹⁰ Atumtsea Isusul lji dzăsi: "Fudzi, Satane, cā easti scriată: 'Alavdă Domnul, Dumnidzălu a tău, sh-lucreadză mash tră năsu.'"

¹¹ Atumtsea draclu lu alăsă, sh-ia, s-aprucheară anghilji tra s-lji huzmipsea.

Isusul tu Galilea

¹² Cāndu Isusul avdză cā Ioanul lu avea băgat tu hapsi, s-trapsi tu Galilea.

¹³ Deapoea alăsă Nazaretul shi s-dusi s-băneadză la Capernaum, cāsăbă ningă amari, tu sinurili al Zabulon shi Neftali,

¹⁴ tsi si mplinească tsi eara dzăsă di la profițlu Isaia cai dzăsi:

¹⁵ "Loclu al Zabulon sh-loclu al Neftali, mardzina a amariljei, loclu napărti di Iordan, Galilea a pāngānjilor,

¹⁶ populu tsi băna tu scutidi ari vidzută ună lunjină mari, sh-pristi atselji tsi stătea tu loclu a aumbriljei a moartiljei, arăsări lunjina."

¹⁷ Di atumtsea Isusul apārni s-predica shi s-dzătsea: "Mitānjiusits-vă cā amirăriljea a tserurilor easti aproapi."

Protslji Ucenitsi

¹⁸ Cându ma fudzea ningă amarea a-Galileiljei, Isusul vidzu doi frats: Simonul tsi s-acljima Petru, sh-Andrea, frati-su, tsi ma aruca plăsili tu amari cã eara piscari.

¹⁹ Sh-lă dzăsi a-lor: "Haidets după mini sh-mini va vã facã piscari di oaminji."

²⁰ Sh-dinãoarã elji alăsarã plăsili sh-lu urmarã.

²¹ Sh-cum s-dusi ma nclo, vidzu doi altsã frats: Iacovul, hiljiu al Zevedeu sh-Ioanul, fratili a lui, tu varcã deadun cu Zevedeu tatili a lor, tsi ma ndrizea plăsili. Sh-lji acljimã.

²² Elji alăsarã trãoarã varca sh-tatãl a lor shi s-dusirã după nãsu.

²³ Isusul strãbãtea tutã Galilea, nvitsãnda tu sinagodzili a lor, predicãnda evanghelul a amirãriljei sh-vindicãnda itsi lãngoari sh-itsi niputeari eara tu popul.

²⁴ Ashã anamea a lui si arăspândi tu tutã Siria, sh-lji adutsea tuts lãndzitslji tsi s-munduea di niputeri sh-dureri soi di soi, demonizatsi, epileptici sh-paralizatsi, sh-elu lji vindica.

²⁵ Sh-un multsãmi mari di oaminji nidzea după nãsu dit Galilea, dit Decapoli, dit Ierusalem, dit Iudea sh-di napãrti di Iordan.

5

Ahurhita a Nvitsãturiljei tu Munti

¹ Sh-cãndu Isusul vidzu multsãmea, s-alinã pri munti, sh-dupã tsi shidzu, s-apruchearã di nãsu ucenitsilji a lui.

² Sh-elu discljisi gura, sh-lji-nvitsã.

Ghnicuvãntãrili

Elu dzăsi:

³ "Ghnicuvãntats suntu atselji oarfãnjli tu duh, cã a lor easti amirãriljea a tserurilor.

⁴ Ghnicuvãntats suntu atselji tsi vãiteascã, cã elji va s-diznjeardã.

⁵ Ghnicuvãntats sãntu atselji froninji, cã elji va mushtineadzã loclu.

⁶ Ghnicuvãntats suntu atselji tsi au foami shi seati ti ndriptati, cã elji va s-fãnãteascã.

⁷ Ghnicuvãntats suntu atselji njiluitsilji, cã elji va aflã njilã.

⁸ Ghnicuvãntats suntu atselji tsi suntu curats tu inimã, cã elji va lu veadã Dumnidzãlu.

⁹ Ghnicuvãntats suntu atselji tsi aducã pacea, cã elji va s-acljeamã hiljilji a Dumnidzãlui.

¹⁰ Ghnicuvãntats suntu atselji avinatsilji trã ndriptati, cã a lor easti amirãriljea a tserurilor.

¹¹ Ghnicuvãntats va-hits voi cându va vã ngiurã, sh-va vã avinã, sh-arãdãnda, va dzãc tuti arãli contra voi, trã itia a mea.

¹² Hãrãsits-vã shi harãcupsits-vã, cã mari easti arãsplãtirea a voastrã tu tseruri, cã ashã lji avinarã sh-prufitsãlji nãntea a voastrã."

Sarea sh-Lunjina

¹³ "Voi hits sarea a loclui. Ma, macã sarea s-aspardzi cum poati su amintã njurizma? Nu fatsi di tsiva, di cãt trã arcari, shi su calcã oaminjili.

¹⁴ Voi hits lunjina a lumiljei. Un cãsãbã adratã pri munti nu poati si s-ascundã.

¹⁵ Tutashã nu s-aprindi un cãndilã tra si s-bagã sum vasã, ma tra si s-bagã pri shandan shi s-facã lunjinã trã tuts tsi suntu la casã.

16 Ashã s-lunjineadzã lunjina a voastrã nãintea a oamnjilor, tra s-veadã faptili a voastri atseali buni, shi s-mãreascã Tatãl a vostru tsi easti tu tseruri."

Mplinirea a Legiljei

17 "Nu minduits cã mini vinj s-aspargu legea icã prufitsilji. Mini nu vinj s-aspargu, ma s-li mplinescu.

18 Cã dealiheã vã dzacã: Pãnã cãndu tserlu shi loclu s-treacã, nitsi unã iotã sh-nitsi unã chicutã nu va s-trecã di legea, ma nãinti tsi si mplineascã tuti.

19 Atsel tsi va nalcã un di aesti ordini ma njitsi, sh-va s-aibã nvitsatã oaminjili, elu va s-acljeamã ma njiclu tu amirãriljea a tserurilor. Ma atsel tsi va li bagã tu practicã sh-va li-nveatsã a alantsãlor, va s-acljeamã ma marli tu amirãriljea a tserurilor.

20 Trã atsea mini ma vã dzãc: macã ndriptatea a voastrã nu va s-lu treacã atsea a Scribilor sh-a Fariseilor; voi nu va s-intrats tu amirãriljea a tserurilor.

21 Voi avets avdzãt cã fu dzãs a vecjlilor: 'Nu vatãmats. Caitsido tsi vatãmã va s-hibã sum giudicari.'

22 Ma mini ma vã dzãc: Caitsido tsi s-nãrãeashti fãrã sibepi cu fratili a lui, va s-hiba giudicatã. Sh-cai lji dzãtsi a fratilui a lui: 'Aspartã di-minti,' va hibã sum giudicata al Sinedriu, sh-cai va lji dzãcã: 'Glare,' va hibã tu foclu ali Gheheni.

23 Macã tini aduts doara a ta la altar, sh-aclo aduts aminti cã fratili a tãu ari tsiva contra tini,

24 alasã aclo doara a ta, nãintea a altarlui, sh-duti ma nãinti puituea-ti cu fratili a tãu sh-deapoea toarnã-ti shi dã doara a ta.

25 Puituea-ti cu contrarlul a tãu, pãnã cãndu eshti la un cali cu nãsu, tsi s-nu ti prida contrarlul a tãu la giudicãtorlu, sh-giudicãtorlu s-ti prida la gardianlu sh-tini s-agiundz tu hapsi.

26 Dealiheã tsã dzãc cã nu va eshi di-aclo, ni plãtit centezimul a fundu.

27 Voi avets avdzãt cã a vecjlilor fu dzãsã: 'Nu ncãlcats curuna.'

28 Ma mini ma vã dzãcã cã caitsido tsi mutreashti unã muljeari tra s-u aibã, ari ncãlcãtã curuna cu nãsã tu inima a lui.

29 Macã oclyul a tãu atsel ndreptu ti dutsi tu amãrtii, scoati-l shi arucã-l diparti di tini. Cã easti ma ghini ti tini tsi s-cherdzi un di mädularili a tali, di cãt si s-arucã tu Ghehenã tut trupu a tãu.

30 Sh-macã mãna a ta atsea ndreapta ti dutsi tu amãrtii, si-u talji shi si-u arutsi diparti di tini. Cã ma ghini easti s-cherdzi unu din mädularili a tali, di cãt si s-arucã tu Ghehenã tut trupu a tãu.

31 Fu dzãsã tutashã: 'Cai alasã muljearea a lui, s-lji da cartea a dispãrtsãrilje.'

32 Ma mini ma vã dzãcã: Cãtsido tsi u alasã muljearea a lui, di cãt tu arastea a putãnsiriljei, u fatsi s-nalcã curuna. Caitsido tsi si nsoari cu unã muljear alãsatã nalcã curuna.

33 Voi avets avdzãtã tutashã cã a vecjlilor fu dzãsã: 'Nu fã spigiurari arãdioasi, ma mplinea spigiurarea a ta tsi lji ai faptã a Domnului.'

34 Ma mini ma vã dzãcã: Nu spigiurats-vã dip, nitsi pri tserlu, cã easti thronlu a Dumnidzãului,

35 nitsi pri loclu, cã easti scamnul a cicioarilor a lui, nitsi pri Ierusalemu cã easti cãsãbãlu a Amirãlu atsel marilui.

36 Nu ti spigiur nitsi pri caplu a tãu, cã nu ai fuchii s-alãgheshti icã s-lãeshti macari sh-un hir di per.

³⁷ Ma sborlu a tău s-hibă: 'Ie, ie' ică 'Nu, nu.' Că itsido ma multu yini di la slablu.

³⁸ Voi avets avdzătă că fu dzăsă: 'Ocljiu tră ocljiu shi dinti tră dinti.'

³⁹ Ma mini ma vâ dzăcă: Nu lji ncuntreadză a arăului (cu arău). Macă vără ti agudeashti pri fatsa atsea nandreapta, toarnă-lji sh-alanta.

⁴⁰ Sh-macă vără va ti ducă tu giudic, tra s-ljea tunica a ta, dă-lji sh-mantelul.

⁴¹ Shi macă vără ti strindzi să imnji ună milje, tini fă doauă cu năsu.

⁴² Dă-lji a tsilui tsi ts-caftă, sh-nu arnisea s-lji dai atsilui tsi ts-caftă mprumută.

⁴³ Voi avets avdzătă că fu dzăsă: 'S-vrei aproapilu a tău shi s-aurăshti neamiclu a tău.'

⁴⁴ Ma mini ma vâ dzăcă: S-vrets neamitsilji a voshtri, *ghinucuvântats atselji tsi vâ blastimă. Fătsets ghini atsilor tsi vâ aurăscu, shi părăcâlsits-vă tră atselji tsi vâ fac arău, shi vâ agunescu,

⁴⁵ tra s-hits hiljilji a Tatălui a vostru tsi easti tu tseruri. Că elu fatsi s-easă soarili a lui pri bunjilji shi pri arăljilji, shi fatsi s-da ploai pri ndreptsălji shi pri nidreptsălji.

⁴⁶ Că ma s-vrets mash atselji tsi vâ vor, tsi arăsplată va avets? Nu fac ashă shi taxidarlji?

⁴⁷ Sh-macă salutats mash fratsălji a voshtri, tsi ma multă dicăt altsălji fătsets voi? Nu fac ashă sh-pângânilji?

⁴⁸ S-hits ashă perfectsă ashă cum easti perfect sh-Tatăl a vostru tserescu."

6

Nvitsătură ti Dicunji, Părăracâlsirea sh-Păreasinli

¹ Isusul dzăsi: "Băgats mintea s-nu fătsets ghini năntea a oaminjilor, tsi elji s-vă alavdă a voauă, altă soi nu va vâ arăsplătis di la Tatăl a vostru tsi easti tu tseruri.

² Căndu s-dai dicunji, nu bati trumpeta năntea a ta, ashă cum fac ipucritsilji tu sinagogă sh-pri căljuri, tra s-hibă tinjisits di oaminjli. Dealieha vâ dzăc ca elji tora u-au loată arăsplata a lor.

³ Căndu fatsi ghini, astănga a ta s-nu shtii tsi fatsi a andrepta a ta.

⁴ Căndu a fats buneatsa a ta, s-facă pri ascumtu. Sh-Tatăl a tău tsi veadî pri ascumtu, el va-ti arăsplătească a tsăia năntea a tutulor.

⁵ Sh-căndu tini ti părăcâlseshti, nu ti fă ca ipucritsilji că a lor lă arăseashti s-părăcâlsească mproshti tu sinagogă, sh-tu pădzili a căljurilor tra s-hibă vîdzuts di oaminjilji. Dealieha vâ dzăc că elji tora u au loat arăsplata a lor.

⁶ Ma tini candu s-ti părăcâlseshti intră tu udălu a tău, ncljidi usha sh-părăcâlseati a Tatălui a tău pri ascumtu. Sh-Tatăl a tău tsi veadî pri ascumtu va ti arăsplătească năntea a tutulor.

⁷ Căndu vâ părăcâlsits s-nu folosits idyili zboari ca pângânilji, că elji minduească că va si-mplinească părăcâlsirea că au dzăsă multi zboari.

⁸ Nu vâ fătsets ca atselji, că Tatăl a vostru li shtii tuti di tsi avets ananghi, ma năinti tsi voi s-li căfats.

⁹ Ma voi părăcâlsits-vă ashă:

'Tatăl a nostru tsi eshti tu tseruri,
si sântsească numa a ta.

^{5:39} Rom 12:21. * ^{5:44} Tu alti manuscrituri easti scriată "ghinucuvântats atselji tsi vâ blăsteam, fătsets-vă ghini atsilor tsi vi aură."

¹⁰ S-yinā amirārîljea a ta. Si s-facă vrearea a ta tu loc, ashâ di cum tu tser.

¹¹ Pănea a noastră di cathi dzuă, dă-nă-u a noauă ază.

¹² Sh-ljeartă-nă amârîiili a noastră, ashâ di-cum sh-noi lâ ljirtăm a amârîoshilor a noshtri.

¹³ Sh-nu nă alasă s-cădem tu cârteari, ma nă ascapă di atsel arău. [Că a ta easti amirārîljea, sh-putearea, sh-mărire a totăna]*. Amen.'

¹⁴ Că macă voi lâ ljirtats a oamnjilor amârîiili a lor, Tatăl a vostru dit tser va vâ li ljeartă sh-a voauă.

¹⁵ Ma, macă voi nu lâ ljirtats a oamnjilor amârîiili a lor, nitsi Tatăl a vostru nu va li ljeartă amârîiili a voastri.

¹⁶ Sh-cându s-tsânets păreasini s-nu vâ spunets nvirinats ca ipucritsilji. Că elji aspargă fâtsili tsi s-aspună a oamnjilor că tsănă păreasini. Dealieha vâ dzăc că elji tora u-au loată arăsplata a lor.

¹⁷ Iară tîni, cându s-tsânji păreasini, aundzi caplu sh-aspeală fatsa a ta,

¹⁸ tra s-nu lâ aspunji a oamnjilor că tîni ma tsânji păreasini, ma a Tatălui a tău pri ascumtu sh-Tatăl a tău cai mutreashti pri ascumtu, va ti arăsplătească năntea tutulor."

Ayishterea Tserească

¹⁹ "Nu adunats tră voi ayishteari pri loc, iu li aspargă molitsa sh-arudzina, sh-iu furlji sapă shi fură.

²⁰ Ma aduanats tră voi ayishteari tu tser, iu nitsi molitsa, nitsi arudzina nu li aspargu, sh-iu furlji nu sapă shi nu fură.

²¹ Că iu easti ayishtearea a voastră, aclo va s-hibă sh-inima a voastră.

²² Lunjina a truplui easti ocljiul. Macă ocljilu a tău easti curat, tut trupu va s-hibă lunjinat.

²³ Macă ocljiul a tău easti arău, tut trupu a tău va s-hibă tu scutidi. Macă lunjina tsi easti la tîni easti scutidi, cât ma mari va s-hibă scutidlu!

²⁴ Vără nu poati s-huzmitipsească la doi domnji. Că ică va s-lu aurască unlu sh-va alantu, ică va armăn pistimen la unu, sh-va dispretsuească alantu. Nu pots s-huzmitipseshti a Dumnidzălui sh-a părădzălor."

S-nu Avets Gaile

²⁵ "Tră atsea ma vâ dzăc: Nu vâ minduits ti bana a voastră, tsi va măcats shi tsi va bets, nitsi ti trupu a vostru tră atsea tsi va nvishtets. Vahi nu easti bana ma scumpă di cât hrana, sh-trupu ma scumpu di nvishtearea?

²⁶ Mutrits puljilji a tserlui, elji nu seamină, nitsi seatsiră, nu adună tu hămbări, cu tut atsea Tatăl a vostru dit tser lji hrăneshti. Nu custusits voi ma multu di cât atselji?

²⁷ Sh-cai di voi cu tut căshtiga a lui poati s-adavgă la statura a lui macari un cubit singur?

²⁸ Că tse vâ cărtits di nvishtearea a voastră? Mutrits cum crească zămbatsilji a câmpului, nu lucrează sh-nitsi torcu.

²⁹ Sh-ma vâ dzăc că nitsi Solomonul, cu tută mărire a lui, nu eara nviscută ca vără di elji.

³⁰ Tora macă Dumnidzălu u-nveashti ashâ iarba a câmpului tsi ază easti sh-măni va si s-arucă tu cireapu, vahi nu va vâ-nvească a voauă ma multu, oaminji pisti-putsân?

³¹ Nu vâ cărtits dzăcânda: 'Tsi va măcăm ică tsi va bem, ică cu tsi va nă nvishtem?'

* **6:13** Tu alti manuscrisuri nu sã află atseli zboari.

³² Că suntu pângânjili tsi caftă tuti aesti lucrî. Tatăl a vostru di tser lu shti ghini că voi avets ananghi tră tuti aesti lucrî.

³³ Ma, nânti di tuti căftats amirâriljea a Dumnidzâlui shi ndriptatea a lui sh-tuti aesti ananghi va s-vă adavgă a voauă.

³⁴ S-nu avets gaile tră dzua di mâni. Că dzua di mâni va si s-căstighadză di năsă. Lj-agiundzi a dzuâljei arăutatea a ljei."

7

Nvitsătura di Giudicâtsili Nindreapti

¹ Isusul dzâsi: "Nu giudicats, tra s-nu s-hits giudicats.

² Că voi va vă giudicats după giudicarea tsi voi fătsets, sh-cu metrul tsi misurats, va vă misurats.

³ Căte vedz paljiu tu ocljiul a fratilui a tău, sh-nu vedz grenda tu ocljiul a tău?

⁴ Ică, cum pots s-lji dzătsi a fratilui a tău: 'Ashteaptă s-tsă scot paljiu dit ocljiu', cându ai un grendă tu ocljiul a tău?

⁵ Ipocrite, scoati ma năinti grenda dit ocljiul a tău, sh-deapoea va vedzi curată tra s-lji scots paljiul dit ocljiul a fratilui a tău.

⁶ Nu lă dats a cānjilor tsi easti sāmă sh-nu lă-arucats mǎrgăritării a voastri năintea a portsilor, tsi s-nu li ncalcă cu cicioari shi si s-toarnă contra voi shi s-vă disică."

Căftarea shi Asunarea

⁷ "Dicunjats sh-va vă da, căftats sh-va aflats, asunats la ushă shi va vă si discljiidă.

⁸ Cai dicunji, ljea. Cai caftă, află, sh-va si discljiidă atsilui tsi asuni.

⁹ Ari vără om namisa di voi, tsi ma s-lji caftă hiljiu pāni, s-lji da cheatră?

¹⁰ Ică ma s-lji caftă peshti, s-lji da năpărtică?

¹¹ Atumtsea, macă voi tsi hits arăi shtits s-dats doari buni a hiljilor a voshtri, ahāt ma multu Tatăl a vostru, tsi easti tu tseruri, va da lucrî buni atsilor tsi lj-caftă.

¹² Itsido tsi voi vrets s-vă facă oaminjili, fătsets-li sh-voi atsilor, că aestă easti Legea sh-Prufitsilji.

¹³ Intrats pri poarta atsea strimta, că largă easti poarta sh-mari easti calea tsi ti dutsi tu aspărdzeari, sh-mutlsă suntu atselji tsi intră prit năsă.

¹⁴ Ma strimă easti poarta sh-greauă easti calea tsi dutsi tu bană! Sh-putsânji suntu atselji tsi u-află."

Prufitsâlji Arădioshi

¹⁵ "Afirits-vă di prufitsâlji arădioshi, tsi yin la voi nvăscuts ca oi, ma di năuntru suntu luchi arăchitori.

¹⁶ Voi va lji cunushtets di frutili a lor. S-adună vahi aua di la pāljiuri, ică hits di la scalji?

¹⁷ Ashă itsi pom bun da fruti buni, iară pomlu atsel arău da fruti arali.

¹⁸ Nu poati un pom bun s-da fruti arali, nitsi un pom arău s-da fruti buni

¹⁹ Itsi pom tsi nu da fruti buni, si s-talji shi s-arucă tu foc.

²⁰ Voi va lji cunushtets prufitsâlji di frutili a lor.

²¹ Nu itsi om tsi nj-dzătsi: 'Doamne, Doamne,' va intră tu amirâriljea a tserurilor. Ma va intră singur atsel tsi fatsi vrearea a Tatălui a meu tsi easti tu tseruri.

²² Multsă va nji dzăcă tu atsea dzuă: 'Doamne, Doamne, nu prufitipsimă tu numa a ta? Nu l-ağunim demonjilji tu numa a ta? Sh-nu avem faptă multi thavmati tu numa a ta?'

²³ Sh-atumtsea va lă spună a lor: 'Mini nu vā am cunuscut pute. Dipārtats-vā di la mini, voi tuts, tsi avets lucrat anapuda.' "

Casa pri Cheatră

²⁴ "Tră atsea caitsido tsi li avdi aesti zboari a meali sh-li mplineashti, undzeashti cu un om mintimen, tsi u-ari adrată casa a lui pri cheatră.

²⁵ Sh-deadi ploai, vini năcareă, s-uflară vimturi, shi s-plăscăniră pri atsea casă, ma ea nu cădzu, că eara thimiljeată pri cheatră.

²⁶ Iară caitsido tsi lă avdi zboarili sh-nu li mplineashti, undzeashti cu un glar, tsi u adră casa a lui tu arină.

²⁷ Sh-deadi ploai, vini năcareă, s-uflară vimturi, s-plăscăniră pri atsea casă sh-ea cădzu, sh-aspărdzerea a ljei eara mari."

²⁸ Tora, cându Isusul ascăpă di-aesti zboari, multsânjili armasiră ciudisiti di nvitsătura a lui,

²⁹ că elu lă nvitsa ca un om cu puteari, sh-nu ca scriblji.

8

Vindicarea a Leproslui.

¹ Tora cându Isusul dipună dit munti, multsămi mări lu urma.

² Sh-ia, un lepros vini sh-si ncljină, dzăcânda: "Doamne, ma s-vrei tini pots s-mi curi."

³ Sh-Isusul timsi măna, lu băgă pi năs sh-lji-dzăsi: "Te, mini voi, cură-ti!" Sh-tu atsea oară s-vindică di lepra a lui.

⁴ Atumtsea Isusul lji dzăsi: "Vedzi, si nu lj-spunji a vărui, ma duti năntea a preftului, sh-fă doara tsi ari ursită Moisiul tsi aestă s-hibă märtirii tră caitsido."

Tsenturionlu al Capernaum

⁵ Cându Isusul intră tu Capernaum, lji vini un tsenturion părăcâlsinda,

⁶ shi lji dzăsi: "Doamne, sclavul a meu easti paralizat tu pat n-casă shi ma s-mundueashti multu."

⁷ Sh-Isusul lji dzăsi: "Va yin shi va lu vindică."

⁸ Tsenturionlu apândisinda lji dzăsi: "Doamne, mini nu escu axiu tsi tini s-intsri tu streaha a mea, ma dză mash un zbor shi sclavlu a meu va si s-vindică.

⁹ Că sh-mini escu un om sum autoritatea a altsilor, sh-lji-am suldatslji sum mini. Ma s-lji dzăc a unui: 'Duti!', elu s-dutsi, shi ma s-lji dzăc a altui: 'Ajdi!', elu yini, shi ma s-lji dzăc a sclavulu a meu: 'Fă aestă!', elu u-fatsi."

¹⁰ Cându Isusul lavdză aestă, s-ciudisi sh-lă dzăsi atsilor tsi lu urma: "Dealieha ma vā dzăc, că iuva tu Israel nu aflai un pisti ahântă mari.

¹¹ Mini ma vā dzăc că multsă va yin di la răsărit sh-di la ascăpitat, sh-va apună la measă cu Abrahamul, cu Isacul sh-cu Iacovul tu amirăriljea a tserurilor,

¹² ma hiljilji a amirăriljei, atselji aleptsă di la Dumnidzălu, va hibă arcats tu scutidlu di nafoară. Aclo va hibă plângul sh-cărtsănirea a dintsilor."

¹³ Atumtsea Isusul lji dzăsi a tsenturionul: "Du-ti, shi si s-facă ashă cum pistipsishi!" Sclavul s-vindică tu atsea oară.

Soacra a Petruului

¹⁴ Deapoea Isusul intră tu casa a Petrului sh-vidzu soacra a lui tsi eara tu pat cu hevri.

¹⁵ Candu elu lji băgă māna hevrili u-alāsarā. Sh-ea si sculă sh-ahurhi s-lji huzmitipsea a lui.

¹⁶ Cându vini seara, lji adusiră multsă demonizatsi, sh-elu cu zbor aḡuni duhurili sh-vindică tuts lāndziṣli,

¹⁷ tsi ashā si mplinească zborlu a prufitlui Isaia cându dzāsi:

“Elu li lo niputerili a noastri
sh-li purtă lāngoarili a noastri.”

Urmarea al Isus

¹⁸ Cându Isusul vidzu anvārliga di nāsu multsāmi mări, ordină s-treacă di napārți.

¹⁹ Atumtsea un srib s-apruche sh-lji dzāsi: “Nvitsătore, mini va ti urmedzu iutsido tsi va ti duts.”

²⁰ Sh-Isusul lji dzāsi: “Vulpili au guvāli a lor, sh-puljilji a tserlui au cuibairili, ma Hiljiu a omlui nū ari iū s-bagă caplu.”

²¹ Deapoea un din ucenitsilji a lui lji dzāsi: “Doamne, dā-nji volje ma nāinti s-mi duc s-ngrop tatāl a meu.”

²² Ma Isusul lji dzāsi: “Urmeadz-mă, sh-alasă mortsālji s-ngroapă mortsālji a lor.”

Isusul Muljeadzi Furtuna

²³ După tsi elu s-alinā tu varcā, ucenitsilji a lui lu-urmarā.

²⁴ Sh-ia, tu amari si sculā unā furtunā mari, sh-vāljurili ma anvālea varca, ma Isusul durnjea.

²⁵ S-apruchearā la nāsu ucenitsilji a lui, lu dishtiaptarā shi lji dzāsirā: “Doamne, ascapā-nā, cā noi ma nā nicām.”

²⁶ Isusul lā dzāsi a lor: “Cātse avets fricā, voi oaminj cu pisti-putsānā?” Cum si sculā, aurlā a vimturilor sh-a amariljei shi s-featsi tātseari mari.

²⁷ Atumtsea oaminjli s-thāvmātisirā shi dzātsea: “Cai easti aestu, tsi ma lu ascultā vimturli shi amarea?”

Demonizatlu Gadarean

²⁸ Cându Isus agiumsi tu alantā parti tu loclu a Gadarenjilor, lji ishirā nāinti doi demonizats tsi avea ishitā di murmintsā. Elji eara ahāntu turbatsi, cāt nitsunu nu putea s-tritsea pi atsea cali.

²⁹ Sh-ia, elji ahurhirā s-aurlā: “Tsi ai cu noi, Isus, Hiljiu a Dumnidzālui? Ai vinit aoa s-nā mundueshti ma nāinti di oara tsi prindī?”

³⁰ Sh-nu multu diparti di nāshi un cupii mari di portsi ma pāshtea.

³¹ Atumtsea demonjilji s-pārăcālsirā a lui: “Macă nā aḡuneshti, alasā-nā s-intrām tu atsea cupii di portsi.”

³² Elu lā dzāsi a lor: “Dutsets-vā!” Ashā elji după tsi ishirā, intrarā tu atsea cupii di portsi. Ia, tutā cupia s-arcă di ripā tu amari, shi s-nicarā tu apā.

³³ Atselji tsi lā pāshtea fudzirā tu cāsābā sh-cāndu agiumsirā aclo spusirā tuti aesti, tutashā tsi avea undzitā cu demonizatsilji.

³⁴ Atumtsea, tutā cāsābālu ishi nāintea a Isusului. Cându lu vidzurā lji pārăcālsirā tsi s-dipārta dit loclu a lor.

¹ Isusul după tsi intră tu varcă, tricu tu alantă parti, shi vini tu căsăbălu a lui.

² Sh-ia, lji adusiră un om paralizat tu pat, sh-Isusul cându vidzu pitea tsi avea elji, lji dzăsi a paralizatului: "S-ai curaiu, hilje, amărtili a tali suntu lji rtati!"

³ Atumtsea niscantsă scribi dzăsiră cu mintea a lor: "Aestu ma blastimă!"

⁴ Ma Isusul cunuscândă minduirili a lor dzăsi: "Cătse minduits lucrî arali tu ininjili a voastră?"

⁵ Tsi easti ma lishor tră dzătseari: 'Amărtili a tali suntu lji rtati,' ică: 'Scoală-ti sh-imnă'?

⁶ Ma tora tsi s-shtits că Hiljiu a omlui ari puteari pri loc s-ljeartă amărtiili." Lji dzăsi a paralizatului: "Scolă-ti, ljea patlu sh-duti la casă a ta."

⁷ Sh-elu si sculă shi s-dusi la casă a lui.

⁸ Multsânjili cându lu vidzură aestă, s-ciudisiră sh-măriră Dumnidzălu, tsi avea dată a oamnjilor ahtari puteari.

Acłjimarea al Mateu

⁹ Deapoea cându s-dusi Isusul nclo, vidzu un om tsi shidea la yimbruchi, acłjimată Mateu, sh-lji-dzăsi: "Urmeadză-mă!" Sh-elu si sculă sh-lu urmă.

¹⁰ Cându Isusul shidea la measă la casă, viniră multsă taxidari sh-amărtiوشي, s-apunară sh-măcară deadun cu năsu sh-cu ucenitsilji a lui.

¹¹ Fariseilji cându vidzură aestă, lji dzăsiră a ucenitsilor a lui: "Cătse nvitsătorlu a vostru măcă cu taxidarlji sh-cu amărtiوشيlji?"

¹² Candu Isusul avdză aesti, lă dzăsi a lor: "Nu suntu sânătoslji tsi au ananghi di doctor ma atselji lăndzitslji.

¹³ Tora dutsets-vă sh-nvitsats tsi va s-dzac: 'Mini voi njilă sh-nu curbani.' Că nu vinj s-acłjem tră mitănjusiri ndreptsălji, ma amărtiوشيlji."

Zborlu di Păreasinji

¹⁴ Atumtsea s-apurcheară ucenitsilji a Ioanului shi ntribară: "Cătse noi sh-Fariseilji tsănem păreasinji di multi ori, iară ucenitsilji a tălji nu tsăn păreasinji?"

¹⁵ Isusus lă dzăsi a lor: "Pot numtarlji s-aibă jali, pănă cându dzinirli easti cu năshi? Ma va yin chiolu cându va lu ljea dzinirli di la elji sh-atumtsea elji va s-ăgiuneadză.

¹⁶ Vără nu bagă tu stranji veclji un petic nou, că altă soi arupi stranjii shi azmuldzearea s-fatsi ma mari.

¹⁷ Vără nu bagă yinlu atsel noulu tu folji veclji, că altă soi foljilji s-arup, yinlu s-vearsi sh-foljilji cheară. Ma yinlu atsel noulu s-bagă tu folji noauă, ashă veagłji un-alantu."

Isusul Vindică ună Muljeari sh-Nyeadzî ună Feată

¹⁸ Cându Isusul lji-dzătsea aestă, s-apruche un di mărilji a sinagăłlei, cădzu pri dintsă năntea a lui sh-lji-dzăsi: "Macăt nj-muri hiljea, haidi sh-bagă măna pri năsă sh-ea va băneadză."

¹⁹ Isusul si sculă shi s-dusi după năsu deadun cu ucenitsilji a lui.

²⁰ Sh-ia, ună muljeari tsi di doisprădzătsi di anji lji-cura sândzili, s-apruche di năpoi sh-băgă măna tu mardzina a stranjilui a lui.

²¹ Că dzătsea cu mintea a ljei: "Ma s-bagă măna la stranjii a lui, va mi vindică."

²² Isusul s-turnă, lu vidzu sh-dzăsi: "S-ai curaiu hiljea a mea, pitea a ta ti vindică." Shi tu ora atsea muljearea s-vindică.

²³ Cându Isusul agiumsî la casa a mărilui a sinagogâljei sh-vidzu fluerătorilji sh-multsâmea turburată,

²⁴ lă-dzâsi a-lor: "Dipărtats-vă cā feata nu ari murit, ma doarmi." Sh-elji arăsiră cu năsu.

²⁵ Deapoea, cându multsâmea u-scoasiră nafoară, elu intră, u-acătsă di mână sh-ea si sculă.

²⁶ Shi anamea aishteî anami s-disfeatsi tu tut loclu.

Vindicarea a Orghilor sh-a Mutlui

²⁷ Cându Isusul ma fudzea di aclo, doi orghi lu urma aurlânda sh-dzâcânda: "Njilua-nă noi, Hiljiu al David!"

²⁸ Cându Isusul agiumsî la casă, orghilji s-aprucheară sh-elu lă dzâsi a lor: "Pistipsits voi cā mini pot s-u fac aestă?" Elji apândisiră: "Ie, Doamne."

²⁹ Atumtsea elu băgă mâna la ocljilji a lor, dzâcânda: "Si s-facă după pitea a voastră."

³⁰ Deapoea a lor lă si discljisiră ocljilji. Sh-Isusul lă ordină dzâcânda: "Videts s-nu shtibă vără om."

³¹ Ma elji macăt ishiră u arăspândiră anamea a lui tu tut loclu.

³² Cându elji ma isha, lji adusiră un bărbat mut shi demonizat.

³³ După tsi Isusul aḡuni demonul, mutlu grăi. Sh-multsânjili s-ciudisiră sh-dzâsiră: "Nu easti vidzut pute un ahtar lucru tu Israel!"

³⁴ Ma Fariseilji dzătsea: "Elu aḡuneashti demonjilji cu aḡutarea a printslui a demonjilor."

Sitsirarea shi Lucrutorilji

³⁵ Isusul tritsea pri tuti cāsăbadzili sh-hoarili, nvitsânda tu sinagogăli a lor, predicânda evanghelul a amirăriljei, shi vindicânda itsi lăngoari sh-itsi niputeari tu popul.

³⁶ Cându vidzu multsânjili avea njilă tră năshi, cā eara nvirinati sh-arăspânditi ca oili fără picurar.

³⁷ Atumtsea elu lă dzâsi a ucenitsilor a lui: "Sitsirarea easti dealihea mar, ma lucrutorilji suntu putsânji.

³⁸ Părcălsits-vă, a Domnului a sitsirărilor s-pitreacă lucrutori la sitsirărilji a lui."

10

Doisprădzatslji sh-Misiunea a lor

¹ Atumtsea Isusul lă acljimă di doisprădzatsi ucenitsilji a lui ningă năsu, sh-lă deadi autoritat s-li aḡunească duhurili atseali nicuarati, shi s-vindică itsi lăngoari sh-itsi niputeari.

² Aesti suntu numili a doisprădzatsi apostulji: protlu Simonul acljimat Petru, shi Andrea, frătli a lui, Iacovul hiljiu al Zevedeu, shi Ioanul, frătli a lui,

³ Filipul sh-Bartolomeu, Toma sh-Mateu taxidarlu, Iacovul hiljiu al Alfeu, sh-Tadeul,

⁴ Simon Cananeulu, sh-Iuda Iscariotul atsel tsi deapoea lu prideadi.

⁵ Aeshti suntu di doisprădzatslji tsi Isusul lji pitricu sh-lă deadi ordinli aesti: "Nu vă dutsets cătră pāngānjili sh-nu intrats tu vără cāsăbă a Samaritenjilor.

⁶ Ma dutsets-vă ma ghini la oili atseali chiruti di la casa al Israel.

⁷ Dutsets-vă sh-predicats, dzâcânda: 'Amirăriljea a tserurilor s-apruche.'

⁸ Vindicats lândzitsălji, curats leproshilji, injiats mortșălji, aĝunits demon-jili. Geaba loată, geaba s-dats.

⁹ Nu adunats furii, nitsi asimi, nitsi băcăr tu punga a voastră,

¹⁰ nitsi tastru ti cali, nitsi doauă păreclji di tunică, nitsi sandali, nitsi ciomagă, că lucrutorlu easti axiu ti hranea a lui.

¹¹ Tu itsi cāsăbă ică hoară tsi s-intrats, ntribats macă ari aclo vără om axiu, shi shădets aclo pănă-cându s-vă nchisits.

¹² Shi cându s-intrats tu casă, s-lu salutats.

¹³ Sh-macă atsea casă easti axiu, va yină pacea a voastră pri ea, macă nu easti axiu, pacea a voastră va s-toarnă năpoi la voi.

¹⁴ Sh-macă vără nu vă ashteaptă, sh-nu lă avdi zboarili a voastri, ishinda di atsea casă ică di atsel cāsăbă, scuturats puhlu di cicioarili a voastri.

¹⁵ Dealieha ma vă dzăc că tu dzua a giudicatiljei loclu a Sodomăljei sh-a Gomoriljei va hibă cu ma multă lishureatsă di atsel cāsăbă.

¹⁶ Ia, mini ma vă-pitreacă ca oili namisa di luchilji. S-hits mintimenji ca năpărtisili sh-curats ca purunghilji.

¹⁷ Afritsi-vă di oaminjili că va s-vă prida năntea a sinedriului a lor, shi va s-vă bată tu sinagogăli a lor.

¹⁸ Sh-va vă aducă năntea a guvernatorilor sh-năntea a amiradzilor tră itia a mea, tsi s-mărtirsits năntea a lor shi a păgânjilor.

¹⁹ Sh-cându s-vă prida tu mănji a lor, nu vă minduits că tsi va s-grits, că tu atsea oară va vă si da atsea tsi prindi dzătsets.

²⁰ Că nu va s-hits voi tsi grits, ma Duhlu a Tatălui a vostru tsi va s-grească tră voi.

²¹ Tora fratri va prida frati-su la moarti, sh-tatili hiljiu a lui, cilmenjilji va si scoală contra a părintsălor, sh-va lji vatămă.

²² Sh-tuts va vă aurască tră numa mea, ma atsel tsi va aravdă pănă tu soni va s-ascapă.

²³ Cându vă s-aĝunească tu un cāsăbă, fudzits tu un altă, că dealieha vă dzăc, că nu va s-bitisits tricănda cāsăbadzili a Israelui ma năinti tsi s-yină Hiljiu a omlui.

²⁴ Uceniclu nu easi prisupru di nvitsătorlu a lui, nitsi servitorlu prisupru di nicuchirlu a lui.

²⁵ Lj-agiundzi a uceniclui si s-facă ca nvitsătorlu a lui, sh-a huzmichearlu ca nicuchirlu a lui. Macă nicuchirlu a casiljei lu acljimară Belzebub, ahântu ma multu va s-lji acleamă ashă atselji a casiljei a lui!

²⁶ S-nu avets frică, că nu ari tsiva anvălită tsi nu s-dizvălească, sh-vără tsiva ascumtu tsi nu va s-facă cunuscută.

²⁷ Atsea tsi mini vă dzăc tu scutidi, dzătsets-u tu lunjină, sh-atsea tsi avdzăts tu ureclji, predicats-u pri citii.

²⁸ Sh-nu vă aspărats di atselji tsi vatămă trupu, ma nu pot s-vatămă suflitul. S-vă aspăratsă ma multu di atsel tsi poati s-sheară suflitul sh-truplu tu Gehenă.

²⁹ Nu s-vindu vahi doi harabelji ti un aspru? Cu tut atsea nitsiunu di elji nu cadî mpadi fără vrearea a Tatălui a vostru.

³⁰ Ma a voauă sh-perilji di capă vă suntu numirati.

³¹ S-nu avets frică! Voi custusits ma multu di multsă harabelji.

³² Tră atsea, caitsido tsi va mărtirisească ti mini năntea a oamnjilor, sh-mini va mărtirisescu năntea a Tatălui a meu, tsi easti tu tseruri.

³³ Ma caitsido tsi va mi aleapid năntea a oamnjilor, sh-mini va lu aleapid năntea a Tatălui a meu tsi easti tu tseruri.

³⁴ S-nu vă minduits că mini am vinit s-aducă pacea pri loc. Nu vinj s-aducă pacea, ma spata.

³⁵ Că mini vinj s-dispartu hiljiu di tatăl, hiljea di muma, sh-nveasta di soacra,

³⁶ sh-neamitsilji a omlui va hibă atselji di casa a lui.

³⁷ Atsel tsi va tatăl, ică mumă ma multu dicât mini, nu easti axiu tră mini. Sh-atsel tsi va hiljiu ică hiljea ma multu dicât mini, nu easti axiu tră mini.

³⁸ Sh-atsel tsi nu ljea crutsea a lui sh-nu yini după mini, nu easti axiu tră mini.

³⁹ Cai va s-tsână bana a lui va u-chargea, ma atsel tsi va u-chargea tră mini va u-află.

⁴⁰ Atsel tsi vă aproachi, mi aproachi mini, sh-atsel tsi mi aproachi mini, aproachi atsel tsi mi ari pitricut.

⁴¹ Atsel tsi aproachi un profit tu numa a profitului, va ljea arăsplata a profitului. Sh-atsel tsi aproachi ndreptul tu numa a ndreptului, va ljea arăsplata a ndreptului.

⁴² Sh-caitsido tsi lj-da di beari un putir di apă aratsi a vărui di aeshti njitsi, tu numa a unui ucenic, dealihea vă dzăc că elu nu va s-chargea pute răsplătirea a lui."

11

Hăbarea di la Ioan Pătidzătorlu

¹ După tsi Isusul bitisi darea a dimândărilor a lui a doisprădzatsi di ucenitsi a lui, fudzi di atsel loc, tră nvitsari sh-tră predicari tu căsăbadzili di Galilea.

² Ioanul, tsi avea avdzăt tu hapsi si zbura di faptili a Hristolui, pitricu doi di ucenitsilji a lui

³ s-lji dzătsea: "Eshti tini atsel tsi prindi s-yin, ică prindi s-ashtiptâm vără altu?"

⁴ Sh-Isusul apândisi a lor: "Imnats shi spunets a Ioanului aesti tsi avdzăts sh-videts:

⁵ Orghilji ma ved, shcljiochilji ma imnă, leprozilji suntu curats, surdzăilji ma avdu, mortsăilji ma s-nyeadză shi evanghelul ma s-preadică la oarfânji.

⁶ Ca hara di atsel tsi nu va si zurlisească di mini!"

⁷ Sh-cându elji ma s-dipărta, Isusul apărnji s-lă dzătsea ali multsămi tră Ioanul: "Tsi vrets s-videts tu irnjii? Călamu tsi lu ascutură vimtul?"

⁸ Cătse avets ishit s-videts? Omlu nviscut cu stranji moali? Ia, atselji tsi si nvescu cu stranji moali băneadză tu pălatili a amiradzilor.

⁹ Atumtsea, cătse ishit afoară s-videts? Un profit? Ie, mini vă dzăc, elu easti ma multu di un profit.

¹⁰ Că aestu easti atsel ti cai easti scriată:

'Ia mini ma vă pitrec anghilu a meu năintea a fatsăljei a ta;

el va u-fac etimu calea a ta năintea a ta.'

¹¹ Dealieha ma vă dzăc: Di atselji tsi suntu amintats di muljearea nu ari ishit pute vără ma mari di Ioan Pătidzătorlu. Ma, ma njiclu tu amirăriljea a tserurilor easti ma mari di elu.

¹² Sh-di tu dzălili al Ioan Pătidzătorlu sh-pănă tora amirăriljea a tserurilor ma s-rebilipseashti sh-rebilji u-arăchescu.

¹³ Tuts Profitsilji sh-Legea au profitipsită pănă la Ioanul.

¹⁴ Sh-macă vrets s-lu aprucheats, elu easti Ilia, tsi va yină.

¹⁵ Cai ari ureclji ti avdzări, si-avdă

¹⁶ Cu cai s-u undzescu aestă ghenereată? Undzeashti cu cilimenilji tsi sta prit pādzi sh-aură a sotsilor a lor

¹⁷ dzăcānda:

‘Noi avem bătut flueara ti voi
ma voi nu giucat;
ahurhim s-văităm
ma voi nu plămsit.’

¹⁸ Vini Ioanul tsi nitsi măca, nitsi bea, sh-elji dzăc: ‘Elu ari un demon.’

¹⁹ Vini Hiljiu a omlui, tsi măca sh-bea sh-elji dzăc: ‘Ia un măcător sh-un biutor, oaspili a taxidarilor sh-a amărtiosilor.’ Ma mintimeniljea easti aspus ndreaptă di la hiljilji a ljei.”

Trei Căsăbadzi Ni-măţunjsiti

²⁰ Atumtsea, Isusul apărni s-vărghească atseali căsăbadzi, iu eara faptă ma multi di thavmatili a lui, că atseali nu eara mitănjusiti, dzăcānda:

²¹ “Ca vai di tini, Corazin! Ca vai di tini, Betsaida! Că, macă tu Tiro sh-tu Sidon va eara faptă thavmatili tsi s-featsir tu voi, di cu chiro va eara mitănjusită cu sac sh-cu chinushi.

²² Tră-atsea mini ma vă dzăc că tu dzua a giudicatăljei, Tiro sh-Sidon va s-giudică cu ma multă lishuredzi dicăt voi.

²³ Sh-tini, Capernaum, tsi ti sculash pănă tu tser, va ti dipunji pănă tu Colasi. Că macă va eara faptă tu Sodoma thavmatili atseali mărili tsi suntu faptă la tini, atsea va eara sh-ază tu aestă dzuă.

²⁴ Tră atsea mini ma vă dzăc că dzua a giudicatăljei a Sodomiljei va s-hibă ma lishor di a tsăia.”

Giuglu al Hristos

²⁵ Tu atsel chiro Isusul apărni sh-dzăsi: “Mini ti alavdu, Tatăl, Domnul a tserlui sh-a loclui, că li ascumsesh aesti lucră a mintimenlui sh-a nvitsatlui, sh-lji li discupirish a njitsilor.

²⁶ Ie, Tată, că ashă ts-arăseashti a tsăia.

²⁷ Itsido nji si easti dată tu mănă di la Tatăl a meu, sh-vără nu lu cunoashti Hiljiu, dicăt mash Tatăl, sh-vără nu lu cunoashti Tatăl, dicăt mash Hiljiu sh-atsel tsi Hiljiu va lji-lu discoapiră.

²⁸ Haidets la mini, tuts voi curmatsi sh-munduitsi, sh-mini va vă dau discurmari.

²⁹ Loats pri voi giuglu a meu shi nvitsats di la mini, că mini escu inimă-moali sh-tapin, sh-voi va aflats arihati tu suflitli a voastri.

³⁰ Că giuglu a meu easti moali shi sartsina a mea easti lishoară!”

12

Isus, Domnul a Sămbătăljei

¹ Tu atsel chiro Isusul ma tritsea ună Sămbătă prit siminăturili cu grăn. Sh-ucenitsilji a lui, agiunji, apărni s-arupă schicuri shi s-li măcă.

² Ma Fariseilji, cându vidzură aestă, lji dzăsiră: “Ia, ucenitsilji a tălji ma facă atsea tsi nu easti volje s-facă sămbăta.”

³ Sh-elu lă dzăsi a lor: “Nu avets căntată că tsi featsi Davidul cându avu foamă, elu sh-atseilji tsi eara cu năsu?

⁴ Elu intră tu casa a Dumnidzălui sh-măcă pănji sămtsăti, tsi nu prindea s-li măca nitsi elu sh-nitsi elji tsi eara cu năsu, dicăt mash preftsălji.

⁵ Ică nu avets căntată tu lege că tu templu, cathe Sămbătă, preftsălji calcă

sămbăta sh-cu tutatsea nu suntu vinovats?

⁶ Sh-mini ma vâ dzăc că aoa easti un ma mari dicăt templu.

⁷ Sh-ma s-avets shtiută că tsi va s-dzăcă: 'Mini voi njilă sh-nu curbani,' nu va aveat condamnat nivinovatsilji.

⁸ Că Hiljiu a omlui easti Domnu sh-a Sămbătăljei."

Vindicarea a Omului cu Măna Uscat

⁹ Deapoea, după tsi s-dipărtă di aclo, Isusul intră tu sinagoga a lor,

¹⁰ sh-ia, aclo eara un bărbat a cui s-eara uscată mână. Elji lu ntribară Isusul, cu scupo tsi s-lu acuza ma napoi: "Easti volje tsi cariva s-vindică dzua di sămbătă?"

¹¹ Sh-elu lă dzăsi a lor: "Easti vără di voi tsi ari ună oai, shi aeastă lji cadu tu groapă dzua di sămbătă, sh-elu nu va u-acatsă shi s-u-scoată afoară?"

¹² Ia ashă, cât ma multu custeadzi omlu di oiaia! Ia, easti volje s-fatsă ghini Sămbătă?"

¹³ Atumtsea elu lji dzăsi a omlui: "Tindi mână a ta!" Elu u-timsi sh-măna a lui s-featsi sănătoasă ca alanta.

¹⁴ Ma Fariseilji, după tsi ishiră afoară, fătsea plan contra a lui cum s-lu vătăma.

¹⁵ Ma cându Isusul nvitsă aestă, fudzi di aclo sh-ună multsămi mari lu urma sh-elu lji vindică tuts.

¹⁶ Sh-lă ordină atselji si nu aspunea cai eara elu,

¹⁷ tra si mplinească tsi eara dzăsă di la prufitlu Isaia tsi dzătsea:

¹⁸ "Ia, huzmichearlu a meu, tsi mini lu alepshu, vrutlu a meu, tu cai mini escu hărsit.

Mini va lu-bag Duhlu a meu pristi năsu sh-elu va aspună ndriptatea la lumea.

¹⁹ Elu nu va si ncaci sh-nitsi va aurlă sh-vără nu va avdă boatsea a lui pri pădzi.

²⁰ Elu nu va lu sarmă călamlu atsel frămtu sh-nu va u-astângă cândila tsi fatsi fum, pănă-cându elu s-nu aibă faptă s-amintă ndriptatea.

²¹ Sh-oaminilji va s-nădăească tu numa a lui."

Blăstemlu a Fariseilor

²² Atumtsea lji adusiră un demonizat, tsi eara orbu sh-mut. Sh-Isusul lu vindică, ashă că elu videa sh-zbura.

²³ Sh-multsămea s-ciudisea sh-dzătsea: "Nacă aestu easti Hiljiu al David?"

²⁴ Ma Fariseilji, cându avdzără aestă, dzăsiră: "Aestu lă aguneashti demonjilji mash cu fuchiia a Beelzebul, printsul a demonjilor."

²⁵ Sh-Isusul, cunuscândă minduirili a lor, lă dzăsi: "Itsi amiră, tsi s-disparti tu năsă, s-dutsi cătră aspărdzeari, sh-itsi căsăbă ică casă, tsi s-disparti tu năsă, nu va si sta multu.

²⁶ Atumtsea, macă draclu aguneashti draclu, elu easti dispărtsătă tu năsă, sh-cum poati sta amirăriljea a lui?"

²⁷ Sh-macă mini agunescu dratsilji cu agiutarea a Beelzebul, cu agiutarea a cui lă agunescu hiljilji a voshtri? Tr-atsea elji va hibă giudicătorlji a voshtri.

²⁸ Ma, macă mini agunescu dratsilji cu agiutarea al Duhlu a Dumnidzâlui, atumtsea amirăriljea al Dumnidzâu ari vinită la voi.

²⁹ Ică, cum poati vără s-intră tu casa a vartoslu shi s-lji fură ayishtearea a lui, ma s-nu lu ari ligată ma năinti vartoslu? Mash atumtsea elu va s-poată s-lji fură casa.

³⁰ Cai nu easti cu mini, easti contra di mini sh-cai nu adună cu mini hărgiueashti.

³¹ Tră atsea mini ma vâ dzâc: Itsi amărtii sh-blăstem va lă si ljeartă a oamnjilor, ma blăstemlu contra a Duhlui nu va lă si ljeartă a lor.

³² Sh-caitsido tsi greashti contra a Hiljilui a omlui va lji si ljeartă, ma atsel tsi greashti contra a Duhlui Sămtu nu va lji si ljeartă nitsi tu aestă etă, nitsi tu atsea tsi va yină.

Pomlu sh-Frutili

³³ Ică fătsets bun pomlu, sh-atumtsea frutlu a lui va s-hibă bun, ică fătsets arău pomlu sh-frutlu a lui va hibă arău. Că pomlu s-cunoashti di frutlu.

³⁴ Pulji di năpărtitsi! Cum putets s-grits ghini, cându hits arăi? Că gura greashti di mplinirea a inimăljei.

³⁵ Omlu atsel bunlu dit ayisteara atsea buna a inimiljei a lui, scoati lucruri buni, ma omlu atsel arăulu scoati lucruri arali dit ayisteara a lui arauă.

³⁶ Ma mini ma vâ dzâc că dzua a giudicatăljei caitsido va da lugurii tră itsi zbor di geaba tsi au dzăsă.

³⁷ Că după zboarili a tali va ti ndriptătseshti, sh-după zboarili a tali va ti condamni.”

Semnul al Iona

³⁸ Atumtsea nescăntsă scribi sh-Farisei lj-dzăsiră: “Nvitsătore, noi vrem s-videm vără semnu di la tini.”

³⁹ Ma elu apândisinda lă dzăsi a lor: “Aestă fară anapudă sh-curună-călcată caftă un semnu, ma vără semnu nu va lji si da, di cât semnul al prufitlu Iona.

⁴⁰ Că, ashă cum Iona armas treî dzăli sh-trei noptsă tu pânticlu a peshtilui atsel marli, ashă sh-Hiljilu a omlui va s-hibă treî dzăli sh-trei noptsă tu inima a loclui.

⁴¹ Bănătorlji di Ninive va si scoală la giudicată deadun cu aestă fară sh-va u-condamnă, că elji s-mitânjiusiră cu predicarea al Iona. Sh-ia, aoa easti un ma mari di Iona.

⁴² Amirăroanlea di sud va si scoală la giudicată deadun cu aestă fară sh-va u-condamnă, că ea vini dit mardzina ma diparti a loclui ti avdzări mintimeniljea al Solomonul sh-ia, aoa easti un ma mari di Salomonul.

⁴³ Tora cându duhlu nicurat ari ishit dit un om, imnă prit locuri fără di apă, căftânda arihati, ma nu u află.

⁴⁴ Atumtsea dzătsi: ‘Va mi tornu la casa a mea, di iu am ishită.’ Ma cându agiundzi u-află goală, cătărsită shi stulsită.

⁴⁵ Atumtsea s-dutsi sh-ljea cu năsu shapti duhuri alti ma arali dicăt elu, tsi intră sh-băneadză aclo. Ashă catandisea di ma napoi a aishtui om s-fatsi ma arău di atsea di ma năinti. Ashă va s-undzească sh-cu aestă fară anapuda.”

Fumealjea al Isus

⁴⁶ Cându Isusul ninga lji grea ali multsămi, ia muma a lui sh-fratsălji a lui ma stătea năfoară sh-căfta si zbura cu năsu.

⁴⁷ Sh-un lji dzăsi: “Ia, muma a ta sh-fratsilji a tălji suntu aclo năfoară sh-vor să zburăscă cu tini.”

⁴⁸ Ma elu apândisinda, lji dzăsi atsilui tsi lji grăi: “Cai easti muma a mea sh-cai suntu fratsălji a melji?”

⁴⁹ Timsi mână a lui cătră ucenitsilji a lui sh-dzăsi: “Ia, muma a mea sh-fratsilji a melji.

⁵⁰ Că caitsido tsi fatsi vrearea a Tatălui a meu tsi easti tu tseruri, nji easti frat, sor sh-mumă.”

13

Parabola a Siminătorului

¹ Tu atsea dzuă, Isusul ishi di la casă shi shidzu ningă amari.

² Multsânji mări s-adunară anvârliga di năsu sh-elu s-alină tu ună varcă shi shidzu, sh-tut populu stătea mprostu mardzina di amari.

³ Sh-elu lă aspusi multi lucrî a lor tu parabolă, dzăcânda: "Ia, un siminător ishi tra s-seamină.

⁴ Iară ma simina, născânti simintsă cădzură ningă cali. Puljilji viniră sh-li măcară.

⁵ Născânti alti cădzură tu un loc chitros, iu nu avea multă tsară, sh-fitrusiră trăoară că nu avea tsară multă.

⁶ Ma cându ishi soarili s-pălră shi s-uscară că nu avea rădătsină.

⁷ Altli cădzură prit schinji, ma schinjlji criscură sh-lji acătsară anasa.

⁸ Ma, atsea simintsă tsi cădzu tu loc bună deadi carpo, ună sută di ori, alanta shaidzâtsi di ori sh-alanta treidzâtsi di ori.

⁹ Cai ari ureclji tră avdzâri, si avdă!"

¹⁰ Atumtsea ucenitsilji s-apruchară la Isus sh-lji dzăsiră: "Cătse lă zburăshi a lor cu parabolă?"

¹¹ Sh-elu apândisinda lă dzăsi a lor: "Că a voauă vă si easti dată s-cunushtets mistiryili a amirăriljei a tserurilor, iară a lor nu lă si easti dată.

¹² Că atsilui tsi ari, va lji si da sh-altă sh-va lji artirisească. Iară a atsilui tsi nu ari, va lji si ljea sh-atsea tsi ari.

¹³ Tră atsea mini lă zburăscu a lor cu parabolă, că vidzândalui nu ved, sh-avdzândalui nu avdu sh-nitsi nu aduchescu.

¹⁴ Ashă tu elji si mlineashti prufitia al Isaia, tsi dzătsi:

*'Voi dealihea va s-avdzăts, ma nu va s-aduchits,
dealihea va s-mutrits, ma nu va s-videts.*

¹⁵ *Că inima a popului ashtui easti ni sâmtsăt,*

elji suntu faptă grelji di ureclji

sh-au ncljisă ocljlji,

tsi s-nu veadă cu oclji

sh-nu avdă cu ureclji,

shi nu giudică cu inima

shi nu s-toarnă,

sh-mini s-lji vindică.'

¹⁶ Ma ca hara di ocljlji a voshtri că ved sh-urecljili a voastri că avdu.

¹⁷ Că alihea vă dzăc că multsă profits sh-ndreptsă vrură s-li veadă atseali tsi voi ma videts sh-nu li vidzură, shi s-li avdu atseali tsi voi avdzăts shi nu li avdzără!

¹⁸ Tră atsea voi aduchits parabola a siminătorului.

¹⁹ Cându vără avdi zborlu a amirăriljei sh-nu lu aducheshti, yini slablu sh-lji arăcheashti atsea tsi eara siminată tu inima a lui. Atsea easti simintsă siminată ningă cali.

²⁰ Shi simintsă tu loclu chitros, easti atsel tsi avdi zborlu sh-lu aproachi trăoară cu harauă.

²¹ Ma, nu ari arădătsină pri năsu sh-easti ti putsân chiro. Cându yinu munduirea ică avinarea tră itia a zborlui, s-apărătseashti trăoară.

²² Shi simintsă cădzut tră schinji easti atsel tsi u-ascultă zborlu, ma nvirinarea a lumiljei aishte sh-arăderili a ayishterilor lji nec zborlu, sh-ea s-fatsi fără carpo.

²³ Ma atsea simintsă tsi cadi tu loc bun, easti atsel cai ascultă zborlu, lu aducheashti sh-da carpo. Sh-un fatsi unăsută di ori, altu shaidzâtsi di ori shi altu treidzâtsi di ori."

Parabola a Ordzului

²⁴ Elu l-pripună a lor un parabolă altă: "Amirăriljea a tserurilor lj-undzeashti a unui om tsi simină simintsă bună tu agrul a lui.

²⁵ Ma, iară oaminjilji ma durnjea, vini neamiclu a lui shi simină ordzu prit grăn sh-fudzi.

²⁶ Cându grănlul criscu sh-featsi carpo s-vidzu sh-ordzul.

²⁷ Sh-huzmichearlji a nicuchirlui a casiljei s-aprucheară la năsu sh-lji dzăsiră: 'Doamne, nu ai siminată simintsă bună tu agrul a tău? Di iu ishi ordzul?'

²⁸ Sh-elulă apândisi a lor: 'Aestă lu ari faptă neamiclu.' Atumtsea huzmichearlji lji dzăsiră: 'Vrei tini s-nidzem shi s-li scutem?'

²⁹ Ma elu dzăsi: 'Nu, că scutânda ordzul, deadun cu năsu va scutets sh-grănlul.

³⁰ Alăsats s-crească deadun până la sitsirari. La chirolu a sitsirariljei va lă dzăc a sitsirătorilor: Adunats ma năinti ordzul, ligats-lu tu mănucilji tra si-u ardem, sh-grănlul băgats-lu tu hămbarea a mea.'"

Parabola a gărnutsul di Sinap sh-a Măeauljei

³¹ Elu lă pripună a lor un parabolă altă dzăcânda: "Amirăriljea a tserurilor lj-undzeashti a unui gărnuts di sinapi, tsi lu ia un om sh-lu seamni tu agrul a lui.

³² El easti ma njică di tuti simintsăli, ma după tsi creashti, easti ma mari dicăt tuti erghili, shi s-fatsi un pom, ahântu cât puljilji a tserlui yin sh-află streahă tu dedzăli a lui."

³³ Elu lă dzăsi a lor ună parabolă altă: "Amirăriljea a tserurilor undzeashti cu măeava tsi u-ljea ună muljeari sh-acatsi aloatlu cu trei misuri mari di fărînă până cându aloatlu s-hibă etimu."

³⁴ Isusul tuti aesti lucruri lă-li dzăsi a mulsănjiilor tu parabolă. Sh-nu lă zbură a lor tsiva fără parabolă,

³⁵ tsi si mplinea tsi eara dzășă di la profitlu:

"Mini va discljid gura a mea prit parabolă

sh-va disvălescu lucrili atseali ascumtili di tu adrarea a lumiljei."

Explicarea a Parabolăljei

³⁶ Atumtsea Isusul, după tsi alăsă mulsănjiili, s-turnă la casă sh-ucenitsilji a lui lji-s-aprucheară sh-lji dzăsiră: "Nă aspună parabola a ordzului dit agru."

³⁷ Sh-elulă apândisinda lă dzăsi a lor: "Atsel tsi seamină simintsă bună easti Hiljiu a omlui.

³⁸ Agrul easti lumea, simintsa atsea buna suntu hiljilji a amirăriljei sh-ordzul suntu hiljilji a arăului.

³⁹ Neamiclu tsi u-ari siminată easti draclu, iară sitsirarea easti bitisita a lumiljei shi sitsirătorilji suntu anghiljilji.

⁴⁰ Ashă cum s-adună ordzul shi s-ardi tu foc, ashă va hibă tu bitisita a lumiljei:

⁴¹ Hiljiu a omlui va pitreacă anghiljilji a lui sh-elji va s-adună dit amirăriljea a lui tuti scandalili sh-atselji tsi facă anapudii

⁴² sh-va lji arucă tu cireaplu a foclui. Aclo va s-aibă plăngu sh-cărtsănirea a dintsălor.

⁴³ Atumtsea ndreptsâlji va strâlutsească ca soarili tu amirâriljea a Tatălui a lor. Cai ari ureclji tră avdzări, si-avdă!”

Trei Paraboli

⁴⁴ “Atumtsea, amirâriljea a tserurilor undzeashti ca ună ayishteari ascumtă tu un agru, tsi un om u-află sh-u ascundi. Di haraua tsi ari, s-dutsi, vindi itsi-ari sh-acumpără agrul atsel.

⁴⁵ Tutashă, amirâriljea a tserurilor undzeashti ca un prămăteftu tsi s-dutsi caftă mǎrgăritări buni.

⁴⁶ Cându află un mǎrgăritar cu mar tinjii, s-dutsi sh-vindi itsi ari sh-lu acumpără.

⁴⁷ Amirâriljea a tserurilor lj-undzeashti tutashă a pleasălei arcată tu amari, tsi adună multi soi di peshti.

⁴⁸ Cându ea easti umplută, piscarilji u-scoată mardzina di amari, shed sh-adun tu coshuri atselji bunilji, sh-lji arucă nclo atselji tsi nu suntu bunji.

⁴⁹ Ashă va s-undzească tu bitisita a lumiljei. Va yină anghiljilji sh-va li dispartă anapudzlji di ndreptsâlji

⁵⁰ sh-va lji arucă tu cireaplu di foc. Aclo va-aibă plāngu sh-cārtsānirea a dintsālor.”

⁵¹ Isusul lă ntribă atselji: “L-aduchit tuti aesti?” Elji lji apāndisiră: “Ie.”

⁵² Sh-elu lă dzăsi a lor: “Tră aestă cathi srib, tsi s-fatsi un ucenic tu amirâriljea a tserurilor lj-undzeashti a unui nicuchir di casă tsi scoati nafoară dit ayishtearea a lui lucrili atseali nali sh-atseali vecclji.”

Nipistipsirea al Nazaret

⁵³ Tora după tsi Isusul lji avea bitisită aesti paraboli, fudzi di aclo.

⁵⁴ După tsi vini tu patria a lui, lji nvitsa oamnjlji tu sinagoga a lor, sh-elji s-ciudisea shi ntriba: “Di iu lj-viniră aishtui aestă mintimenlji sh-aestă puteari ti thavmati?

⁵⁵ Nu easti aestu hiljiu a lemnarlui? Nu s-acljeamă muma a lui Maria, sh-fratsilji a lui Iacov, Iose, Simon sh-Iuda?

⁵⁶ Sh-surârili a lui nu suntu tuti tră noi? Atumtsea di iu lji viniră aishtui tuti aesti?”

⁵⁷ Shi si scandalizea cu năsu. Ma Isusul lă dzăsi a lor: “Un profit nu easti fără tinjisiri, mash dicât tu patria a lui sh-tu casa a lui.”

⁵⁸ Sh-tră itia a nipistipsiriljei a lor, elu nu featsi aclo multi thavmati mări.

14

Moartea al Ioan Pătîdzătorlu

¹ Tu atsel chiro Ierodul, *domnitorul a Galileiljei, avdză ti anamea al Isus,

² sh-lă dzăsi a huzmichearilor a lui: “Aestu easti Ioan Pătîdzătorlu. Elu s-nye dit mortsă sh-tră atsea puterili suprānaturali ma lucreadză la năsu.”

³ Ierodul, lu avea acătsat Ioanul, lji avea băgată prānghili sh-lu avea hăpsinit, tră itia a Irodiadăljei, muljearea al Filipu, fratili a lui.

⁴ Că Ioanul lji dzătsea: “Nu easti volje s-bāneadz cu năsă!”

⁵ Sh-cu tută cā vrea s-lu vătāma, Herodul avea frică di populu tsi lu lugursea Ioanul profit.

⁶ Cându ma si sārbbătorea dzua a amintariljei a Ierodului, hiljea a Ierodiadăljei giucă năntea a oaspitslor shi lj-arisi a Ierodului ahāntu multu,

⁷ cāt elu lji tǎxi a ljei cu spigiurari cā va lji dădea itsi va lji cǎfta.

* 14:1 tetrahul easti numa veacljă.

⁸ Shi ea, pimtă sh-di muma a ljei dzăsi: "Dă-nji aoa, tu ună tăpsii, caplu al Ioan Pătîdzătorlu."

⁹ Amirălu si-nvirină, ma tră itia a spigiurariljei năntea a acljimatsilor tsi eara cu năsu la measă, ordină s-lji lu aduc.

¹⁰ Ashă elu pitricu un tu hapsi s-lji talji caplu al Ioan Pătîdzătorlu.

¹¹ Sh-caplu a lui lu adusiră tu un tăpsii sh-lji-lu deadiră ali feati, shi ea lji-lu deadi ali mumi.

¹² Deapoea viniră ucenitsilji al Ioan, loară truplu a lui sh-lu ngrupară. Atumtsea, elji s-dusiră shi lj-spusiră al Isus.

Multsirea di Protă a Pânjilor

¹³ Căndu Isusul li avdză aesti, s-nchisi di-aclo cu ună varcă shi s-dusi singur tu un loc ermu, sh-multsămea căndu avdză s-dusi după năsu pri cicioari dit căsăbadz.

¹⁴ Sh-Isusul, căndu ishi dit varcă, vidzu ună multsămi mari, avu njilă tră elji sh-vindică atselji tsi eara lăndzitsi.

¹⁵ Deapoea cătră seara ucenitsilji a lui s-aprucheară di năsu sh-lji dzăsiră: "Aestu loc easti ermu sh-oara tricu. Alasă multsămea s-ducă prit hoari tsi s-acumpără tră măcari."

¹⁶ Isusul lă dzăsi a lor: "Nu easti ananghi si s-ducă. Dats-lă voi s-măcă!"

¹⁷ Sh-elji lji dzăsiră: "Noi aoa nu avem altă tsiva dicăt tsintsi pânji sh-doi peshti."

¹⁸ Sh-elu lă dzăsi: "Adutsets-li aoa la mini."

¹⁹ Atumtsea lă ordină multsânjili tsi s-sheadă mpadi pri iarbă. Deapoea lo tsintsi pânjili sh-doi peshtili sh-după tsi sculă ocljilji cătră tser, ghinucivântă, li pârtsă pânjili sh-li deadi a ucenitsilor, sh-ucenitsilji a multsânjilor.

²⁰ Sh-tuts măcară shi s-fânătră. Deapoea ucenitsilji adunară băcătsili tsi armasiră sh-umplură doisprădzatsi di coshuri mplini.

²¹ Sh-atelji tsi măcară eara anvârliga di tsintsi njilji di bărbăts, ni misurat muljerili sh-cilimenjilji.

Isusul Imni pristi Apă

²² Trăoară după aestă Isusul lă ordină ucenitsilji a lui s-intră tu varcă shi s-arucă di napărți, pănă-căndu elu lji alasă multsânjili.

²³ După tsi alăsă multsămea s-fugă, s-alină singur pri munti si s-roagă. Sh-căndu tunică elu eara aclo singur dip.

²⁴ Tu aestă oară varca eara tu mesea di amari, shi s-plăscănea di vâljurili că vimtul eara contra.

²⁵ Cătră apirită, Isusul s-dusi aproapi di năshi, imnănda pri amari.

²⁶ Ucenitsilji vidzănda elu imnănda pri amari, ahurhiră s-aurlă di frică sh-dzăsiră: "Easti vără fantamă!"

²⁷ Ma trăoară Isusul lă grăi a lor: "Arihătipsits-vă! Mini escu, s-nu avets frică!"

²⁸ Sh-Petrul, apândisinda dzăsi: "Doamne, macă eshti tini, mi ursea s-yin la tini pri apă!"

²⁹ Elu lj-dzăsi: "Haidi!" Sh-Petrul dipună dit varcă sh-imnă pri apă, s-nidzea la Isusul.

³⁰ Ma, vidzănda că vimtul eara vartos, avea frică, sh-ahurhinda s-afundă, aurlă: "Doamne, ascapă-mi!"

³¹ Sh-Isusul lj-timsi trăoară măna, lu acătsă shi lj-dzăsi: "Om putsănpistimen, cătse fushi nisigur?"

³² Apoea, căndu intrară tu varcă, vimtul păpsi.

³³ Atumtsea elji tsi eara tu varcã si ncljinarã la nãsu, dzãcãnda: "Dealihea tini eshti Hiljiu a Dumnidzãlui!"

³⁴ Apoea, dupã tsi agiursirã tu alantã partã, vinirã tu loclu a Ghenezaretlui.

³⁵ Sh-oamnjlji atsilui loc, macãt lu cunuscurã, lu arãspãndirã zborlu tu tutã loclu di anvãrliga. Sh-adusirã la elu tutsã nipututsilji.

³⁶ Shi-l pãracãlsirã tsi s-putea s-bãga mãna tu mardzina a stranjului a lui, shi tuts atselji tsi bãgarã mãna la stranji s-vindicarã.

15

Adetsili a Protsilor

¹ Atumtsea scriblji sh-Fariseilji vinirã di Ierusalim la Isusul sh-lu ntribarã:

² "Cãtse ucenitsilji a tãlji ncalcã adetea a aushlor? Cã nu aspealã mãnjili nãinti tsi s-mãcã."

³ Iarã elu lã apãndãsi a lor: "Sh-voi trã tse ncãlcats ordinlu a Dumnidzãlui trã adetea a voastrã?"

⁴ Dumnidzãlu ari ordinatã ashã: 'Tinjisea tatãl sh-muma,' shi: 'Atsel tsi va blãsteam tatãl sh-muma s-condamnã cu moarti.'

⁵ Iarã voi dzãtsets: Caitsido tsi lj-dzãtsi a tatãlui sh-a mumãllei: 'Itsido tsi aveam trã tini, lji easti datã a Dumnidzãlui.'

⁶ elu nu easti ma strimtu s-tinjiseascã tatãl sh-muma a lui. Ashã voi avets dispretsuit zborlu a Dumnidzãlui trã adetea a voastrã.

⁷ Ipucrits, ghini prufitipsi Isaia trã voi cãndu dzãsi:

⁸ 'Populu aestu ma nji s-aproachi cu gura*
sh-mi tinjiseashti cu budzili,
ma inima a lor easti diparti di mini.

⁹ Sh-di geaba mi tinjiseascã,
nvitsãnda nvitsãturili tsi suntu regulili a oamnjlilor.' "

¹⁰ Deapoea acljimã multsãmea aproapi di nãsu sh-dzãsi: "Ascultats sh-aduchits!

¹¹ Omlu nu s-lãvusheashti di atsea tsi lj-intrã n-gurã, ma di atsea tsi lj-easi dit gurã s-lãvusheashti."

¹² Atumtsea ucenitsilji a lui s-apruchearã shi lj-dzãsirã: "Lu shtii cã Fariseilji, cãndu li avdzãrã aesti zboari sã scandalizarã?"

¹³ Ma elu apãndisinda lã dzãsi: "Itsi simintsã tsi Tatãl a meu tserescu nu ari siminatã, va si scoatã cu arãdãtsinã.

¹⁴ Alãsats-lji atselji! Elji suntu orghi, cãlãuzlji a orghilor. Macã un orbu lj-cãlãudzãshti a un altu orbu, doilji va s-cadã tu groapã."

¹⁵ Atumtsea Petrul lj-dzãsi: "Nã aspunã sh-a noauã aestã parabolã."

¹⁶ Sh-Isusul dzãsi: "Sh-voi nu avets achicãsit ninga?"

¹⁷ Nu aduchits cã itsi intrã tu gurã treatsi tu pãnticã sh-dutsi tu duvaleti?

¹⁸ Ma atseali tsi easã dit gurã, easã dit inimã, sh-atseali lãvusheascã omlu.

¹⁹ Cã dit inimã easã minduirili atseali arali, vãtãmãrili, ncãlcarea a curuniljei, putãnsira, furãrili, mãrtiriili arãdioasi, blãstimãrili.

²⁰ Aesti suntu atseali tsi lãvushescu omlu. Iarã s-mãtsã cu mãnjili niaspilati nu s-lãvushãshti omlu."

Pistea a Muljeartiljei Pãngãnã

²¹ Deapoea Isusul, dupã tsi s-dipãrtã di aclo, s-nchisi cãtrã pãrtsãli a Tirlui sh-a Sidonlui.

²² Sh-ia, ună muljeari Cananeancă tsi avea vinit dit atseali părtsi, ahurhii s-aurlă dzăcânda: "Njiluia-mi mini, Doamne, Hiljiu al David! Feata a mea easti multă arău, easti demonizat!"

²³ Ma elu nu lî-apândisi dip. Sh-ucenitsilji a lui lji s-aprucheară sh-lji si părăcâlsiră dzăcânda: "Sălăghea-u atsea, că ma aurlă după noi."

²⁴ Ma elu lă apândisi: "Mini escu pitricut, mash di oili atseali chiruti a casiljei al Israel."

²⁵ Ma ea vini shi si ncljină, dzăcânda: "Doamne, agiută-mi!"

²⁶ Isusul apândisi: "Nu easti ghini s-ljeai pânea a cilimenjilor shi s-lu arutsă la cătsălji a cānjilor."

²⁷ Ma ea dzăsi: "Easti alihea, Doamne, că sh-cătsălji a cānjilor măcă sārāmili tsi cadă di la measa a nicuchirilor a lor."

²⁸ Atumtsea Isusul lî-apândisi dzăcânda: "Muljeari, mari easti pitea a ta! Si s-facă ashă cum vrei." Sh-tu atsea oară hiljea a ljei s-vindică.

Multsirea a Doauă a Pānjilor

²⁹ Deapoea, după tsi s-nchisi di aclo, Isusul vini ningă amarea a Galileiljei, s-alină pri munti shi shidzu aclo.

³⁰ Shi lji s-aprucheară multsānji mări tsi adutsea cu nāshi shcljiochi, orghi, sēcats, muts, sh-multsă altsă, lji băgară la cicioarli al Isus sh-elulji vindică.

³¹ Multsānjili s-ciudisea cāndu videa că mutsālji grea, sēcatsālji s-vindica, shcljiochili imna sh-orghilji videa. Sh-mărea Dumnidzālu al Israel.

³² Sh-Isusul lî-acljimă ucenitsilji a lui ningă nāsu sh-lă dzăsi: "Mini am njilă di multsāmea, că s-featsiră trei dzālī tsi sta cu mini shi nu ari tsiva ti măcari. Nu voi s-lji nchisescu agiunji, s-nu lishineadză n-cali."

³³ Sh-ucenitsilji a lui lji dzăsiră: "Ma iu va s-află tu aestă loc ermu ahānti pānji tra s-fānātească ună multsāmi ahāntu mari?"

³⁴ Sh-Isusul lă dzăsi a lor: "Cāti pānji avets?" Elji dzăsiră: "Shapti shi ndoi peshti njitsi."

³⁵ Atumtsea elu ordină multsānjili s-sheadă mpadi.

³⁶ Deapoea lo atseali shapti pānji sh-peshtilji, shi hāristisi Dumnidzālu, li părtsă, sh-li deadi a ucenitsilor a lui sh-elji a multsāmiljei.

³⁷ Sh-tuts măcară shi s-fānātiră, sh-cu bucātsili tsi armasiră umplură shapti coshuri mplini.

³⁸ Sh-atselji tsi măcară eara patru njilji di bārbats, ni misurat muljerili sh-cilimenjilji.

³⁹ Deapoea, după tsi deadi cali a multsāmiljei, s-alină tu varcă shi s-dusi cātră loclu Magdala.

16

Maiaua a Fariseilor

¹ Deapoea lji s-aprucheară Fariseilji sh-Saduceilji tsi s-lu cārtească Isus shi lî-căftară s-lă aspuṇă un semnu dit tser.

² Iară elu lă apândisi a lor: "La seară voi dzătsets: 'Va hibă chiolu bun, că tserlu easti roshu.'"

³ Sh-dimineatsa dzătsets: 'Ază va hibă furtună, că tserlu easti roshu sh-nurat.' Voi shits s-aduchits fatsa a tserlui, ma nu putets s-aduchits seamnili a chiolui.

⁴ Ună gherenată anapudă sh-cārună-cālcată cafti un semnu, ma nu va lji si da vāră semnu dicāt mash semnul a prufitului Iona." Sh-elulji alāsă sh-fudzi.

⁵ Cându učenitsilji a lui agiumsiră tu alantă parti a amariilei, vidzură că avea agărshită s-ljea pāni.

⁶ Iarā Isusul lă dzāsi a lor: "Băgats mintea sh-afrits-vă di maeaua a Fariseilor sh-a Saduceilor!"

⁷ Sh-elji s-minduiră un cu alantu dzăcānda: "Nu avem loatā pāni."

⁸ Ma Isusul lji achicāsi sh-lă dzāsi a lor: "Oaminji pisti-putsān, trā tse zburats un cu alantu că nu avets loat pāni?"

⁹ Nu avets achicāsīt nīnga sh-nu adutsets aminti tsintsi pānji ti tsintsi njilji di bārbats sh-cāti coshuri avets umplutā?

¹⁰ Sh-nitsi atseali shapti pānji ti patru njilji di bārbats sh-cāti coshuri avets umplut?

¹¹ Cum nu aduchits că nu lu aveam zborlu ti pānea cându vā dzāshā s-vā afrits di maeaua a Fariseilor sh-a Saduceilor?"

¹² Atumtsea elji aduchiră că elu nu lă avea dzāsā s-afireascā di maeaua a pāniljei, ma di nvitsătura a Fariseilor sh-a Saduceilor.

Aspunearea al Petru

¹³ Cându Isusul, agiumsi tu loclu a Cezariljei al Filip lă ntribā učenitsilji a lui: "Cai dzăc oaminjilji că easti Hiljiu a omlui?"

¹⁴ Sh-elji dzāsiră: "Niscātsā dzăc că easti Ioan Pātidzătorlu, altsā Ilia, altsā Ieremia, icā un di prufitsilji."

¹⁵ Elu lji ntribā elji: "Ma voi, cai dzătsets că escu mini?"

¹⁶ Sh-Simon Petrul apāndisi: "Tini eshti Hristolu, Hiljiu a Dumnidzālui atsilui yiului."

¹⁷ Ma Isusul lj-apāndisi a lui: "Hārăcop eshti tini, Simon, hiljiu al Iona, că aestā nu ts-lu dizvāli nitsi truplu nitsi sândzili, ma Tatāl a meu tsi easti tu tseruri."

¹⁸ Sh-mini ma tsā dzăc tutashā că tini eshti Petrul, tsi va s-dzăc cheatra pri cai mini va s-adarā bisearica a mea sh-portsāli a colasiljei nu va u-azvingu.

¹⁹ Sh-mini va tsā dau cljeili a amirāriljei a tserurilor. Sh-itsi ai ligat pri loc, va hibā ligat pri tseruri, sh-itsi ai dizligat pri loc, va hibā dizligat tu tseruri."

²⁰ Atumtsea lă ursi učenitsilji a lui tsi s-nu dzătsea a vārui că elu eara Hristos.

²¹ Di atsea oarā Isusul ahurhi s-lă aspunā a učenitsilor a lui că prindi s-dutsea la Ierusalim, s-munduea multā ti itia a aushilor, a mārilor a preftsilor sh-a scribilor, că lipseashti si s-vătāma sh-va s-nyea a treia dzuā.

²² Atumtsea Petrul lo di unā parti sh-ahurhi s-lu vārgheascā dzăcānda: "Doamne, s-ti afireascā Dumnidzālui! Aestā nu va s-undzeascā pute!"

²³ Ma elu s-turnā shi lj-dzāsi a Petrului: "Dipārteadzā-ti di la mini, Drac! Tini eshti cicārdisirī ti mini, că nu ai tu minti lucrili a Dumnidzālui, ma lucrili a oamnjlilor."

Tsānerea a Crutsiljei

²⁴ Atumtsea Isusul lă dzāsi a učenitsilor a lui: "Macā vārā va yinā dupā mini, si s-aleapidā, s-u ljea crutsea a lui shi s-mi urmeadzā.

²⁵ Că atsel tsi va ascapā bana a lui, va u-chargeā, ma atsel tsi va u-chargeā bana a lui trā mini, va u-aflā atsea.

²⁶ Tsi amintatic ari omlu macā amintā lumea tutā sh-deapoea u-chargei suflitlu a lui? Icā tsi poati s-da omlu trā alăxirea a suflitlui a lui?

²⁷ Că Hiljiu a omlui va yinā tu mārirea a Tatālui a lui deadun cu anghiljilji a lui, sh-atumtsea elu va lji arāsplăteascā a-cathiunu dupā faptili a lui.

²⁸ Dealieha vâ dzâc că niscântșă di atseltji tsi ma sta aoa nu va moară ni vidzută ma năinti Hiljiu a omlui yininda tu amirârîljea a lui.”

17

Fănirusirea al Isus

¹ După shasi dzâlî Isusul lo cu năsu Petrul, Iacovul, sh-Ioanul fratili a lui, sh-lji alinâ pri un munti analtu dinâparti.

² Shi s-alăxi năntea a lor. Lji si strălutsi fatsa ca soarili shi stranjili a lui s-featsiră albă ca lunjina.

³ Sh-ia, lă si fănirusiră a lor Moisul sh-Ilia tsi zbura cu năsu.

⁴ Atumtsea Petrul lji dzâsi al Isus: “Doamne, easti ghini tsi noi him aoa. Ma s-vrei, mini va fac aoa trei tendi, ună tră tini, ună tră Moisul sh-ună tră Ilia.”

⁵ Cându elu zbura ninga, ia un nior lunjinos lă amvâli sh-dit nior s-avdză ună boatsi tsi dzâtsea: “Aestu easti Hiljiu a meu vrut, di la cai escu hărisit, ascultats-lu!”

⁶ Ucenitsilji cându u-avdzără aestă, cădzură pri dintsă mpadi shi s-aspărară multu.

⁷ Sh-Isusul s-apruche, băgă mână pri năshi sh-lă dzâsi: “Sculats-vă sh-nu vâ aspărats!”

⁸ Sh-elji sculânda ocljilji, nu vidzură om, mash Isusul singur.

⁹ Deapoea cându ma dipuna dit munti, Isusul lă ursi dzăcânda: “S-nu lji grits a vârui tră atsea viziună până cându Hiljilu a omlui s-nyeadză dit mortsă.”

¹⁰ Atumtsea ucenitsilji a lui lu ntribară: “Cătse scriblji dzăc că prindi s-yină ma năinti Ilia?”

¹¹ Sh-Isusul lă apândisi: “Dealieha că Ilia va s-yină ma năinti sh-va adară napoi itsido.

¹² Ma mini vâ dzăc, că Ilia ari vinită sh-elji nu lu cunuscură, ma featsiră cu năsu cum vrură. Ashă că Hiljiu a omlui va s-munduească di la năshi.”

¹³ Atumtsea ucenitsilji lu aduchiră că lă avea sburătă di Ioan Pătidzătorlu.

Vindicarea a Ficiorlui Demonizat

¹⁴ Cându elji viniră aproapi di multsămea, un bărbat s-apruche sh-dzinucljânda năntea a lui,

¹⁵ dzâsi: “Doamne, s-ai nîlă di hiljiu a meu că easti epileptic, tradzi multu sh-di multi ori cadi tu foc ică tu apă.

¹⁶ Tora mini lu-dush la ucenitsilji a tălji, ma elji nu putură s-lu vindică.”

¹⁷ Sh-Isusul apândisinda, dzâsi: “O fără fără pisti sh-anapudză! Până cându va armănă cu voi? Până cându va vâ aravdă?” Adutsets-lu aoa la mini!

¹⁸ Sh-Isusul lu vărghi demonul sh-elu ishi di ficiorlu, sh-di atsea oară ficiorlu s-vindică.

¹⁹ Atumtsea ucenitsilji lji s-aprucheară al Isus dinâparti, sh-lu ntribară: “Cătse noi nu putum s-lu ağunim?”

²⁰ Sh-Isusul lă dzâsi a lor: “Di pistipsirea njiacă a voastră. Că dealieha mini ma vâ dzăc: ma s-avets pisti căt un gărnutsă di sinapi va lji dzătsets a muntelui aishtui: ‘Mută-ti di aoa aclo,’ sh-elu va si s-mută. Sh-tsiva nu va hibă niputut di voi.

²¹ [Sh-aestu soi di demon nu easi di căt mash cu părăcălsiri sh-cu päreasinj.]”

Isusul Prividzu di a Doaua Oară Moartea a Lui

²² Cându elji s-afla tu Galilea, Isusul lă dzăsi: "Hiljilu a omlui va s-prida tu mănjlji a oamnjilor,

²³ sh-va s-lu vatâmă, sh-tu dzua a treia va s-nyeadză." Sh-elji s-nvirinară multu.

Plătirea a Taxiljei

²⁴ Cându agiumsiră tu Capernaum, taxidarlji a doauă dhrahmiilor a tempului lji s-aprucheară a Petrului, shi lji dzăsiră: "Nvitsătorlu a vostru nu u plăteashti taxa a tempului?"

²⁵ Sh-elu dzăsi: "Te!" Sh-cându intră n-casă, Isusul lu ashtiptă prota s-lji dzătsea: "Cum mindueshti tini Simon? Di la cai ljea taxili ică hărăcli amirărilji a loclui? Di la hiljlji a lor ică di la xenjlji?"

²⁶ Petrul lji dzăsi: "Di la xenjlji." Isusul dzăsi: "Hiljlji atumtsea nu prindi s-plătescu.

²⁷ Cu tut atsea tsi s-nu lji cicărdism atselji, du-ti la amari, arucă greplu sh-ljea protlu pescu tsi va yină nsus, ljea-lu, discljid-lji gura, sh-va s-aflji un statiru. Ljea-lu sh-plătea taxa a lor ti tini sh-ti mini."

18

Ma Marli tu Amirăriljea a Tserlui

¹ Tu atsea oară ucenitsilji s-aprucheară a Isusului sh-lu ntribară: "Cai easti cama marli tu amirăriljea a tserurilor?"

² Sh-Isusul după tsi acljimă un cilimean njic ningă năsu, lu băgă namisa di năshi,

³ sh-dzăsi: "Dealihea ma vă dzăc, macă nu vă alăxits sh-nu vă fătsets ca cilimenjlji atselji njitsilji, voi nu va s-intrats pute tu amirăriljea a tserurilor.

⁴ Cai va si s-apleacă ca aestu cilimean njic, easti cama marli tu amirăriljea a tserlui.

⁵ Sh-caitsido tsi lu aproachi un cilimean njic ca aestu tu numa a mea, mi aproachi mini.

⁶ Ma atsel tsi va s-fac s-cadă tu amărtii un di aeshti njitsilji, tsi pistipsescu la mini, va hibă ma ghini tră năsu s-lji spindziră di gushi ună cheatră di la moară, shi si s-neacă tu apa a amariljei.

⁷ Cavai di dunjeaua tsi fatsi oamnjilji s-cadă tu amărtii. Că cicărdisirili va s-yină, ma cavai di atsel om, tsi tră sibepea a lui va yină atseali cicărdisirili!

⁸ Tora macă mână a ta, ică ciciorlu a tău ti cicărdiseashti tră amărtii, talji-l sh-arucă-l diparti di tini. Easti ma ghini s-intsri tu bană fără ună mână ică scljiopu, di cât s-ai doauă mănji sh-doauă cicloari shi s-ti arucă tu foclu di totăna.

⁹ Tutashă, macă ocljiu a tău si cicărdiseashti tră amărtii, scoati-l sh-arucă-l diparti di tini. Că easti ma ghini s-intsri cu un ocljiu tu bană, di cât s-ai doi oclji shi s-ti arucă tu foclu a Geehenăljei.

¹⁰ Afirts-vă s-nu dispretsuits vără di aeshti njitsilji, că mini ma vă dzăc că anghilji a lor tu tseruri mutrescu totăna fatsa a Tatălui a meu tsi easti tu tseruri.

¹¹ [Că Hiljiu a omlui vini ti ascăpari atsea tsi eara chirută.]*

¹² Cum minduits? Macă un om ari ună sută di oi, sh-ună di năsi cheari cala, nu va s-li alasă di noaudzătsi nouăli pri munti, shi s-caftă atsea tsi chiru cala?

¹³ Sh-cându va u află, dealihea vă dzăc că elu va s-hărsească ma multu ti aestă dicăt di noaudzătsi noauli, tsi nu avea chirută cala.

* **18:11** atselu stih nu s-află tu alanti manuscrisi

¹⁴ Ashă easti vrearea a Tatălui a vostru tsi easti tu tseruri, tsi vără di aeshti njitsilji s-nu cheară.

Nvitsătura di Ljirtari

¹⁵ Macă fratili a tău amărtirseashti contra tini, duti sh-vărghea-lu cându hits singur voi doilji, macă ti ascultă, tini lu amintash fratili a tău,

¹⁶ macă nu ti ascultă, ljea cu tini ninga un ică doi oaminji, tsi cathi zbor si siguripseacă pri gura a doi ică a trei martiri.

¹⁷ Macă deapoea arniseashti s-ti ascultă, dză-lji a-bisearicăljei, sh-macă arniseashti s-ascultă sh-bisearica, prilucratsts-lu ca pângân ică taxidar.

¹⁸ Dealieha vâ dzăc că tuti lucrili tsi va avets ligat pristi locu, va s-hibă ligati sh-tu tser, sh-tsi avets dizligat pri locu, va s-hibă dizligati sh-tu tser.

¹⁹ Ma vâ dzăc tutashă, că macă doi di voi s-uidisescu pri loc tră itsido tsi caftă, aestă va si s-facă a lor di la Tatăl a meu tsi easti tu tseruri.

²⁰ Că, iutsido tsi doi ică trei suntu adunatsi tu numa a mea, mini escu aclo namisa di elji."

²¹ Atumtsea Petrul s-apruche la Isusul sh-lji dzăsi: "Doamne, macă fratili a meu amărtirseashti cătră mini, câti ori prindi s-lu ljeartă? Până di shapti ori?"

²² Isusul lji-dzăsi: "Mini nu tsă dzăc până di shapti ori, ma până shaptidzătsi di ori câti shapti.

²³ Tră atsea, amirăriljea a tserurilor undzeashti ca un amiră tsi vrea s-fătsea lugurili cu husmichearli a lui.

²⁴ După tsi apărni s-fătsea luguri, lj-adusiră un tsi lj-mprumuta dzatsi njiljă di talentsă.

²⁵ Sh-metsi aestu nu avea tsi s-plătea, nicuchirlu a lui ursi si s-vindea elu cu muljeara a lui, cilimenilji a lui, sh-tuti tsi avea, shi s-plătea mprumutlu.

²⁶ Atumtsea huzmichearlu lj-cadzu pri dzinuclji sh-lji părăcâlsea, dzăcânda: 'Doamne, s-ai arăvdari cu mini sh-mini va s-li plătescu tuti!'

²⁷ Nicuchirlu lu njilui huzmichearlu a lui, lji lu ljirtă mprumutlu shi lu-alăsă.

²⁸ Ma huzmichearlu atsel cum ishi, află un altă huzmichear tsi lji-avea ti dari ună sută di denari. După tsi lu acătsă di grumadză ma lu sgruma, dzăcânda-lji: 'Plătea-nji mprumutlu tsi nj-ai.'

²⁹ Atumtsea huzmichearlu sotslu a lui, cādzu pri dzinuclji shi lji părăcâlsi, dzăcânda-lji: 'Ai arăvdari cu mini, sh-va li plătescu tuti.'

³⁰ Ma elu nu vru, meti lu băgă tu hapsi, până cându elu s-plătea mprumutlu.

³¹ Ma alantsă husmicheari, cându lu vidzură tsi s-featsi, s-nvirinară shi s-dusiră lji dzăsiră a nicuchirlui a lor tută tsi s-area faptă.

³² Atumtsea nicuchirlu a lui lu acljimă shi lj-dzăsi: 'Husmichear arău, mini ts-ljirtai tută aestu mprumut, că tini mi-părăcâlsishi.

³³ Nu lipsea sh-tini s-aveai njilă tră sotslu a tău, ashă cum avui mini njilă tră tini?'

³⁴ Sh-nicuchirlu a lui, nărită, lu prideadi atsel tu mănă a tirănsitorilor, până cându s-plătea tut mprumutlu.

³⁵ Ashă va s-facă cu voi sh-Tatăl a meu tserescu, macă cathi un di voi nu lu ljearti cu tută inimă fratili a lui."

19

Dispărtsări

¹ După tsi Isusul li ascăpă ti aspuneari aesti nvitsături, s-nchisi di Galilea, sh-vini tu loclu a Iudeiliei, napărți di Iordan.

² Multsânji mări l-urma sh-elu lji vindică aclo.

³ Atumtsea lji s-aprucheară niscăntsă Farisei s-lu cărtea, sh-lji dzăsiră: "Easti tu lege tsi bărbatul s-u dispartă muljearea di itsido sibepi?"

⁴ Sh-elu apândisinda lă dzăsi a lor: "Nu avets cântată că atsel tsi lji adră di tu ahurhită 'lji adră mascru sh-theamină.'

⁵ Sh-Dumnidzălu dzăsi: *'Tră aestă bărbatul va s-alasă tatăl sh-muma a lui sh-va si s-mpriuneadză cu muljearea a lui, sh-amindoilji va hibă un trup singur?'*

⁶ Sh-ashă elji nu suntu ma doi, ma un trup. Atsea tsi Dumnidzălu ari mpriunată, omlu s-nu lu dispartă."

⁷ Elji lji dsăsiră: "Atumtsea cătse Moisiul ursi s-lji si da cartea di dispărtsări shi si-u alasă."

⁸ Elu lă dzăsi a-lor: "Moisiul vă deadi volje s-li dispărtsăts muljerili a voastri tră itia a chitrisiriliei a ininilor a voastri. Ma tu ahurhită nu eara ashă.

⁹ Ma mini vă dzăc că caitsido tsi u-alasă muljerea a lui, mash tră sibepea a putănsiriliei, shi si nsoari cu ună altă, ncalcă curuna. [Sh-atsel tsi si nsoari cu muljeari alăsată, ncalcă curuna.]"*

¹⁰ Ucenitsilji a lui lji dzăsiră: "Macă cunditsili a bărbatului cătră muljearea suntu ahtări, ma ghini si nu si nsoară dip."

¹¹ Ma elu lă dzăsi a lor: "Nu tuts lă aduchescu aesti zboari, ma singur atselji a cui lă easti dată.

¹² Suntu eunuchi†, tsi suntu amintats ashă di pânticlu a mumăliei, shi suntu eunuchi tsi suntu faptă di la oaminji, shi suntu eunuchi tsi au apofăsită singur si s-faca eunuchi tră amirăriliei a tserurilor. Atsel tsi poati s-aduchească, s-aduchească."

Isusul Ghinievăteadzi Cilimenilji

¹³ Atumtsea adusiră cilimenji njitsi la Isusul trai s-băga mănili pri năshi, shi s-părăcâlsea, ma ucenitsilji a lui lji vărghiră atselji.

¹⁴ Ma Isusul dzăsi: "Alăsats cilimenilji atselji nitsilji s-yină la mini sh-nu li nchidicats, că a lor easti amirăriliei a tserurilor."

¹⁵ Atumtsea elu băgă mănili pri elji, sh-deapoea s-nchisi di aclo.

Avutlu Tinir

¹⁶ Sh-ia, s-apruche un la Isusul sh-lu ntribă: "Nvitsătore, tsi buneatsă prindi s-fac tsi s-amintă bana eternă?"

¹⁷ Sh-elu dzăsi: "Cătse mi ntregghi tsi easti bun? Singur Un easti bun. Macă vrei s-intsri tu bană, veaghlji dimândărili."

¹⁸ Elu ntribă: "Cai?" Atumtsea, Isusul lji-apândisi: "Nu vatămă, nu ncalcă curunea, nu fură, nu dă martirii arădioasă,

¹⁹ tinjisea tatăl a tău sh-muma a ta, shi s-vrei aproapilu a tău ca cum ti vrei tini."

²⁰ Tinirlu lji-dzăsi: "Tuti aesti lucră mini li am vigljetă. Tsi nji lipseashti altă?"

19:4 Ahr 1:27; 5:2. **19:5** Ahr 2:24. **19:7** Det 24:1-4. * **19:9** nu să află tu altă manuscrisi

† **19:12** eunuchi sântu atselji oaminji tsi nu poată si nsoară shi nu poată s-facă cilimenji.

²¹ Isusul Ij-dzâsi: "Macă vrei s-hii perfectu, duti sh-vindi tsi ai, sh-dă-li a niavutsilor; shi tini va s-ai un ayishteari tu tser. Deapoea haidi sh-urmeadz-mi."

²² Ma tinirlu cându li avdză aesti zboari, fudzi nvirinat, că avea multă averei.

²³ Atumtsea, Isusul lă dzâsi a ucenitsilor a lui: "Dealihea vâ dzăc că un avut cu zori va s-intră tu amirăriljea a tserurilor."

²⁴ Sh-năpoi ma va dzăc: Easti ma lishioară tsi s-treacă cămila tu guva a aclui, dicăt avutlu s-intră tu amirăriljea a Dumnidzâului."

²⁵ Cându li avdză ră aesti zboari, ucenitsilji a lui s-ciudisiră multu shi ntribară: "Atumtsea, cai va s-ascapă vahi?"

²⁶ Sh-Isusul mutrinda câtră năshi dzâsi: "Tră ominjilji aestă easti niputută, ma tră Dumnidzâulu itsido easti putut."

²⁷ Atumtsea Petrul Ij-apândisi: "Ia, noi li alăsăm tuti sh-vinim după tini, ma tsi va s-amintăm noi?"

²⁸ Sh-Isusul lă-dzâsi a lor: "Dealihea ma vâ dzăc, tu adărătura atsea noaua, cându Hiljiu a omlui va sheadă pri thronlu a mairiljei a lui, sh-voi tsi mi avets urmat va shidets pi doisprădzatsi thronuri ti guidicari di doisprădzatsi fărili a Israelui."

²⁹ Sh-caitsido tsi ari alăsat tră numa a mea căsi, fratsi, surări, tată, muma, [muljeari]*, cilimenji, agri, va s-ljea ună sută di ori ma multu, sh-va aibă bană eternă.

³⁰ Ma multsă di protslji va hibă tu coadă, sh-atselji di tu coadă va hibă protslji."

20

Parabola cu Lucrutorilji

¹ "Amirăriljea a tserurilor undzeashti cu un nicuchir di casă tsi ishi curund dimineatsa s-puituea lucrutori ti ayinjea a lui.

² După tsi s-ndreapsi tu pâzari cu lucrutorilji câti un dinar n-dzuă, lji pitricu la ayinjea a lui.

³ Apoea ishi anvărliga di oara noauă dimineatsa, sh-vidzu altsă tsi stătea tu pâzari fără lucru.

⁴ Sh-lă dzâsi a lor: 'Dutsets-vă sh-voi la ayinjea a mea sh-mini va vâ dau câtă easti ndreptul.'

⁵ Sh-elji s-dusiră. Elu ishi anvărliga di njeadzădză sh-pi trei ti-mirindi, featsi ună soi.

⁶ Cându ishi năpoi câtră oara tsintsi ti-mirindi, află altsă tsi stătea ni fără lucru, sh-lji ntribă: 'Cătse shidets aoa tută dzua ni faptă tsiva?'

⁷ Elji lji dzăsiră: 'Că vără nu nă puitui.' Sh-elu lă dzâsi a lor: 'Dutsets-vă shi voi la ayinji.'

⁸ Cându vini seara, nicuchirlu a ayinjljei, lji dzâsi a administratorlui a lui: 'Acljeamă lucrutorilji shi fă plătirea a lor, apărnjida di la atselji di ma năpoi sh-pănă la atselji di prota.'

⁹ Sh-cându viniră atselji di la oara tsintsi, loară câti un dinar cathiunu.

¹⁰ Cându viniră protslji, minduiră că va loa ma multu, ma sh-atselji loara câti un dinar cathiunu.

¹¹ Luândă, murmurea contra a nicuchirlui a casiljei,

¹² dzăcândă: 'Aeshti di ma năpoi lucrară mash ună oară sh-tini lji plătish ca noi, tsi trapsim greulu sh-căloarea a dzuăljei.'

¹³ Ma elu lj-apândisi a unui di năshi: ‘Oaspe, mini nu ma ts-fac nindriptati. Noi nu featsim păzari ti un dinar tu dzuă?’

¹⁴ Ljea atsea tsi easti a ta sh-îmnă. Mini voi s-lji dau aishtui di ma năpoi cât a tsăia.

¹⁵ Nu am ndriptati mini s-facă cu a mea tsi s-voi? Catse ti fats oclji ni fânătî, cādu mini escu giumentu?’

¹⁶ Ashă atselji di ma năpoi va hibă protslji sh-atselji protslji va hibă atselji di ma năpoi.”

Isusul Prividzu di a Treia Oară Moartea a Lui

¹⁷ Deapoea cādu Isusul ma s-alina cātră Ierusalem, lji lo dinăparti di doisprădzatsi ucenitsilji sh-pri cali lă dzăsi a lor:

¹⁸ “Ia noi nă alinăm tu Ierusalem, sh-Hiljiu a omlui va s-prida la mārîlji a preftsălor sh-a scribilor. Elji va lu condemnă cu moarti,

¹⁹ va lu prida tu mājîli a pāngājîlor tsi s-lu pizuească, va s-lu zăpălească shi va s-lu crutsisească. Ma elu a treia dzuă va s-nyeadză dit mortsă.”

Ntribarea a Hiljilor al Zevedeu

²⁰ Atumtsea, muma a hiljilor a Zevedeului s-apruche la Isus deadun cu hiljilji a ljei, cādu pri dintsă sh-lji-căftă tsiva.

²¹ Sh-elu lj-dzăsi: “Tsi vrei?” Ea apândisi: “Ursea tsi aeshti doi hiljilji a melji si apună un di nandreapta sh-altu di nastānga tu amirārîljea a ta.”

²² Sh-Isusul apândisi: “Voi nu shtits tsi căftats. Putets s-bets voi cupa tsi mini va s-beu? [Shi s-vă pătîdzats cu pîtedzlu cu cai mini va mi pîtedz?]*” Elji dzăsiră: “Ie, putem.”

²³ Elu lă dzăsi a lor: “Voi dealihea va s-bets cupa a mea. [Shi va s-vă patîdzats cu pîtedzlu cu cai mini va mi pîtedz.]† Ma nu easti tu mănă a mea tsi s-shădets di nandreapta a mea ică di nastānga a mea, cā atseli locuri suntu tră atselji tsi s-etimăsiră di la Tatăl a meu.”

²⁴ Sh-cādu avdzără aesti zboari di dzatsi alantsă s-nărăiră cu doi fratsălji.

²⁵ Isusul lji acljimă ningă năsu sh-lă dzăsi: “Voi lu shtits cā protslji a natsiunilor lji domnească atselji sh-mārîlji au puteari pri năshi,

²⁶ ma namisa di voi nu va s-hibă ashă! Cathiun di voi tsi va hibă mari, s-hibă huzmichearlu a vostru,

²⁷ shi caitsido di voi tsi va hibă protlu, prindi s-hibă sclavlu a vostru,

²⁸ cā sh-Hiljiu a omlui nu vini tra s-lji huzmitipsească, ma huzmitipsească sh-di dari bana a lui ca arăscumpărari tră multsă.”

Doi Orghilji al Ierico

²⁹ Cādu elji ma ishea di Ierico, un multsămi mari ma nidzea după Isusul.

³⁰ Sh-ia, doi orghi eara apunats ningă cali. Cādu avdzără cā ma tritsea Isusul, apārîlji s-aurlă: “Njiluia-nă noi, Doamne, Hiljiu al David!”

³¹ Multsămea lji vārghea tsi s-păpsea, ma elji aurla ma multu: “Njiluia-nă noi, Doamne, Hiljiu al David!”

³² Atumtsea Isusul chindru lji acljimă sh-lă ntribă: “Tsi vrets s-fac tră voi?”

³³ Elji dzăsiră: “Doamne, s-nă si dsicljidză ocljilji.”

³⁴ Sh-Isusul aspusi njilă tră năshi, băgă mănă pri ocljilji a lor, sh-tu atsea oară loară videarea a ocljilor a lor sh-elji lu urmară.

* **20:22** aesti zboari nu s-află tu tuti manuscrsili. † **20:23** aesti zboari nu s-află tu tuti manuscrsili.

21

Intrarea al Isus tu Ierusalem

¹ Cându lji s-aprucheară a Ierusalemului shi agiumsiră tu Betfagă, aproape di Muntli a Masnjilor, Isusul pitricu doi ucenitsi,

² dzăcânda a lor: "Imnats tu hoara tsi easti năntea a voastră, sh-atsia va aflats ună gumară ligată sh-gumăriclu cu năsă. Dizligats-lji sh-adutsets-lji la minî!

³ Sh-macă vără vâ dsătsi tsiva, dzătsets-lji că, 'Domnul ari ananghi tră năshi,' sh-atsel va li sâlăghească trăoară."

⁴ Tora aestă s-featsi tra si mplinească tsi eara dzăsă di la prufitlu:

⁵ "Dzătsets-lji a hiljiljei a Sionului:

'Ia, ma ts-yini amirălu a tău,
inimă-moali, acâlcăt pri ună gumară,
njică ca un gumăric, fătăt di un pravdă ti ngărcari.' "

⁶ Ucenjitsilji s-dusiră sh-featsiră ashă cum lji avea ursit Isusul.

⁷ Adusiră gumara sh-gumăriclu, ashtirnară pri năsi mantelili a lor sh-Isusul s-alină.

⁸ Sh-ună multsămi multu mar ashtirna mantelili a lor pri cali, iară altsălji frândzea dedzi di ponji sh-li ashtirna pri cali.

⁹ Multsănjlji tsi yinea năinti sh-atseali tsi lu urma, aurla, dzăcânda: "Hosanna, a Hiljilui al David!

Ghincuvântat s-hibă atsel tsi yini tu numa a Domnului!

Hosanna tu locurili multi analti!"

¹⁰ Cându intră Isusul tu Ierusalem, tută cāsăbălu si sculă pri cicioari, sh-dzâsi: "Cai easti aestu?"

¹¹ Shi multseămea apândisi: "Aestu easti Isusul, prufitul di Nazaretul a Galileiljei."

Isus Cură Templu

¹² Deapoea Isusul intră tu templu sh-lji aġuni tuts atselji tsi vindea sh-acumpăra tu templu sh-arustună measili a alăxitorilor di părădz shi scamnili a vinditorilor a purunghilor.

¹³ Sh-lă dzăsi a lor: "Easti scriată:

'Casa a mea va s-acljemă casă di părăcâlsiri,
ma voi u avets turnată ca un pishtireauă di furi."

¹⁴ Atumtsea viniră la năsu tu templu orghi shi shcljiochi sh-Isusul lji vindică.

¹⁵ Ma mărilji a preftsălor shi scriblji s-năirăiră cându vidzură thavmatili tsi elu avea faptă shi cilimenjilji tsi dzătsea cu harauă tu templu: "Hosanna a Hiljilui al David!"

¹⁶ Sh-lji dzăsiră: "Ma avdză tini tsi dzăc aeshti?" Isusul lă dzăsi a lor: "Te! Nu avets cāntată pute:

'Dit gura a njitsilor sh-a bebilor tini ai adrată alăvdari?"

¹⁷ Sh-după tsi lji alăsă atselji, ishi di cāsăbă cătră Betania, sh-aclo tricu noapte.

Hiclu atsel Uscat

¹⁸ Dimineatsa curund, cându ma s-turna tu cāsăbă, lu lo foama.

¹⁹ Pri cali vidzu un hic sh-lji si-apruche, ma nu află tsiva, dicăt mash frândzili sh-dzăsi: "S-nu s-leagă frut pute la tini di totăna!" Sh-hiclu s-uscă trăoară.

²⁰ Sh-cându vidzură aestă ucenitslji s-ciudisiră sh-dzāsiră: “Cum s-uscă hiclu trăoară!”

²¹ Sh-Isusul apândisi: “Dealihea vâ dzăc, ma s-avets pisti shi s-nu ndoits, va s-fătsets nu mash atsea tsi mini lji-feciu a hiclu, ma sh-canda s-lji dzătsets aishtui munti: ‘Scoal-ti di aclo sh-arucă-ti tu amari’, aestă va si s-facă.

²² Sh-itsido tsi căftats tu pârăcâlsiri, pistipsinda, va u-loats.”

Autoritatea al Isus

²³ Cându intră tu templu, mārili a preftsălor sh-aushilji a popului lji s-aprucheară candu ma lji nvitsa, sh-lu ntribară: “Cu tsi autoritati li fatsi tini aesti lucrî? Sh-cai ts-ari dată aestă autoritati?”

²⁴ Sh-Isusul apândisi: “Sh-mini va vâ fac ună ntribari, sh-macă voi va nj-apândisits, mini tutashă va vâ dzăc, că cu tsi autoritati li fac tuti aesti lucrî.

²⁵ Pitedzlu a Ioanului di iu vini? Di la tser ică di la oaminjilji?” Sh-elji minduea namisa di năshi, dzăcânda: “Ma s-lji dzătsem di la tser, elu va nă dzăc: ‘Cătse atumtsea nu lji pistipsit?’

²⁶ Macă va lji-dzătsem, ‘di la oaminjilji,’ avem frică di multsămea, că tuts lu acljeam Ioanul profit.”

²⁷ Sh-lji-apândisiră a Isusului, dzăcânda: “Nu shtim.” Atumtsea elu lă dzăsi a lor: “Nitsi mini nu va vâ dzăc că cu tsi autoritati li fac aesti lucrî.”

Parabola a Doi Hiljilor

²⁸ “Tsi minduits? Un om avea doi hilji sh-cum s-dusi cătră protlu, lji dzăsi: ‘Hilje, duti ază s-lucredzi tu ayinji!’

²⁹ Elu apândisi: ‘Nu voi,’ ma, ma năpoi s-mitânjusi shi s-dusi.

³⁰ Deapoea tatăl s-turnă cătră a doilu shi lji-dzăsi sh-a lui ună soi. Sh-elu lji-apândisi sh-dzăsi: ‘Ie, doamne,’ ma nu s-dusi.

³¹ Cai di dolji lu featsi vrearea a tatălui?” Elji lji-dzăsiră: “Protlu.” Isusul lă dzăsi a lor: “Dealihea vâ dzăc că taxidarilji sh-putanili va intră năinti di voi tu amirăriljea a tserurilori.”

³² Că Ioanul vini la voi tră spuneari calea a ndriptatiljei, sh-voi nu lu pistipsit, iară taxidarilji sh-putanili lji pistipsiră. Cu tut atsea, voi nitsi după tsi li avets vidzută aesti lucrî, nu vâ mitunjăsit sh-nu pistipsit.

Parabola a Ayinjarlor Arălji

³³ “Ascultats ună altă parabolă. Eara un nicuchir a casiljei, tsi simină un ayinji, sh-u anvărligă cu gardu shi sâpă un loc di stultsinari aua, sh-adră un pirgu di vigljari. Ayinjea lji u-pistipsi la niscăntsă ayinjeari sh-fudzi diparti.

³⁴ Cându vini chirolu di adunari, elu pitricu huzmichearlji a lui la ayinjearlji ti adunari partea a lui di fruti.

³⁵ Ma ayinjearlji lji acătsară huzmichearilji a lui, unu lu bătură, alantu lu vătămară, sh-a treilu lu vătămară cu chetri.

³⁶ Năpoi pitricu altsă huzmicheari, ma multsă di protslji, sh-ayinjearlji featsiră cu năshi un soi.

³⁷ Tu soni, elu pitricu hiljiu a lui, dzăcânda: ‘Di hiljiu a meu va aibă respect.’

³⁸ Ma ayinjearlji cându lu vidzură hilj-su, dzăsiră un cu-alantu: ‘Aestu easti mushtinitorlu. Haidets, s-lu vătămăm shi s-lom mushtinirea a lui.’

³⁹ Sh-lu acătsară, lu arcară nafoară di ayinji sh-lu vătămară.

⁴⁰ Tora, cându va yină nicuchirlu a ayinjljei, tsi va-l fac a ayinjeartilori aishtor?”

⁴¹ Elji dzăsiră: “Elu va lji vatămă di tuts arălji, sh-va lă-u da ayinjiea la altsă ayinjea, tsi va s-da frutili tu chirolu tsi prindi.”

⁴² Isusul lă dzăsi a lor: "Nu avets cāntatā pute la Scriturili:
'Cheatra tsi masturilji u-scoasirā ca nilipsitā,
s-featsi cheatra a chioshlui.

Aestu easti ciudia tsi Domnul featsi

sh-easti thāvmātisit tu ocljilji a noshtri?"

⁴³ Tră atsea mini ma vā dzāc a voauā, cā va vā si ljea amirāriljea a Dumnidzālui, sh-va lj-si da a unui popul tsi va da fruti.

⁴⁴ Sh-atsel tsi va s-cadā pri aestā cheatrā, va si s-frāngā, sh-atsel pri cai va s-cadā cheatra va si sārāmā."

⁴⁵ Sh-mārilji a preftsālor sh-Fariseilji candu li avdzāra parabolili a lui, aduchirā cā ma grea tră nāshi.

⁴⁶ Sh-cāfta s-lu acātsa, ma avea fricā di populu, cā elji lu lugursea profit.

22

Parabola a Numtāljei

¹ Sh-Isusul lă gri nāpoi a lor cu parabolā, dzācāndā:

² "Amirāriljea a tserurilor lj-undzashti a unui amirā, cai etimāsi numta a hiljilui.

³ Sh-pitricu huzmichearlji a lui s-lā greascā a acljimatsālor tu numtā, ma elji nu vrurā s-yinā.

⁴ Pitricu altsā huzmicheari, dzācānda: 'Dzātsets-lā a acljimatsālor: Ia, mini am ndreaptā uspetsea, yitsālji sh-nāmaljili grasi suntu tājlati, sh-itsido easti etimu. Haidets pi numtā.'

⁵ Ma elji nu vrurā s-avdā shi s-dusirā, un tu agrul a lui sh-alantu tu lucrili a lui.

⁶ Sh-alantsālji dupā tsi acātsarā huzmichearilji a lui, lji ngiurarā sh-lji vātāmarā.

⁷ Atumtsea amirālu cāndu avdzā aestā, s-nārāi sh-pitricu armata a lui lji afānisi atselji vātāmātori sh-arsi cāsābālu a lor.

⁸ Atumtsea lă dzāsi a huzmichearilor a lui: 'Numta easti etimā, ma acljimatsālji nu furā axii.

⁹ Dutsets-vā la crutsisirea a cāljiurilor sh-acljimats pi numtā caitsido tsi s-aflats.'

¹⁰ Sh-huzmichearlji ishir pri cāljiuri, adunarā tuts atselji tsi aflarā, arāi sh-bunji, sh-locu a numtāljei s-umplu cu acljimats.

¹¹ Atumtsea amirālu intrā s-veadā acljimatsālji, sh-vidzu aclo un om tsi nu avea nviscut stranjili di numtā.

¹² Amirālu lj-dzāsi: 'Oaspe cum intrash aoa ni avut stranji di nuntā?' Sh-elu ncljisi gura.

¹³ Atumtsea amirālu lă dzāsi a servitorilor: 'Ligats-lu di manji sh-di cicioari, sh-arucats-lu tu scutidlu di nafoarā. Aclo va hibā plāngul sh-cārtsinirea a dintsālor.'

¹⁴ Isusul ncljisi zborlu a lui, dzācānda: "Multsā suntu acljimats, ma putsānji suntu aleptsā."

Haua a Taxililor

¹⁵ Atumtsea Fariseilji s-dipārtarā shi s-minduirā, cum s-lu acātsa tu cābati.

¹⁶ Sh-pitricurā ucenjitsili a lor deadun cu Irodianilji s-lji dzātsea: "Nvitsātore, noi shtim cā tini eshti alihios, sh-tsi nvetsi calea a Dumnidzālui

după alihea, sh-nu ti meală di vără, că tini nu vedz pãrearea di nafoară a oamnjilor.

¹⁷ Dză-nă tora, cum mindueshti? Easti ndreptu si s-plâtească taxa a Cesarului, ică nu?"

¹⁸ Ma Isusul cunuscânda arăutatea a lor, lă dzăsi: "Cătse mi cărtits, ipucrits?"

¹⁹ Spunets-nji denarlu a taxăllei." Atumtsea elji lji spusiră un denar.

²⁰ Sh-elu lă dzăsi a lor: "A cui easti aestă fatsă sh-aestă scritură?"

²¹ Elji l-j-dzăsiră: "A Cesarului." Atumtsea elu lă dzăsi a lor: "Dats-lă a Cesarului tsi easti a Cesarului sh-a Dumnidzălui tsi easti a Dumnidzălui."

²² Sh-elji cându avdzăra aestă, s-ciudisiră, lu alăsară sh-fudziră.

Saduceilji sh-Nyearea

²³ Tu atsea dzuă viniră la năsu Saduceilji, tsi nu pistipsescu tu nyeari, sh-lu ntribară,

²⁴ dzăcândă: "Nvitsătore, Moisiul ari dzăsă: Macă vără moari sh-nu alasă cilimenji, frătii a lui si nsoară cu muljearea a lui, tra s-lji alasă mushtinitori a fratiui a lui.

²⁵ Tora tră noi eara shapti frats, protlu si-nsură sh-muri. Nu alăsă mushtinitori, sh-u alăsă muljeari-sa a fratilui a lui.

²⁶ Ashă sh-a doilu, sh-a treilu, până la a shaptilu.

²⁷ Tu soni, muri sh-muljearea.

²⁸ Tu nyeari, a cui di aeshti shapti va hibă muljearea? Că tuts u avură muljeari."

²⁹ Ma Isusul apândisi: "Hits tu căbati că nu u cunushtets nitsi Scritura, nitsi putearea a Dumnidzălui.

³⁰ Tu nyeari oaminjilji nitsi va si-nsoară sh-nitsi va si s-mărită, ma elji va s-hibă ca anghilji tu tseruri.

³¹ Tora, tră nyearea a mortsălor, nu avets căntată tsi vă easti dzăsă di la Dumnidzălu:

³² 'Mini escu Dumnidzălu al Avraham, Dumnidzălu al Isac sh-al Iacov'? Dumnidzălu nu easti Dumnidzălu a mortsălor ma a yiilor."

³³ Sh-mulsămea, cându li avdza aesti s-ciudisea di nvitsătura a lui.

Ordinlu atsel Marili

³⁴ Tora Fariseilji cându avdzără că Isusul avea astupată gura a Saduceiljilor, s-adunară deadun.

³⁵ Sh-un di atselji, nvitsător di lege, ntribănda, l-băgă tu provă:

³⁶ "Nvitsătore, cai easti ordinlu ma mari tu Lege?"

³⁷ Sh-Isusul dzăsi: " 'S-vrei Domnul, Dumnidzălu a tău, cu tută inima a ta, cu tută suflitu a tău, sh-cu tută mintea a ta.'

³⁸ Aestă easti protlu sh-ma marli ordin.

³⁹ Sh-a doilu uni soi ca aestu easti: 'S-vrei aproapilu a tău uni soi ca cum ti vrei tini.'

⁴⁰ Di aesti doi ordinii si aspindzură Legea sh-Prufitsălji."

Hristolu, Hiljilu al David sh-Domnul a Lui

⁴¹ Tora cându s-adunară Fariseilji, Isusul lji ntribă:

⁴² "Cum minduists voi tră Hristolu? Hiljilu a cui easti?" Elji dzăsiră: "Al David."

⁴³ Elu lă dzăsi a lor: "Ma cum, atumtsea Davidul, tu Duh, lu acljeamă 'Domn'? Davidul dzăsi:

⁴⁴ 'Domnul l-j-ari dzăsă a Domnului a meu:

Apun-ti tu nandreapta a mea pânã
cându mini s-bagã dushmanjilji a tãlji
ca scamnã sum cicioarili a tali.'

⁴⁵ Macã Davidul lu acljeami 'Domnu', cum poati s-hibã hiljilu a lui?"

⁴⁶ Sh-vără nu putu s-lji apândisea, sh-di atsea dzuã vără nu cutidzea s-lu
ntriba ma.

23

Isusul Vãrgheashti Scriblji sh-Fariseilji

¹ Atumtsea Isusul lã gri a multsãnjlilor sh-a ucenitsilor a lui,

² shi dzãsi: "Scriblji sh-Fariseilji shidzurã pri scamnul al Moisiu.

³ Trã atsea, vigljeats shi fãtsets itsi vã dzãc, ma nu fãtsets cum fac elji,
cãtse dzãc, ma nu fac.

⁴ Elji leagã sartsinji greali tsi s-poarta cu zori sh-li bagã pri plãtãrili a
oamnjilor, ma elji nu vor s-li minã nitsi cu dzeaditlu a lor.

⁵ Ma tuti faptili a lor li facã tra si s-veadã di oaminjilji, li lãrdzescu
filacterili a lor sh-li lundzescu hirilji a stranjlilor a lor.

⁶ Arisescu protili locuri la uspetsi sh-protili locuri tu sinagodzi,

⁷ sh-ncljinãciunjlili tu pãdzi, shi si s-acljeamã 'Rabi' di oaminjilji.

⁸ Ma voi, nu alãsats s-vã acljeamã 'Rabi', cã mash un easti Nvitsãtorlu a
vostru, sh-voi tuts hits frats.

⁹ Sh-pristi loc nu acljimats vără 'tatãl' a vostru, cã mash un easti Tatãlu a
vostru. Elu easti tu tseruri.

¹⁰ Nu alãsats s-vã acljeamã printsu, cã un easti printsul a vostru: Hristolu.

¹¹ Ma marli di voi prindi s-hibã huzmichiarlu a vostru.

¹² Cã cai va si s-analtsã, va si s-apeleacã, sh-cai va si s-apeleacã, va si s-
analtsã.

¹³ Ma cavai di voi Scribi sh-Farisei ipucrits! Cã ncljidets amirãriljea a
tserurilor nãintea a oamnjilor. Cã nitsi voi nu intrats, nitsi nu alãsats atselji
tsi vor s-intrã.

¹⁴ [Cavai di voi Scribi sh-Farisei ipucrits! Cã mãcats tu cãsili a veduvilor,
shi trã ocljilji a lumiljei fãtsets pãrãcãlsiri lundzi, trã atsea voi va s-hits
giudicats.]*

¹⁵ Cavai di voi Scribi sh-Farisei ipucrits! Cã tritsetsi amarea sh-locu ti
fãtseari prozelits, sh-cându vără, s-fatsi ahtar lu fãtsets hiljilu al Geehena,
sh-di doauã ori ma arãu di voi.

¹⁶ Cavai di voi, cãlãuzi orghi tsi dzãtsets: 'Macã vără si spigiurã pi
templu nu easti tsiva, macã si spigiurã pi furiia a templui prindi s-tsãnã
spigiurarea.'

¹⁷ Glari sh-orghi! Cai easti ma mari: furia icã templu tsi sãmstashti furia?

¹⁸ Voi nãnga dzãtsets: 'Ma atsel tsi va si spigiurã pi altarlu, nu easti tsiva,
macã si spigiurã pi doara tsi easti pi nãsu, prindi s-tsãnã spigiurarea.'

¹⁹ Orghi! Cai easti ma marã: doara icã altarlu tsi sãmstashti doara?

²⁰ Ma atsel tsi va si spigiurã pi altarlu, si spigiurã pi nãsu sh-pi itsi lucrì
tsi suntu pisti nãsu.

²¹ Atsel tsi si spigiurã trã templu, si spigiurã trã nãsu sh-trã Dumnidzãlu
tsi bãneadzã aclo.

²² Ma atsel tsi va si spigiurã pri tserlu, si spigiurã pri thronlu al
Dumnidzãu sh-pri atsel tsi shãdi pri nãsu.

²³ Cava! di voi Scribi sh-Farisei ipucritsi! Că voi lugursits a dzatsea a mentâljei sh-a mârarijei, a chiminâljei, shi alâsats după mână lucrili atseali ma greali a legiljei: ndriptatea, njila sh-pistea. Aesti lucrî prindi s-li fătsets ni alâsat după mână altâli.

²⁴ Câlăuzi orghi, tsi sticurats biutura tră s-mutats cunuplu, ma ascâpitats câmila!

²⁵ Cava! di voi Scribi sh-Farisei ipucritsi! Că curatsă partea di nafoară a cupâljei, sh-a piatâljei, iară di năuntru suntu mplini cu arăchiri sh-cu zâlumi.

²⁶ Fariseu orbu! Cură ma năinti di năuntru cupa sh-piata, sh-di nafoară va s-hibă curată.

²⁷ Cava! di voi Scribi sh-Farisei ipucritsi! Că undzits ca murmintsă alghiti, tsi di nafoară s-veadă mushati, ma năuntru suntu mplini di oasili a mortsălor sh-cu multă livushitură.

²⁸ Ashă shi voi di nafoară vâ aspugets a oaminjlor ca ndreptsă, ma di năuntru hits mplină di ipucrizii sh-di anapudii.

²⁹ Cava! di voi Scribi sh-Farisei ipucritsi! Că adrats murmintsălji a prufitsălor shi stulsits grochili a ndreptsălor,

³⁰ sh-dzătsets: 'Ma s-aveam bănat tu chirolu a păpânjilor a noshtri, nu va avem prilucrat cu năshi, la vătămarea a prufitsălor.'

³¹ Zburânda ashătsi voi mârtsits contra di voi, că hits hiljilji atsilor tsi vătămără prufitsălji.

³² Voi u-tritset misura a păpânjilor a voshtri.

³³ Sherchi, pulji di năpârtitsi! Cum va s-ascâpats di giudicarea a Geheniljei?

³⁴ Tră atsea, ia mini ma pitrec la voi prufitsi, shtiutsi shi scribii. Voi niscantsă di năshi va lji vătâmats, sh-va lji crutsisits. Niscantsă altsă va lji bătets tu sinagogăli a voastri, sh-va lji avinats dit un căsăbă tu altu,

³⁵ tra s-cadă pri voi tută sândzili a ndreptsălor, virsată pri loc, di la sândzili a ndreptului Abel pană la sândzili al Zaharia, hiljilu al Barahia, tsi voi lu vătâmat namisa di templu sh-di altar.

³⁶ Dealieha ma vâ dzăc că tuti aesti lucrî va s-cadă pri aestă fară.

³⁷ Ierusalem, Ierusalem, tsi li vatsânji prufitsălji sh-li vatsânji cu chetri atselji pitricutsălji la tini! Di câti ori am vrută s-adun hiljilji a tălji ashătsi cum aduni clocea puljilji a ljei sum areapti, ma voi nu vrută!

³⁸ Ia, templul a vostru ma armăni shcretă.

³⁹ Că mini ma vâ dzăc, că di tora sh-nclo nu va mi videts ma pănă cându s-dzatsets: 'Ghinicuvântat s-hibă atsel tsi yini tu numa a Domnului!'

24

Nvitsarea Profetică, Seamnilă a Chirolui dit Soni

¹ Tora cându Isusul ishi dit templu sh-ma s-dipărta, ucenitsilji a lui lji s-aprucheară tsi s-lji spunea adărăturili a templui.

² Ma Isusul lă dzăsi a lor: "Nu li videts voi tuti aesti? Dealieha ma vâ dzăc, că aoa nu va s-armănă vără cheatră pristi cheatră, că tuti va s-hibă surpati."

³ Deapoea cându elu shidzu tu Muntli a Masnjilor, lji s-aprucheară singur ucenitsilji u lui sh-lji dzăsiră: Nă-aspună cându va s-undzească aesti lucrî? Sh-cai va hibă semnu a vinitiajei a ta sh-a bitisitâljei a etiljei?

⁴ Sh-Isusul apândisi: "Afrits-vă s-nu vâ arădă vără!

⁵ Că multă va yină tu numa a mea, sh-va dzăcă: 'Mini escu Hristolu,' sh-va s-arădă multă oaminji.

⁶ Atumtsea va s-avdzāts di alumti sh-di hābāri trā alumti. Afirits-vā, sh-nu vā aspārats, cā aesti tuti prindi si s-facā, ma bitisita ninga nu va s-aibā vinitā.

⁷ Va si scoală natsiunea contra a natsiuniljei, amirāriljea contra a amirāriljei, va s-aibā urfanji di pāni, sh-cutremburi tu multi locuri.

⁸ Ma tuti aesti lucru va s-hibā apārnjita a durerilor a amintariljei.

⁹ Atumtsea va s-vā prida tu munduiri sh-va s-vā vatāma, sh-di tuti natsiunili va s-vā aurascā trā itia a numāljei a mea.

¹⁰ Atumtsea multsa va s-dipārteadzā di pisti, va vindā un-alantu, sh-va aurasca un-alantu.

¹¹ Va s-easā multsā prufits arādioshi, sh-va arādā multsā oaminji.

¹² Sh-macā va s-multseacă anapudzilji, a multsālor va lā s-arātsească vrearea.

¹³ Ma atsel tsi va aravdā pānā tu soni, atsel va s-ascapā.

¹⁴ Sh-evanghelul aestu a amirāriljei va hibā predicat pri tutā lumea, ca unā māriri di tuti natsiunile sh-atumtsea va hibā bitisita.”

Munduirea Atsea Marea

¹⁵ “Cāndu s-videts lāhtarea a shcretuiriljei, tsi easti paradzās di prufitlu Daniel, sh-ljea loc tu loclu sāmtu (cai cāntā s-lu aducească),

¹⁶ atumtsea atselji tsi suntu tu Iudea, s-fugā pri muntsā.

¹⁷ Cai s-alfā pri tāratsa a casiljei, s-nu dipunā s-ljea tsiva di casā.

¹⁸ Cai easti pri agru s-nu si s-toarnā s-ljea mantelul a lui.

¹⁹ Ma cavai di muljerili atseali greali sh-atseali tsi va lji da sinā a cilimeanlui tu atseali dzāli.

²⁰ Ma pārcālsits-vā tsi fudzirea a voastrā s-nu hibā iarna, icā Sāmbāta.

²¹ Cā atumtsea va aibā unā munduiri ahāntu mar, cāt nu ari undzit pute di tu ahurhita a lumiljei, pānā azā, sh-nu va aibā vārāoarā.

²² Sh-ma s-nu si shcurteadzā atseali dzāli, nu va ascapa vārā om, ma trā itia a aleptsālor atseali dzāli va si shcurteadzā.

²³ Atumtsea macā vārā va vā dzācā: ‘Ia, Hristolu easti aoa,’ icā: ‘Easti aclo,’ nu lu pistipsits.

²⁴ Cā va easā hristoshi arādioshi sh-prufitsi arādioshi, sh-va facā seamni mārī, sh-ahānti ciudii cāt, ma s-putea s-arādā s-putea sh-aleptsālji.

²⁵ Ia, adutsets-vā aminti cā mini vā hābārsii ma nāinti.

²⁶ Sh-macā vā dzācā: ‘Ia, Hristolu easti tu irnjii,’ nu dutsets-vā aclo. ‘Ia, easti tu udādzili atseali ascumti,’ nu pistipsits-lā.

²⁷ Cā ca ascāpirea tsi easi di tu rāsārit shi si aspuni pānā tu ascāpitat, ashā va hibā sh-vinita a Hiljilui a omlui.

²⁸ Cā aclo iu suntu cufomili, aclo va s-adunā sh-vulturilji.”

Vinita a Hiljilui a Dumnidzāui

²⁹ “Tora dupā nvirinarea atsilor dzāli,

‘soarili va si scutidisească,

sh-luna nu va s-da lunjina a ljei.

Stealili va s-cadā dit tser,

sh-puterili a tseruilor va si trunduescu.’

³⁰ Atumtsea va si s-veadā tu tser semnul a Hiljilui a omlui. Tutu natsiunili a loclui va plāngā, cāndu s-veadā Hiljilu a omlui yininda pristi norilji a tserlui cu puteari sh-māriri mari.

³¹ Sh-elu va li pitreacă anghilji a lui cu boatsi vârtoasi di trumpetă, sh-elji va adună aleptsălji a lui di patru vimturili, di ună mardzină a tserlui până la alantă.

³² Tora di la hiclu nvitsats aestă parabolă: cându tora dedzili a lui s-muljeadză, shi scoată frândzâli, s-u shtits că vearea easti aproape.

³³ Ashătsi sh-voi, cându s-videts tuti aesti lucri, si shtits că elu easti aproape, ningă ushă.

³⁴ Dealihia ma vâ dzăc că nu va treacă aestă ghegenerată ni faptă tuti aesti.

³⁵ Tserlu shi loclu va treacă, ma zboarili a meali nu va treacă.”

Băgats Oară di Vinita a Hiljilui a Omlui!

³⁶ “Iară di dzua atsea sh-di oara atsea vără nu shtii, nitsi anghilji dit tser, nitsi Hiljilu, ma singur Tatăl.

³⁷ Shi ashă cum tu dzălili al Noe, ashă va hibă sh-la vinita a Hiljiu a omlui.

³⁸ Că ashă cum tu dzălili atseali di cama năinti a nicariljei, oaminjili măca sh-bea, si-nsura shi s-mărta, până cându Noeul intră tu varcă.

³⁹ Elji nu aduchiră tsiva, până cându vini nicarea sh-lji lo tuts. Ashă va hibă sh-tu vinita a Hiljilui a omlui.

⁴⁰ Atumtsea doi va hibă la agru, un va si s-ljea, sh-alantu va si s-alasă.

⁴¹ Doauă muljeri va s-matsină la moară, ună va si s-ljea, sh-alanta va si s-alasă.

⁴² Stats dishtiptat, că nu shtits tu tsi oară va s-yină Domnul a vostru.

⁴³ Ma si shtits aestă, că ma s-shtiea nicuchirlu a casiljei tu tsi oară a noaptiljei va yinea furlu, va s-armănea dishtiptat sh-nu va lu alăsa s-lji intra tu casă.

⁴⁴ Tră aestă voi s-hits etimāsits, că Hiljiu a omlui va s-yină tu atsea oară cându voi nu lu ashtiptats.”

Parabola a Doi Huzmichearilor

⁴⁵ “Că easti atsel huzmichear pistimen sh-mintimen? Easti atsel tsi nicuchirlu l-băgă pristi huzmichearli a lui, tra s-lă da hrană tu oara tsi prindi.

⁴⁶ Ca hara di atsel huzmichear tsi, cându si s-toarnă nicuchirlu a lui, s-lu află făcândă ashă.

⁴⁷ Dealihia ma vâ dzăc că elu va s-lji pistipsească atsilui huzmichear tută ayishterea a lui.

⁴⁸ Ma, macă aestu huzmichear arău dzătsi tu inima a lui: ‘Domnul a meu amăni s-yină,’

⁴⁹ sh-ahurheashti s-bată sotsilji a lui, sh-măcă sh-bea cu biutorlji,

⁵⁰ domnulu aishtui huzmichear va yină tu dzua atsea, cându elu nu lu ashteapti, sh-tu oara atsea cându elu nu u-shtii.

⁵¹ Elu va lu condemnă greu sh-va lji da tihea a ipucritsilor. Aclo va s-hibă plângul sh-cărtsănirea a dintsălor.”

25

Parabola a Dzatsi Virginilor

¹ “Atumtsea amirăriljea a tserurilor va s-undzească cu dzatsi virgini, tsi li loară cândilili a lor, sh-ishiră năntea a dzinirlui.

² Tora tsintsi di eali eara glari sh-tsintsi mintimeni.

³ Glarili, cându loară cândilili a lor, nu loară cu năsi sh-untulemlu.

⁴ Iară mintimenili, deadun cu cândilili, loară sh-untulemlu tu vasili a lor.

⁵ Sh-metsi dziniri ma s-amăna, lă vini somnul a tutulor sh-durnjiră.

⁶ Ma cãtrã njedzã-noapti s-avdzã un griri: 'Ia, ma yini dzinirli, ishitsu s-lu adunats!'

⁷ Atumtsea tuti virginili s-dishtiptarã shi ndreapsirã cãndilili a lor.

⁸ Shglarili lã dzãsirã a mintimenilor: 'Dats-nã di untulemlu a vostru, cã cãndilili a noastri ma s-astingã.'

⁹ Ma mintimenili apãndisirã: 'Nu, cã nu va nã-agiungã, nitsi a noauã nitsi a voauã. Ma ghini nidzets la vinditorlji sh-acumpãrats.'

¹⁰ Sh-cãndu eali s-dusirã s-acumpãrã, yini dzinirli. Virginili tsi eara etimi, intrarã deadun cu nãsu la numtã, sh-usha si ncljisi.

¹¹ Ma napoi vinirã sh-alanti virginii, dzãcãnda: 'Doamne, doamne, discljidi usha.'

¹² Ma elu apãndisi: 'Dealihea ma vã dzãc, cã nu vã cunoscu.'

¹³ Trã atsea stats dishtiptat, cã nu shtits nitsi dzua nitsi oara cãndu va yinã."

Parabola di Talentsãli

¹⁴ "Amirãriljea a tserurilor undzeashti tutashã ca un om, tsi cãndu ma s-nchisea ti un cãlãtorii lã acljimã huzmichearlji sh-lã pistipsi a lor avearea a lui.

¹⁵ A unui lji deadi tsintsi talentsã, a altui doi sh-a altui un, a cuitsido dupã putearea a lui sh-fudzi pi calì.

¹⁶ Trãoara atsel tsi avea loatã tsintsi talentsã s-dusi, sh-featsi pãzari sh-amintã tsintsi altsã.

¹⁷ Tutashã sh-atsel tsi avea loatã doi talentsã amintã doi altsã.

¹⁸ Iarã atsel tsi avea loatã un, s-dusi, disfeatsi unã groapã tu loc sh-ascumsi talentu a nicuchirlui a lui.

¹⁹ Dupã multu chiro, s-turnã nicuchirlu a huzmichearilor sh-featsi luguriili cu elji.

²⁰ Sh-atsel tsi avea loatã tsintsi talentsã lj-ishi nãinti sh-lji adusi tsintsi altsã, dzãcãnda: 'Doamne, tini nji ai pistipsitã tsintsi talentsã, ia cu atseali mini amintai tsintsi altsã.'

²¹ Sh-nicuchirlu lj-dzãsi: 'Bravo, huzmichear bun sh-pistimen. Tini fushi pistimen ti lucrì njitsi, mini va ti bag pi mãri lucrì. Haidi s-hãrseshti cu nicuchirlu a tãu!'

²² Deapoea vini sh-atsel tsi avea loatã doi talentsã sh-dzãsi: 'Doamne, tini nji ai pistipsitã doi talentsã. Ia, cu atseali mini amintai doi altsã.'

²³ Sh-nicuchirlu a lui lj-dzãsi: 'Bravo, huzmichear bun sh-pistimen. Tini fushi pistimen tu lucrì njitsi, mini va ti bag pi mãri lucrì. Haidi s-hãrseshti cu nicuchirlu a tãu!'

²⁴ Tu bitisitã vini sh-atsel tsi avea loatã mash un talentu sh-dzãsi: 'Doamne, mini lu shtiam cã eshti om aspru, tsi seatsiri aclo iu nu ai siminatã sh-adunji iu nu ai mpãrsatã,

²⁵ trã atsea avui fricã sh-mi dush sh-lu ascumshu talentul a tãu tu loc. Ia, mini ma ts-u tornu atsel tsi easti a tãu.'

²⁶ Sh-nicuchirlu apãndisi: 'Huzmichear anapud sh-timbel! Tini lu shtiai cã mini seatsir aclo iu nu am siminatã sh-adun aclo iu nu am mpãrsatã.

²⁷ Tini prindea s-lji-aveai datã pãradzli a mealì la bancã sh-ashã, tu turnarea a mea mini va lji aveam loatã cu amintatic.

²⁸ Trã atsea loats aishtui talentul shi dats-lu atsilui tsi ari dzatsi talentsã.

²⁹ Cã atsilui tsi ari va lji si artirseascã ma multã sh-va s-aibã multu. Ma atsilui tsi nu ari, va-lj si ljea sh-atsea tsi ari.

³⁰ Arcats-lu tu scutidlu di nafoarã aestu servitor arãu. Aclo va hibã plãngul sh-cãrsãnirea a dintșãlor.' "

Bitisita ti Nvitsarea Profetică, Oili sh-Căprili

³¹ “Cându s-yinā Hiljiu a omlui tu mărirea a lui, deadun cu tuts anghilji, atumtsea va s-apună pri thronlu a mărirliei a lui.

³² Sh-tuti natsiunili va s-adună năintea a lui, sh-elu va li dispartă unlu di alantu ashā cum disparti picurarlui oilili di căprili.

³³ Sh-oili va li bagā nandreapta a lui sh-căprili nastānga.

³⁴ Atumtsea Amirālu va l-dzācā atsilor tsi va hibā nandreapta a lui: ‘Haidets ghinucuvāntats a Tatālui a meu. Mushtinits-u amirāriliea tsi s-featsi etimu trā voi di la adrarea a lumiliei.

³⁵ Că avui foami sh-nji deditā ti mēcari, avui seati sh-nji deditā ti beari, earam xen sh-mi preadunat,

³⁶ earam dizviscut sh-mi nvistcut, earam lāndzit sh-voi mi vindicat, earam tu hapsi sh-vinitā la mini.’

³⁷ Atumtsea ndreptsālji va s-lji apāndiseascā: ‘Doamne, cādu ti vidzum agiun sh-ti hrānim, icā nsitat shi s-deadimā ti beari?’

³⁸ Sh-cādu ti vidzum xen sh-ti preadunām, icā dizviscut sh-ti nviscum?

³⁹ Sh-cādu ti vidzum lāndzit icā tu hapsi sh-vinimu la tini?’

⁴⁰ Sh-Amirālu apāndisi: ‘Dealihea ma vā dzāc: Di cāti ori lji-u-avets faptā aestā a vāru di aeshti fratsi a melji ma njitsi, aestā nji-u fetsitu a njia.’

⁴¹ Deapoea elu va lā dzācā sh-atsilor tsi va hibā nastānga: ‘Dipārtats-vā di mini, blāstimats, tu foc di totāna, etimāsiti ti draclu sh-anghilji a lui.

⁴² Că aveam foami sh-nu nji deditā ti mēcari, avui seati sh-nu nji deditā ti beari,

⁴³ earam xen shi nu mi preadunat, dizviscut shi nu mi nviscut, lāndzit sh-tu hapsi shi nu vinitā s-mi mutreat.’

⁴⁴ Atumtsea elji va lji apāndiseascā: ‘Doamne, cādu ti vidzum cu foami icā cu seati, icā xen, icā dizviscut, icā lāndzit, icā tu hapsi sh-nu ti agiutām?’

⁴⁵ Atumtsea elu va lā apāndiseascā: ‘Dealihea vā dzāc: Di cāti ori tsi nu lji-u-avets faptā aestā a vāru di aeshti ma njitsi, aestā nu nji-u-avets faptā a njia.’

⁴⁶ Sh-elji va s-ducā tu munduiri di totāna, ma ndreptsālji va s-aibā bana eternā.”

26

Complotlu a Preftsālor

¹ Cādu Isusul bitisi tuati aesti zboari, lā dzāsi a ucenitsilor a lui:

² “Voi shitsi cā după doauā dzāli easti Pashtili, sh-deapoea Hiljiu a omlui va s-prida ti crutsisiri.”

³ Atumtsea mărilii a preftsālor, sh-aushilji a popului s-adunarā tu uborlu a arhipreftului tsi s-acljima Caiafa.

⁴ Sh-apofāsirā s-lu acātsa Isusul cu tirtipi shi s-lu vatāmā,

⁵ ma dzātsea: “Nu tu sārbitoari, tsi s-nu s-facā vārā mintiturā tu popul.”

Uspetsi tu Betania

⁶ Cādu Isusul eara tu Betania, tu casa al lebroslu Simon,

⁷ s-apriuche unā muljeari cu un vas di alabastru cu untulem di njir multu scumpā, shi lji-lu virsā pri caplu a lui, cādu elu ma shidea andupirat la measā.

⁸ Cādu ucenitsilji a lui vidzurā aestā, s-nārāirā shi ntribarā: “Cātse tut aestu hārgiuri geaba?”

⁹ Aestu untulem, putea si s-vindea multă scumpu sh-păradzili si s-dea a niavutsălor.”

¹⁰ Ma Isusul lu achicăsi aestă sh-lă dzăsi a lor: “Cătse u tulburatsă aestă muljeari? Ea featsi un lucru bun tră mini.

¹¹ Că oarfânlji va li avetsi totăna cu voi, ma mini nu va mi avets totăna.

¹² Că, virsânda aestu untulem njirusit pri truplu a meu, ea lu ndreapsi truplu a meu tră ngrupari.

¹³ Dealieha mini ma vă dzăc că iutsido tsi va s-hibă predicat aestu evanghelu tu tută lumea, va si aspună că tsi featsi aestă muljeari, tră amintirea a ljei.”

Pridarea al Isus

¹⁴ Atumtsea un di atselji doisprădzatsi, cu numa Iuda Iscariotul, s-dusi la mărilji a preftsălor,

¹⁵ sh-lă dzăsi a lor: “Căti va nji dats tsi mini s-vă lu prida?” Sh-elji lj-misurară treidzătsi păradză, sicli di asimi.

¹⁶ Sh-di atumtsea elu căfta oara s-lu prida.

Tsina a Pashtiljei

¹⁷ Tu prota dzuă a Adzânilor, ucenitsilji s-aprucheară a Isusului sh-lu ntribară: “Iu vrei s-ndridzem tră măcari Pashtili?”

¹⁸ Sh-elu apândisi: “Dutsets-vă tu cāsăbă la fileanlu sh-dzătsets-lji: ‘Nvitsătorlu dzătsi: Chiorlu a meu easti aproapi. Va s-facă Pashtili la casa a ta deadun cu ucenitsilji a melji.’ ”

¹⁹ Atumtsea ucenitsilji featsiră ashă cum lă avea dimândată Isusul shi itimăsiră Pashtili.

²⁰ Sh-cându ntunică, elu shidzu la measă deadun cu doisprădzatslji.

²¹ Cându ma măca, dzăsi: “Dealieha mini ma vă dzăc, că un di voi va mi prida.”

²² Elji si nvirinară multu sh-cathiun di năshi ahurhi s-dzăcă: “Nacă escu mini, Doamne?”

²³ Sh-elu apândisi: “Atsel tsi ari muljeată deadun cu mini măshcătura tu cătsân, elu va mi prida.

²⁴ Ashă cum easti scriată tră năsu, Hiljiu a omlui s-dutsi. Ma cava di atsel om tsi prida Hiljiu a omlui! Tră năsu va eara ma ghini s-nu eara amintat pute.”

²⁵ Sh-Iuda, atsel tsi va lu pridea, lu ntribă sh-lji dzăsi: “Rabbi, nacă escu mini atsel?” Elu lji dzăsi: “Tini ma dzătsi!”

²⁶ Sh-iară elji ma măca, Isusul lo pănea, u-ghinicuvântă, u frămsi, sh-u deadi a ucenitsilor a lui sh-dzăsi: “Loats shi măcats, aestă easti truplu a meu.”

²⁷ Deapoea lo cupa, sh-hărăstăsi, sh-u-deadi a lor dzăcânda: “Bets di aestă tuts.

²⁸ Aestu easti sândzili a meu a pistiligăturăljei, tsi easti virsată tră multsă tră ljirtarea a amărtiilor.

²⁹ Sh-mini ma vă dzăc, că di tora sh-nclo mini nu va s-beau ma di aestu carpo a ayităljei, până tu atsea dzuă cându deadun cu voi, va s-beau di nou tu Amirăriljea a Tatălui a meu.”

³⁰ Sh-după tsi cântară himnul, ishiră nafaoră la muntli a Masnjilor.

Prihăbărsirea a Petrului tră Alipidarea

³¹ Atumtsea Isusul lă dzăsi a lor: “Aestă noapti tuts voi va s-mi apărăsits, că easti scriată:

'Va s-agudescu picurarlu sh-oili a cupiiljei va s-arâspândească.'

³² Ma după tsi s-hiu nyiată, va mi duc năinti di voi tu Galilea."

³³ Atumtsea Petrul apândisi: "Sh-canda tuts s-vă apărâtsească, mini nu va s-vă apărâtescu pute!"

³⁴ Isusul l-j-dzâsi a lui: "Dealihea ma tsâ dzâcâ că tu noaptea aestă, ma năinti tsi s-cântă cucotlu, tini va mi aleapidz di trei ori."

³⁵ Petrul l-i dzâsi: "Sh-ca s-prindi s-mor cu tini, nu va ti aleapid pute." Ashâ dzâsiră sh-tuts ucenitsilji.

Isusul tu Ghetsemani

³⁶ Atumtsea Isusul s-dusi deadun cu năshi tu un loc, tsi s-acljima Ghetsemani, sh-lă dzâsi a ucenitsilor: "Shidets aoa, iară mini ma mi duc aclo s-mi pârâcâlescu."

³⁷ Sh-lo cu năsu Petrul sh-doi hiljilji al Zevedeu, sh-apărni si nvirineadză shi s-aibă mari sicleti.

³⁸ Atumtsea elu lă dzâsi a lor: "Suflitlu a meu easti multu nvirinat, până tu moarti. Armânets aoa shi stats dishtiptat deadun cu mini."

³⁹ Sh-cum s-dusi niheam ma năinti, cādzu cu fatsa pri loc shi s-pârâcâlsi dzâcânda: "Tatâl a meu, macă easti putut, dipârteadz-u di la mini aestă cupă, cu tută atsea, nu cum voi mini, ma cum vrei tini."

⁴⁰ Deapoea s-turnă la ucenitsilji shi lji află durnjinda, sh-lji dzâsi al Petru: "Ma cum, nu putut s-vigljeats cu mini macari ună oară?"

⁴¹ Stats dishtiptat sh-pârâcâlsits-vă, s-nu cādets tu cărtiri, că duhlu easti etimu, ma truplu easti niputut."

⁴² S-dusi a doaua oară shi s-pârâcâlsi dzâcânda: "Tatâl a meu, macă nu easti putut tsi aestă cupă s-fugă di la mini fără si s-bea di mini, si s-facă vrearea a ta!"

⁴³ Deapoea s-turnă sh-lji află năpoi tsi durnjea, că ocljilji a lor eara somnusi.

⁴⁴ Sh-după tsi lă alăsă, s-dusi năpoi shi s-pârâcâlsi di-a treia oară, dzâcânda idyli zboari.

⁴⁵ Deapoea s-turnă la ucenitsilji a lui sh-lă dzâsi a lor: "Tora ninga durnjits sh-vă discurmats? Ia vini oara, sh-Hiljilu a omlui va s-prida tu mănjlji a amărtiosilor.

⁴⁶ Sculats-vă, s-nidzem. Ia, atsel tsi ma mi prida easti aproapi."

Acâtsarea al Isus

⁴⁷ Sh-iară Isusul ma grea, ia Iuda, un di doisprâdzatslji, vini sh-deadun cu năsu ună multsămi mar cu spâtsi sh-cu ciurmădzi, pitricuts di mărilji a preftsălor sh-di aushilji a popului.

⁴⁸ Tora atsel tsi lu pridea lă avea dată a lor un semnu, dzâcânda: "Atsel tsi mini va l-bashu, elu easti, acâtsats-lu."

⁴⁹ Shi trăoară s-apruche la Isusul sh-lji dzâsi: "Salut, Nvitsătore!", sh-lu bāshe.

⁵⁰ Isusul lji dzâsi: "Oaspe, tsi ai tu minti s-fats?" Atumtsea elji s-aprucheară, băgară mănjlji pri Isusul sh-lu acâtsară.

⁵¹ Shi ia, un di atselji tsi eara cu Isusul, timsi mână, scoasi spata a lui, agudi huzmichearlu a arhipreftului sh-lji tălje ureacljea.

⁵² Atumtsea Isusul lji dzâsi: "Toarnă spata tu loclu a ljei, că tuts atselji tsi ljea spata, di spata va moară.

⁵³ Minduits voi, că mini nu pot s-mi pârâcâlescu a Tatălui a meu, dinăoară s-nji pitreacă ma multă di doisprâdzats di legiunji di anghilji?

⁵⁴ Ma atumtsea cum va s-mplinească Scriturili, că după eali ashâ prindi s-facă?”

⁵⁵ Tu atsea oară Isusul lă dzăsi a mulțșanjilor: “Voi ishit s-mi acătsats mini cu spătsi sh-cu ciumădzi, ca un fur. Ia, cathi dzuă shideam cu voi nvitsânda tu templu, sh-voi nu mi acătsat.

⁵⁶ Ma tuti aesti s-featsiră tsi si mplinească Scriturili a profutsilor.” Atumtsea tuts ucenitsilji lu alăsară sh-fudziră.

Isusul Năntea a Sinedriului

⁵⁷ Sh-atselji tsi lu avea acătsată Isusul, lu dusiră la Caiafa, arhipreftulu iu eara adunată scriblji sh-aushlji.

⁵⁸ Sh-Petrul lu urmă di diparti până tu uborlu a arhipreftului, shi-după tsi intră atsia, s-apună deadun cu vigljitorlji s-veadă tsi va s-undzească.

⁵⁹ Tora mărilji a preftsălor, sh-tut sinedriul căfta vără măriri arădiosă contra al Isus, ti vătămari,

⁶⁰ ma nu aftară tsiva, cu tută că viniră mulțșă martiri arădioshi. Ma napoi viniră doi altsă martiri arădioshi,

⁶¹ tsi dzăsiră: “Aestu ari dzăsă: ‘Mini pot s-aspargu templul a Dumnidzălui shi s-lu adar ti trei dzăli.’”

⁶² Atumtsea arhipreftul si s-culă sh-lji dzăsi: “Nu ma apândiseshti dip ti atseali tsi ma mărțirescu aeshti contra tini?”

⁶³ Iară Isusul tătsea. Sh-arhipreftul grăi: “Mini ma ti spigiuru pri Dumnidzălu atsel yiulu s-nă dzătsi macă tini eshti Hristolu, Hiljiu a Dumnidzălui.”

⁶⁴ Isusul lji dzăsi: “Tini ma dzătsi! Sh-mini ma vă dzăc că di tora sh-ma nclo voi va lu videts Hiljiu a omlui tsi sheadi di nandreapta a Puteariljei, sh-yininda pri niorilji a tserlui.”

⁶⁵ Atumtsea arhipreftul arupsi stranjlji a lui, dzăcânda: “Elu blăstimă! Tră tsi nă lipsescu tora martirilji? Ia, tora lu avdzătă blăstemlu a lui.

⁶⁶ Cum vă si pari a voaua?” Sh-elji apândisiră: “Elu easti căbatar tră moarti!”

⁶⁷ Atumtsea lu scucheară pri fatsă, lu agudiră cu shupleacă, shi niscăntsă altsă lji-l-deadiră cu bushlu,

⁶⁸ dzăcânda: “Hristose, prufitipsea! Cai ti agudi?”

Alipidearea a Petrului

⁶⁹ Iară Petrul shidea nafoară, tu ubor ună huzmicheară s-apruche dzăcânda: “Sh-tini earai cu Isus Galileanlu.”

⁷⁰ Ma elu lu alipidă năntea a tutulor dzăcânda: “Nu shtiu tsi dzătsi!”

⁷¹ Sh-cându elu ma ishea la poartă, vidzu ună altă huzmicheară sh-lă dzăsi atsilor tsi eara aclo: “Sh-aestu eara cu Isus Nazareanlu!”

⁷² Ma Petrul lu alipidă năpoi spigiurânda: “Mini nu lu cunoscu atsel om.”

⁷³ După putsân s-aprucheară sh-atselji tsi shidea aclo, sh-lji dzăsiră a Petrului: “Dealieha, sh-tini eshti un di atselji, că grailu a tău ti spuni!”

⁷⁴ Atumtsea elu ahurhi s-blastimă shi si spigiură, dzăcânda: “Mini nu lu cunoscu atsel om!” Sh-tu oara atsea cântă cucotlu.

⁷⁵ Atumtsea Petrul adusi aminti atsea tsi lji avea dzăsă Isusul: “Ma năinti tsi s-cântă cucotlu, va s-mi aleapidz di trei ori.” Shi elu ishi afoară sh-plămsi cu amăreatsă.

1 Cându vini dimineatsa, tuts mârliji a preftsâlor sh-aushlji a popului featsirâ plan contra al Isus tsi s-lu vâtâma.

2 Sh-ashâ cum lu ligarâ, lu dusirâ sh-lu pridarâ la Pilat, guvernatorlu romac.

3 Atumtsea, Iuda tsi lu avea pridatâ, cându lu vidzu că lu giudicarâ Isusul, s-pishmânipsi, sh-lji turnâ nâpoi tredzâtsi di asimi la mârliji a pretsâlor sh-la aushlji,

4 dzâcânda: "Feciu amârtii că vindui un sândzi fărâ căbati." Ma elji dzâsirâ: "Tsi nâ mealâ a noauâ? Lucru ti tini!"

5 Sh-ashâ Iuda, l-arcâ pâradzli di asimi la templu, shi s-dusi si aspindzura.

6 Ma mârliji a preftsâlor adunarâ aesti pâradzi di asimi sh-dzâsirâ: "Nu prindi s-lji bâgâm tu ayishtearea a tempului, că easti pâhâlu a sândzilui."

7 Dupâ tsi featsirâ plan, cu aesti pâradzi acumpârârâ agrulu a pociarlui di murmînsâli a xenjilor.

8 Trâ atsea agrulu aestu s-acljeami pânâ tu dzua di azâ: "Agrulu a sândzilui."

9 Atumtsea si mplini atsea tsi fu dzâsâ pri prufitlu Ieremia: *"Sh-loarâ di treidzâtsi pâradzili di asimi, pâhâlu tsi lu avea tinjisitâ hiljilji al Israel,*

10 sh-li deadirâ trâ agrul a pociarului ashâ cum mi dimândâ Domnul."

Isusul Năntea a Pilatlui

11 Sh-Isusul stâtu năntea a guvernatorului sh-elu lu ntribâ: "Tini eshti amirâlu a Iudeilor?" Sh-Isusul lji dzâsi: "Tini ma dzâts."

12 Deapoea mârliji a preftsâlor sh-aushlji lu acuzarâ, ma elu nu apândisi dip.

13 Atumtsea Pilatul lu-ntribâ: "Nu avdzâ căti mârtiri s-dzâc contra tini?"

14 Ma elu nu apândisi la nitsi un zbor, ashâtsi guvernatorlu s-ciudisi multu.

15 Tora cu sibepea a sârbătoarilei guvernatorlu lu avea ca adeti tsi s-lji sâlâghea a popului un hâpsânit, atsel tsi vrea populu.

16 Avea atumtsea tu hapsi, un hâpsânit cu anami, cu numa Baraba.

17 Cându s-adunarâ oaminjili, Pilatul lă ntribâ atselji: "Cai vrets s-vă sâlâghescu, Baraba, ică Isusul, tsi s-numeashti Hristos?"

18 Că elu lu shtia ghini că elji lu avea pridatâ di inati.

19 Sh-iarâ elu shidea pri scamnu la giudicatâ, muljearea a lui lj-pitricu zbor: "Nu ti mintea dip cu lucrul atsilui ndreptulu, că azâ am traptâ multâ tu yis tră itia a lui."

20 Ma mârliji a preftsâlor sh-aushlji lji umplurâ mintea a multsâmiljei tsi s-căfta Baraba, sh-Isusul si s-vâtâma.

21 Sh-guvernatorlu lă ntribâ: "Cai di doilji vrets s-vă sâlâghescu?" Elji dzâsira: "Baraba!"

22 Pilatlu lă dzâsi a lor: "Tsi s-fac, cu Isusul, tsi s-acljeami Hristos?" Tuts lji apândisirâ: "S-crutsiseascâ!"

23 Ma guvernatorlu ntribâ: "Câtse, tsi arău ari faptâ?" Ma elji aurla ma multu: "S-crutsiseascâ!"

24 Atumtsea Pilatul, vidzânda că nu ma agiundzea iuva, sh-aurlarea ma s-fătsea ma vârtoasă, lo apă sh-aspilâ mănji năntea a lor, dzâcânda: "Mini escu ni-vinovat di sândzili a aishtui ndreptu, easti lucrul a vostru."

25 Sh-tut populu apândisinda dzâsi: "S-hibâ sândzili a lui pristi noi sh-pristi cilimenjilji a noshtri!"

26 Atumtsea elu lă sâlâghi a-lor Baraba. Dupâ tsi Isusul lu băturâ, lu prideadi tsi s-lu crutsisea.

²⁷ Atumtsea suldatslji a guvernatorului, după tsi dusiră Isusul tu preto-rium, adunară ningă năsu tută cohorta.

²⁸ Sh-cum lu disviscură, lji arcară pri plătari ună mantilă roshi amirărescu.

²⁹ Sh-lji mplătiră ună curună di schinji, lji-u băgară pri cap, sh-lji deadiră un bastun tu mâna atsea ndreapta sh-dzinucljinda năntea a lui, arădea dzăcânda: "Salut, amirălu a Iudeilor!"

³⁰ Deapoea lu ascuchiară, lji loară bastunlu sh-cu atsel lu agudea n-capă.

³¹ După tsi lu pizuiră, lji-lu mutară mantelul shlu nviscură cu stranjili a lui, sh-lu dusiră ti crutsisiri.

Crutsisirea

³² Sh-cara ishiră afoară, aflară un om dit Cirenea, tsi s-acljima Simon, sh-lu strimsiră s-purta crutsea al Isus.

³³ Căndu agiumsiră tu loclu tsi s-acljima Golgota, tsi va s-dzică "Loclu a Cafcăljei",

³⁴ lji deadiră s-bea yină puscă misticat cu heari. Ma elu, după tsi u băgă tu gură, nu vrea s-u bea.

³⁵ După tsi lu crutsisiră, mpărtsără cu soarti stranjili a lui, [tra si mplinească tsi eara dzăsă di la prufitlu: "Mpărtsără namisa di năshi stranjili a meali sh-arcară soarti di tunica a mea."]*

³⁶ Deapoea shidzură sh-lu vigljea.

³⁷ Pristi caplu a lui, băgară tutashă scriată acuza ti giudicarea a lui: "Aestu easti Isusul, Amirălu a Iudeilor."

³⁸ Atumtsea s-crutsisiră deadun cu năsu sh-doi ribelji, unlu tu nan-dreaptea sh-alantu tu nastănga.

³⁹ Sh-atseji tsi tritsea cătră aclo, lu ngiura giucănda caplu,

⁴⁰ sh-dzicănda: "Tini tsi lu aspardză templul sh-lu adară tră trei dzăli, ascapă-ti! Macă eshti Hiljiu a Dumnidzălui, dipună-ti di crutsi!"

⁴¹ Tutashă, sh-mărilji a preftsălor, deadun cu scriblji sh-cu aushlji, s-pizuea sh-dzătsea:

⁴² "Elu ascăpă altsă, ma tora nu poati si s-ascapă. Macă easti amirălu a Israelui, s-dipună tora di crutsi sh-noi va pistipsim la năsu.

⁴³ Elu ari pistipsită tu Dumnidză, sh-macă elu lu va s-lu ascapă tora, că ari dzăsă: 'Mini escu Hiljiu a Dumnidzălui.'"

⁴⁴ Tutashă, lu ngiura sh-ribeljilji tsi eara crutsisită cu năsu.

⁴⁵ Di tu njeadzăduă† până la oara trei ti mirindî‡ scutidu amvăli tut loclu.

⁴⁶ Anvărliġa di oara trei după prândzu§, Isusul aurlă cu boatsi anală, dzăcânda: "Eli, Eli, lema sabachthani?", tsi va s-dzică: "Dumnidzălu a meu, Dumnidzălu a meu, cătse mi ai alăsată?"

⁴⁷ Sh-niscăntsă di atselji tsi shidea aclo, căndu lu avdzră, dzăsiră: "Aestu ma lji greashti al Iliă."

⁴⁸ Sh-tu atsea oară, un di atseji s-dusi dalaga, lo un sfungu, lu mulje tu yin acră shi, după tsi lu băgă tu măeăua di un călami, lji deadi s-bea.

⁴⁹ Ma alantsă dzătsea: "Alăsats-lu s-videm va s-yină Iliă s-lu ascapă."

⁵⁰ Sh-Isusul aurlă nînga ună oară cu boatsi anală, sh-deadi sufliu.

⁵¹ Sh-ia, velul a tempului s-arupsi pi doauă părtsă di nsus până nghios, loclu cutrembură shi shcānghili s-disicară,

* **27:35** aesti zboari di tu bitisită nu s-află tu manuscrisili atseli vecjlilji. Aesti zboari s-află tu Ps 22:18 † **27:45** tu gärtseashti atsea oară easti a shasea. ‡ **27:45** tu gärtseashti atsea oară easti a noaua. § **27:46** tu gärtseashti atsea oară easti a noaua. **27:46** Ps 22:1.

⁵² murmintsâlji s-disfeatsiră, sh-multi trupuri a sâmtsâlor tsi avea murit, s-nyeară.

⁵³ Elji ishiră dit murmintsă după nyearea a Isusului, intrară tu sântul căsăbă shi s-aspusiră la mulțasă.

⁵⁴ Tora centurionlu sh-atseji tsi deadun cu năsu vigljea Isusul, cându vidzură cutremburarea sh-atseali tsi s-featsiră, s-aspărară multu, sh-dzâsiră: "Dealihea aestu eara Hiljiu a Dumnidzâlui!"

⁵⁵ Aclo era sh-multi muljeri tsi mutrea di diparti. Eali avea urmată Isusul di Galilea tsi s-lji huzmitipsea.

⁵⁶ Namisa di năsi eara Maria Magdalena, Maria, muma al Iacov sh-al Iosif, sh-muma a hiljilor al Zevedeu.

Ngruparea al Isus

⁵⁷ Sh-cum ntunică, vini un om avut di Arimatea, cu numa Iosif, cai eara sh-năsu uceniclu al Isus.

⁵⁸ Elu s-dusi la Pilatul sh-lji căftă trupu al Isus. Atumtsea Pilatul deadi ordin tsi s-lj dădea trupu.

⁵⁹ Sh-Iosiful, după tsi lu lo trupu lu anvărti cu ună pândză curată

⁶⁰ sh-lu băgă tu murmintul atsel noulu, tsi elu avea disfaptă tu un cheatră. Deapoea arucuti ună cheatră mari tu intrata a murmintului, sh-fudzi.

⁶¹ Sh-Maria Magdalena sh-alantă Marii shidea aclo, năntea a murmintului.

⁶² Sh-tu alantă dzuă, tsi eara după dzua a adărarâljei, mărili a preftsălor sh-Fariseilji s-adunară la Pilatul,

⁶³ dzăcânda: "Doamne, nă adusim a minti că atsel arăditor, cându eara yiu, dzăsi: 'După trei dzăli mini va mi nyedz.'"

⁶⁴ Tră atsea dă ordin tsi murmintul si s-veaglji ghini până tu dzua a treia, s-nu yină ucenitsilji a lui noaptea shi s-lu fură trupu sh-deapoea s-lji dzăcă a popului: 'Si-sculă dit mortsă,' sh-ashă arădearea di ma napoea, va s-eara ma arău di atsea di ma năinti."

⁶⁵ Pilatul lji dzăsi a lor: "Viglitorlu lu avets, dutsets-vă shi siguripsits-lu, cum s-vă si veadi ma ghini."

⁶⁶ Sh-elji s-dusiră sh-lu siguripsiră murmintul, băgară viglitorlu sh-vulusiră cheatra.

28

Nyearea

¹ Tora tu bitisita a Sămbătâljei, cându ma apirea prota dzuă a săptămâniljei, Maria Magdalena sh-alantă Marii s-dusiră s-videa murmintul.

² Sh-ia s-featsi un mari cutrembur, sh-un anghil a Domnului dipusi dit tser, vini sh-arucuti cheatra di la intrata a murmintului shi shidzu pri năsă.

³ Videarea a lui eara ca ascăpirarea sh-nvishtearea a lui albă ca neaua.

⁴ Sh-di frica a lui, viglitorlji trimurară sh-armasiră ca mortsă,

⁵ ma anghilu lă dzăsi a muljerilor: "S-nu avets frică, că mini shtiu că voi căftats Isusul, tsi s-crutsisi.

⁶ Elu nu easti aoa, că s-nyie, după cum vă avea dzăsă. Yinitsă, videts loclu iu eara băgată Domnul.

⁷ Dutsets-vă trăoară sh-dzătsets a ucenitsilor a lui că elu s-nyie dit mortsă. Sh-ia, ma neadzi năntea a voastră tu Galilea. Aclo va lu videts. Ia, v-ău aspush."

⁸ Eali, s-dipărtară trăoară di la murmintul cu frică sh-cu harauă marii, shi s-dusiră trăoară s-dutsea hăbarea la ucenitsilji a lui.

⁹ Niashtiptat Isusul lâ ishi năinti sh-lă dzăsi: "Sănătati!" Atumtsea eali s-aprucheară, lji acătsară cicioarili, shi si ncljinară.

¹⁰ Atumtsea Isusul lâ dzăsi a lor: "S-nu avets frică, dutsets-vă dzătsets a fratsălor a melji tsi s-ducă tu Galilea sh-aclo va s-mi veadă."

Hăbărsirea Nialihioasă a Suldatsilor

¹¹ După tsi elji ma s-dutsea, niscăntsă di vigljitorlji, agiumsiră tu cāsăbă sh-dzăsiră la mărili a preftsălor tuti atseali tsi eara faptă.

¹² Atumtsea aeshti featsiră plan cu aushlji sh-apofăsiră s-lă da a suldat-silor multă părădzi,

¹³ dzăcānda a lor: "Dzătsets: 'Ucenitsilji a lui viniră noaptea sh-lu furară trupu, cāndu noi durnjeam.'

¹⁴ Sh-macă aestă va lu avdă guvernatorlu, noi va lu cāndărsim atsel, sh-va lu fătsem tsi voi s-nu avets mirachi."

¹⁵ Sh-elji loară părădzli sh-featsiră ashă cum lji nvitsară, sh-aestu zbor s-arăspāndi la Iudeilji pānă tu dzua di ază.

Fănirusirea al Isus tu Galilea

¹⁶ Deapoea di unsprădzatsi di ucenjitsilji s-dusiră tu Galilea, tu muntili atsel iu avea dimăndată Isusul,

¹⁷ sh-cāndu lu vidzură, si ncljinară, ma niscăntsă si ndoljiră.

¹⁸ Deapoea Isusul s-apruche, sh-lă dzăsi a lor: "A njia nji si easti dată cathi puteari tu tser sh-pri loc.

¹⁹ Dutsets-vă sh-nvitsats ucenitsi di tuti fărili, pătizdānda tu numa a Tatălui, sh-a Hiljiui sh-a Sămtului Duh,

²⁰ shi s-nveatsă s-facă tuti aesti tsi mini am dimăndată. Sh-ia, mini escu cu voi tuti dzălili, pānă tu bitisita a etiljei."

Evangelu După Marcu

¹ Ahurhirea a Evangelulului al Isus Hristos, Hiljilu al Dumnidzâu.

² Ashâ cum easti scriată la prufitul Isaia:

"Ia, mini [Dumnidzâlu] ma pitrec mandatorlu a meu dininti a fatsâljei a ta, tsi va s-ndreagă calea a ta dininti a ta,

³ boatsea atsilui tsi aurlă tu irnjii:

'Ndridzets-lu calea a Domnului, ndreptatsă căljurili a lui!' "

⁴ Ioanul vini tu irnjii ti pătîdzari, predicânda un pătîdzari tră mitânjusirea a amârtilor tsi Dumnidzâlu s-li ljeartă.

⁵ Sh-tut loclu al Iudei sh-atselji di Ierusalem nidzea la elu shi s-pătîdza tuts di la nâsu la râulu Iordan spunânda amârtili a lor.

⁶ Ma Ioanul eara nviscut cu stranji di lăăn ali gămili, tsănea un curauă di cheali avârliga di ilji shi măca carcalets sh-njeari agră.

⁷ Elu ma predica dzăcânda: "După mini yini un tsi easti ma vartos di mini. Mini nu escu axiu nits s-mi apună dininti a lui ti dizligari ligătura a-sandalilor a lui.

⁸ Mini vâ pătîdzai cu apă, ma elu va vâ pătîdzească cu Duhlu Sămtu."

⁹ Sh-tu atseali dzăli undzi tsi Isusul vini di la Nazaretul a Galileiljei shi s-pătîdză di la Ioanul tu Iordan.

¹⁰ Shi dinăoară cându ma insha di apă, vidzu că tserurili ma s-discljidea shi Duhlu ma dipuna pri năsu ca purumbu.

¹¹ Sh-ună boatsi vini dit tseruri: "Tini eshti Hiljilu a meu vrutu cu cai escu hărsit."

¹² Sh-dinăoară Duhlu Sămtu lu-adusi tu irnjii.

¹³ Elu armasu tu irnjii patrudzătsi di dzăli, băgati tu cārteari di Satanlu. Sh-eara deadun cu agrimilji, shi anghilji l-huzmitipsea.

¹⁴ Shi după tsi Ioanul u hăpsănră, Isus vini tu Galilei predicânda evangelul al Dumnidzâu.

¹⁵ Sh-dzăcânda: "Agiumsi chirolu shi s-apruche amirăriljea al Dumnidzâu. Mitânjusits-vă sh-pistipsits evangelul."

¹⁶ Trăcânda pri nînga amarea a Galileiljei, vidzu Simonlu sh-Andrea, frātli a lui, arcânda plăsile tu amari că eara piscării.

¹⁷ Shi Isus lă dzăsi a lor: "Urmatsmă shi mini va vâ facă piscării a oamnjilor."

¹⁸ Sh-trăoară atselji alăsară plăsili shi s-dusiră după năsu.

¹⁹ După tsi imnă nînga niheam, vidzu Iacovul, hiljilu al Zebedeu shi Ioan, frātli a lui tsi mpitica plăsili a lor tu varcă.

²⁰ Sh-trăoară li-achljimă shi elji lu-alăsară tatilu a lor, Zevedeul tu varcă cu lucrutorlji, shi s-dusiră după năsu.

²¹ Deapoea intrară tu Capernaum shi dzua di Sămbătă trăoară intrară tu sinagogă shi nvitsa oamijnlji.

²² Sh-oamijnlji s-ciudisiră di nvitsătura-a lui, că elu lji nvitsa ca un tsi ari puteari sh-nu ca scriblji.

²³ Atumtsea tu sinagoga-a lor eara un om putut cu un duh nicurat, tsi ahurhi s-aurlă,

²⁴ dzăcânda: "Tsi ari namisa di noi sh-di voi, Isus di Nazaret? Vinish tsi s-nă cherdzi? Mini lu shtiu cai eshti: Sămtulu al Dumnidzâu."

²⁵ Shi Isusul lu ursi dzăcânda: "Tats sh-eshi di la elu."

²⁶ Shi duhlu nicurat, după tsi lu ascutură, aurlă cu mari sh-ishi di la năsu.

²⁷ Sh-tuts s-ciudisiră ahtât multu cât ntriba un-alantu dzăcânda: Vahi tsi easti atsea? Tsi nvitsitură noauă easti atsea? Aestu lji urseashti cu puteari shi duhurili nicurati shi elji lu ascultă.

²⁸ Shi anamea a lui s-avdză dinăoară pri tută loclu avărliga a Galileiljei.

²⁹ Cum ishiră elji dit sinagogă, s-dusiră la casa al Simon shi al Andrei, cu Iacovul sh-cu Ioanul.

³⁰ Soacra al Simon eara băgată cu heavră, shi dinăoară elji lji-spusiră ti nășă.

³¹ Atumtsea elu s-apruche, lu-acătsă di mână shi-u sculă. Trăoară hevrili u-alăsară shi ea ahurhi s-lă huzmitipsească.

³² Seara după ascăpitarea a-soarilui, lji adusiră tuts lăndzitslji shi dracuit-slji.

³³ Sh-tută cāsăbălu eara adunat năinti ali ushi.

³⁴ Elu vindică mults di atselji tsi s-mundua di multi soi ti lăngoari, shi aghiuni multsă dratsi, sh-nu alăsă dratsilji s-grească, că elji lu-cunushtea.

³⁵ Deapoea, dimineatsa curund cându ńinga nu avea apirit, Isusul si-sculă, ishi shi s-dusi tu un loc ermu shi aclo s-părăcălsii.

³⁶ Shi Simonlu sh-atselji tsi eara cu năsu, lu-căfta.

³⁷ Shi cându lu aflară lji-dzăsiră: "Tuts ma ti caftă."

³⁸ Shi elu lă dzăsi a lor: "Hai s-nidzem tu hoarili di aproapi tsi s-preadică shi-aclo, că ti aestă am vinită."

³⁹ Shi elu tricu tută Galilea predicănda pri sinagogăli-a lor shi aĝunea dratsilji.

⁴⁰ Shi vini la elu un lepros, tsi părăcălsănda lji-cădzu pi dzinuclji sh-lji dzăsi: "Ma s-vrei tini, pots s-mi curi."

⁴¹ Shi Isusul sâmtsănda njilă, lu timsi mână pri năsu sh-lji dzăsi: "Te, voi, s-hii curat!"

⁴² Macăt dzăsi aesti, dinăoară lepra lu-alăsă shi s-vindică.

⁴³ Deapoea, după tsi lu-ursi, trăoară lu dipărtă,

⁴⁴ dzăcânda: "Vedz s-nu lji spunji tsiva-a vărui, ma imnă la preftu, shi dă tsiva tră curarea-a ta, cum easti ursit tu legile a Moisiului, ca mărtirii tră năshi."

⁴⁵ Ma elu, ishinda, apărnji s-grească shi sâ scurpisească la mults faptulu, ahtât multu cât Isusul nu putea s-intra discljis tu cāsăbă, ma stătea nafoară pri locuri ermi. Sh-di tuti părtsili yinea la năsu.

2

Paralizatlu al Capernaum

¹ După ndoauă dzăli, Isus vini năpoi tu Capernaum shi s-avdză că elu eara la casă.

² Dinăoară s-adunară ahănts mults oaminji cât nu aflai loc nitsi dininti ali poarti. Sh-elu lă nvitsa zborlu.

³ Atumtsea viniră niscăntsi, tsi adusiră un om paralizat tsi lu-purta patru ishi.

⁴ Ma niputănda s-apruchia ti itia a multsămiljei, dizvălră plocili a citiiljei iu eara Isusul, shi după tsi disfeatsiră ună guvă lu-dipusiră patlu pi cai stătea paralizatlu.

⁵ Isusul vidzănda pista a lor lji-dzăsi a paralizatlui: "Hilje, amărtiili a tali sântu ljirtati!"

⁶ Ma atsia shidea niscăntsă scribi tsi tu ininjli a lor minduia:

⁷ “Cătse vahi aestu ma blastimă? Cai poati s-ljeartă amărtiili, singur di Dumnidzălu?”

⁸ Ma Isusul tsi trăoară aduchi tu suflitu a lui că elji ma minduia aesti lucrî cu mintea-a lor, lă dzăsi: “Cătse li minduits aesti lucrî tu ininjli a voastri?”

⁹ Tsi easti ma lishor s-lji dzătsă a paralizatlu: ‘Amărtiili a tali sântu ljirtati’, ama s-lji dzătsă: ‘Scoală-ti, ljea patlu a tău sh-imnă!’?”

¹⁰ Ma tra si-shtits că Hiljilu-a omlui ari puteari s-ljeartă amărtiili pri loc,

¹¹ mini ma ts-dzăcă: ‘Scoală-ti, ljea patlu shi imnă la casa a ta!’ ”

¹² Shi elu si sculă dinăoară, lo patlu a lui, shi ishi afoară dininti a tutslor, shi ashă tuts s-ciudisiră shi alăvdară Dumnidzălu dzăcânda: “Ună ahtari thavmă nu u-avem vidzut pute!”

Acljimarea al Levi

¹³ Isus ishi năpoi mardzina di amari shi multsămea yinea la năsu shi elu lă-nvitsa.

¹⁴ Trăcânda vidzu Levilu, hiljilu al Alfeu apunat iu s-pâltea taxa, sh-lji dzăsi: “Urmeadz-mil!” Sh-elu si sculă shi s-dusi după năsu.

¹⁵ Sh-ma năpoi cându Isusul eara la measă la casa a Levilui, multsă taxidări sh-amărtioshi shădea la measă cu Isusul sh-cu ucenitsilji a lui, că eara multsă atselji tsi nidzea după năsu.

¹⁶ Atumtsea scriblji shi Fariseilji, cându vidzură că ma măca deadun cu taxidărli shi amărtioshlji, lă-dzăsiră a ucenitsilor a lui: “Cum măcă sh-bea elu deadun cu taxidărli shi amărtioshlji?”

¹⁷ Sh-Isusul cându li avdză, lă-dzăsi a lor: “Nu sântu sânătoshlji tsi au ananghi ti iatrulu, ma lăndzitslji. Mini nu vinj s-acljemă ndreptsilji, ma amărtioshlji tră mitănjusiri.”

Nvitsătura Atsea Noaua al Isus shi Traditsia Atsea Veaclja

¹⁸ Atumtsea ucenitsilji al Ioan shi a Fariseilor tsănea păreasinji. Atselji viniră la Isusul shi lu ntribară: “Cătse ucenitsilji al Ioan shi atselji al Fariseilor tsănă păreasinji, shi ucenitsilji a tălji nu tsăn păreasinji?”

¹⁹ Sh-Isusul răspunsi a-lor: “Pot s-tsănă preasinji acljimatsilji pi numtă cându dzinirlu easti cu elji? Di cât chiro dzinirlu easti cu elji nu pot s-tsănă preasinji!”

²⁰ Ma va s-yină dzălili cându va s-hibă loată dzinirlu di la elji, shi atumtsea tu atseali dzăli elji va s-tsănă păreasinji.

²¹ Vără nu bagă tu un stranji vecljiu un peticu nou, că altă soi lu arupi stranjilu shi azmuldzearea s-fatsi ma mară.

²² Tută ashă vără nu bagă yinu nou tu foali veachli, altă soi yinlu atsel noulu aspardzi foalili, yinlu s-vearsi shi foalili cheară, ashă că yinlu atselu noulu s-bagă tu foali nali.”

Isus, Domnul a Sămbătăljei

²³ Shi undzi tsi ună dzuă di Sămbătă elu ma tritsea namisa di agri siminati, shi trăcânda ucenitsilji a lui arupea shipuri.

²⁴ Shi Fariseilji lji-dzăsiră: “Vedză, cătse lu facă aestă tsi nu prindi s-lu facă dzua di Sămbătă?”

²⁵ Shi elu lă dzăsi a lor: “Ma nu avets ghivăsită tu Scriturili tsi featsi Davidul, cându avea ananghi shi agiuna, elu shi tuts alantsilji tsi eara cu năsu?”

²⁶ Elu intră tu casa al Dumnidzău tu chirolu a arhipreftului Abiatar, shi măcă pânjili di dininti, tsi nu prindi s-li măca nitsiunu, ma singur preftsălji, shi elu lă deadi sh-atsilor tsi eara cu năsu.”

²⁷ Deapoea lă dzăsi a lor: “Sămbăta easti făptă ti omlu, sh-nu omlu ti Sămbăta.”

²⁸ Tră atsea Hiljilu a omlui easti Domn a Sămbătăljei.

3

Omlu cu Măna Uscat

¹ Deapoea elu intră tu sinagogă, shi aclo eara un om cu măna uscată.

² Niscăntsă lu vigljea Isusul macă va lu vindica dzua di Sămbătă, shi deapoea s-lu vârghea.

³ Elu lji-dzăsi a omlui cu măna uscată: “Scoală-ti namisa a tutlor!”

⁴ Deapoea lă dzăsi a lor: “Tsi easti ndreptu dzua di Sămbătă, s-fatsă ghini ică s-fatsă arău, s-ascachi un suflit ică su-vatsânjă?” Ma elji tătsea.

⁵ Atumtsea elu, cum lj-vidzu avărliga cu inati, shi nvirinat că ininjili a lor eara indiferenti, lji dzăsi a omlui: “Tindă măna!” Elu u timsi shi măna a lui s-featsi ca alanta sănătoasă.

⁶ Sh-Fariseilji ishiră afoară shi trăoară apofasiră cu Herodianjilji, cum su-vatămă.

Isusul Aleapsi Di Doispărdzatsilji

⁷ Isusul cu ucenitsilji a lui s-dusi cătră amari shi ună multsămi mari di oaminj dit Galilea shi dit Iudea lu-urmă,

⁸ sh-dit Ierusalim, sh-dit Idumea, sh-di napărti di Iordan, tutashă ună multsămi mari di avărliga di Tiro sh-di Sidon. Căndu avdzără atseali lucruri mări tsi elu fătsea, viniră la năsu.

⁹ Sh-elulă dzăsi a ucenitsilor a lui s-aibă totăna etimu ună varcă, tsi lumea s-nu-u pindzea.

¹⁰ Elu avea vindicată multsă oaminj, tuts tsi avea lăngoari s-aduna avărliga di năsu s-băga măna pi năsu.

¹¹ Shi duhurili nicurati anda u-vidua cădea pi dintsi dininti a lui sh-aurla dzăcānda: “Tini eshti Hiljilu al Dumnidzău!”

¹² Ma elu lji vârghea tsi s-nu spunea căi eara elu.

¹³ Deapoea elu s-alină pri munti, shi acljimă aproapi di năsu atselji tsi vrea. Shi elji viniră la năsu.

¹⁴ Sh-elulă aleapsi doispărdzatsi (tsi s-acljima apostulji), s-hibă cu năsu shi s-lji pitritsea s-predica,

¹⁵ shi s-avea puteari s-ağunească dratsilji.

¹⁶ Shi ia doispărdzatsilji: Simonlu, a cui lj băgă numa Petru,

¹⁷ Iacovul, hiljilu al Zebedeu, shi Ioani, frătii al Iacov, tsi lă băgă numa Boanerges, tsi va s-dzăcă hiljilji a bubunidzariljei.

¹⁸ Andrea, Filip, Bartolomeu, Matei, Toma, Iacovul, hiljilu al Alfeu, Tadeu, shi Simon Cananeanlu,

¹⁹ shi Iuda Iscariotul, tsi ma năpoi lu vindu.

Blăstimarea a Fariseilor

²⁰ Apoea intrără la ună casă. Shi s-adună ună multsămi mară cât nitsi pāni nu putea s-măca.

²¹ Shi căndu soia a lui lo di hăbari, s-dusi su-ljea, că dzătsea: “Nu easti ghini di minti.”

²² Iară scriblji tsi avea dipunată dit Ieruzalem, dzătsea: “Elu ari Buelze-bubul sh-lji aġuneashti dratsilji cu printsilu a dratsilor.”

²³ Ma elu li-acljimă aproapi di năsu shi lă gri cu parabolă: “Cum poati Satanlu su aġunească Satanlu?”

²⁴ Ma cā ună amirārili di năuntru easti mpārtsătă, atsea amirārile nu poati s-băneadză.

²⁵ Macă ună casă di năuntru sâ-mpartsă, atsea casă nu poati s-băneadză.

²⁶ Ashă, macă Satanlu si-scoală contra a vetiljei a lui, shi easti pârtsăt, nu poati si s-tsână, ma s-bitiseashti ică cheari.

²⁷ Nitsiun nu-poati s-intră tu casa a omlui vartos shi s-lji-u arăchească avearea a lui, nî lăgată ma năinti omlu atsel vartoslu, atumtsea poati s-lji-u afură casa.

²⁸ Dealihia ma vā dzăc cā a oamnjilor va s-lă hibă ljirtati itsi amărtii shi cathi blăstem tsi va s-dzăc.

²⁹ Ma di atselu tsi va s-blăsteamă contra a Duhlui Sămtu nu va s-aibă ljirtari di totăna. Elu easti amărtios ti eta tută.”

³⁰ Isusul li dzăsi aesti cā elji dzătsea: “Elu ari un duh nicurat!”

Fumeljea al Isus

³¹ Tu ȡara atsea viniră fratsilji a lui shi muma, shi stănda afoară, pitricură sh-lji griră.

³² Multsămea eara apunat avărliga di năsu, shi-lji dzăsiră: “Ia, muma shi fratsilji a tălji, sântu nafoară sh-ma ti caftă.”

³³ Ma elu apăndisi a lor: “Cai easti muma-a mea ică fratsilji a melji?”

³⁴ Daepoea, mutrinda avărliga di atselji tsi shădea ningă năsu, dzăsi: “Ia, muma-a mea shi fratsilji-a melji!”

³⁵ Că, caitsido tsi fatsi vrearea al Dumnidzău, elu easti fratili-a meu, sora-a mea shi muma.”

4

Parabola a Siminătorlu

¹ Deapoea Isusul apărni sâ-nveatsă mardzina di amari. Shi avărliga di năsu s-adună un multsămi mari di oaminj, cāt elu intră tu varcă shi-shădea pi năsă, shi tută multsămea eara mardzina di amari.

² Sh-elu lă nvitsa a lor cu paraboli multi lucruri, shi tu nvitsătura-a lui lă dzăsi:

³ “Ascultats! Ia, ishi siminătorlu s-seamină.

⁴ Sh-cāndu elu simina, niscănti gārăts a farăljei cādzură pi cali shi puljilji a tserlui viniră shi l-măcară.

⁵ Sh-putsân di fară cādzu pi loc chitros, iu nu avea multă tsară shi deadi dinăoară, cā nu avea tsară hăndoasă.

⁶ Ma cāndu ishi soarili s-pălră sh-ti atsea, tsi nu avea rādătsină s-uscă.

⁷ Sh-ună parti a farăljei cādzu namisa di schinji, schinjilji criscură, lji acătsară anasa sh-nu deadi carpo.

⁸ Ună altă parti cādzu pi tsară bună, sh-deadi carpo tsi crishtea sh-adusi: ună treidzătsi, alanta shăidzătsi, sh-alanta ună sută.”

⁹ Deapoea elu lă dzăsi a lor: “Cai ari urechlji tră avdzări, s-avdă.”

¹⁰ Cāndu Isusul eara singur, atselji tsi eara avărliga di năsu deadun cu doisprădzatsilji, lu ntribară ti parabola.

¹¹ Elu lă dzăsi a lor: “A voauă vā easti dată s-cunushtets mistiryiul a amirāriljei al Dumnidzău, iară atsilor tsi sântu afoară tuti aesti sâ si da cu paraboli:

12 *'Mutrinda, s-veadã ma s-nu bagã oarã,
shi avdzãnda, s-avdã ma s-nu aducheascã,
cã s-nu mitãnjuseascã
shi amãrtiili s-ljeartã.'*"

Aducherea a Parabolãjei

13 Deapoea lã dzãsi a lor: "Nu u-aduchits aestã parabolã? Ma atumtsea cum va lî aduchits tuti alanti parabolî?"

14 Siminãtorlu seaminã Zborlu.

15 Atselji ningã cali sãntu atselji pri la cai si seaminã zborlu, ma dupã tsi u-avdzãrã atsea, yini trãoarã Satanlu shi lã-scoati sborlu siminatã la nãshi.

16 Tutashã atselji tsi u-ljea fara pri chetri, sãntu atselji tsi cãndu lu avdzãrã zborlu, trãoarã u ljea cu harauã,

17 ma tsi nu acãtsarã rãdãtsinã pri nãshi, shi sãntu ti putsãn chiro, shi cãndu yini zorea icã avinarea trã itia a-zborlui, si-scandalizescu trãoarã.

18 Atselji cai u-ljea fara namisa di scinj, sãntu atselji tsi lu-ascultã zborlu,

19 ma nvirinãrili-a ashtiei eti, arãderili-a averilor, shi mania ti alti lucruri tsi lji intrã a omlui, astupu sborlu shi nu da carpo.

20 Iarã atselji tsi u loarã fara tu tsarã bunã, sãntu atselji tsi ascultã sborlu, u ljea shi aducã carpo: un treidzãts, altu shaidzãts shi altu unã sutã."

Parabola a Lambãljei

21 Deapoea lã dzãsi a lor: "Vahi s-bagã lamba sum un gãleatã icã sum un pat? Nu si s-bagã pri purtãtorul ali lunjini?"

22 Cã nu ari tsiva ascumtu tsi s-nu s-dizvileascã, shi tsiva faptu pri ascumtu tsi s-nu easã tu lunjinã.

23 Cai ari ureclji ti avdzãri, s-avdã!"

24 Shi lã dzãsi a lor: "Bãgats oarã atsea tsi avdzãtsã. Cu atsea misurã tsi voi misurats, va vã si misurã, shi a voauã tsi avdzãts va vã si da ma multu.

25 Cã atsilui tsi ari va lji si da, ma atsilui tsi nu ari va lji si ljea shi atsea tsi ari."

Parabola a Simintsãljei

26 Isusul dzãsi: "Amirãriljea al Dumnidzãu easti ca un om tsi arucã simintsa pri loc.

27 Noaptea shi dzua, cãndu elu doarmi shi si scoalã, simintsa fitruseashti shi creashti, fãrã shi stibã elu cum.

28 Di singur loclu lu fatsi: ma nãinti curpanlu, sh-apoea schiclu, shi tu soni schiclu cu gãrnutsi.

29 Iarã cãndu carpolu s-coatsi, trãoarã s-bagã seatsira, cã yini oara di sitsirari."

Parabola a Simintsãljei di Sinap

30 Elu dzãsi: "Cu tsi undzeashti amirãriljea al Dumnidzãu? Icã cu tsi parabolã su-aspunem?"

31 Ea undzeashti cu simintsa di sinap tsi easti siminat tu loc. Atsea simintsa easti ma njicã pri loc.

32 Ma dupã tsi si seaminã, creashti shi s-fatsi ma mari di tuti zãrzãvãtsile, shi sãlgheashti alumãchi ahãti mãri cãt puljilji a tserlui poatã s-aflã streahã sum aumbra a lor."

33 Shi cu multi ahtãri paraboli lã spunea a lor sborlu, ashã cum elji putea s-lu achicãsea.

34 Sh-nu lã grea a lor fãrã paraboli, iarã a ucenitsilor a lui ahoria, lã spunea itsido.

Isusul shi Furtuna

³⁵ Tu seara a aishte dzuă, lă dzăsi a lor: "Tritsem pi alantă parti."

³⁶ Sh-ucenitsilji, cum u nchisiră multsămea, u loară Isusul ashă cum eara tu varcă. Cu năsu eara sh-niscănti vârtsi njtsi.

³⁷ Tu oară aestă si s-featsi ună furtună mari shi vâljiurili s-plăscănea pri varcă ahât multă cât ea ma s-umplea.

³⁸ Iară elu durnjea tu varcă pri ună căpitiņ. Elji lu dishtiptară shi lji dzăsiră: "Nvitsătore nu ai mirachi tră noi că ma ni nicăm?"

³⁹ Sh-elu cum si dishtiptă lji aurlă a vimtului sh-lji gri ali amari: "Tătsă shi isihăsea-ti!" Shi vimtulu păpsi shi s-featsi isihii mari.

⁴⁰ Sh-lă dzăsi a lor: "Cătse hits ahânt fricoshi? Cum nu avets pisti?"

⁴¹ Sh-elji lji acătsă ună frică mari shi dzătsea un cu-alantu: "Cai easti aesti tsi lu ascultă sh-vimtulu sh-amarea?"

5

Demonizatul Gadarean

¹ Ashă agiunsiră tu alantă parti a amarâllei tu locurili a Gherasenjiilor.

² Shi macăt Isusul dipună dit varcă, trăoară lji ishi năinti dit murmintsă* un om umplut cu un duh nicurat,

³ elu băna tu murmintsă sh-vără nu avea putut s-lu liga cu singir.

⁴ Di multi ori lu avea ligată cu prănghi shi singir, ma elu totăna frândzea singirili sh-arupea prănghili, sh-nitsiunu nu putea s-lu imireadză.

⁵ Dipriună noaptea sh-dzua, prit murmintsă sh-prit muntsă, tritsea aurlănda shi tăljănda truclu a lui cu chetri.

⁶ Căndu elu lu vidzu Isusul di diparti, imnă shi s-ncljină dininti a lui.

⁷ Sh-cu ună aurlari mari dzăsi: "Tsi ari namisa di mini sh-di tini, Isus, Hiljilu al Dumnidzău atsel multu analtu? Mini mi spigiură pi numa al Dumnidzău, nu mi pidipsea!"

⁸ Că Isusul lji-avea dzășă: "Duh nicurat, eshi dit aestu om!"

⁹ Atumtsea Isusul lu ntribă: "Cai easti numa a ta?" Shi elu apândisi dzăcānda: "Mini mi acljeamă Legion, că him multsă."

¹⁰ Shi l-părăcălsea multu tsi si ni lu agunească dit loclu atselu.

¹¹ Aclo la coasta a muntului eara ună cupii mari di portsi tsi păshtea.

¹² Atumtsea tuts demonjili părăcălsiră dzăcānda: "Pitreatsi-nă la portsi tsi s-intrăm tu năshi."

¹³ Sh-Isusul trăoară lă deadi izini a lor, sh-duhurili nicurati după tsi ishiră, intrară la portsilji, sh-cupia s-arucă nghios di tu ripă tu amari. Era aproape doauă njilji di capiti tsi s-nicară tu amari.

¹⁴ Atselji tsi păshtea portsilji fudziră sh-u scurpisiră shtirea tu cāsăbă sh-pri hoari. Sh-oamnjili viniră s-videa tsi avea undzită.

¹⁵ Căndu viniră la Isus, vidzură drăcuittu mpadi, nviscut sh-cu mintea ntreag, atselu tsi eara demonizat di leghionlu, shi avea frică.

¹⁶ Atselji tsi u avea vidzută, lji spusiră a lor că tsi lji avea undzită a demonizatului shi a portsilor.

¹⁷ Atumsina atselji ahurhiră s-lji părăcălsească al Isus s-fugă di sinurili a lor.

¹⁸ Căndu elu ma intra tu varcă, atselu tsi eara demonizat lji părăcălsea tsi s-putea s-fudzea cu năsu.

* 5:2 murmintsă Easti una guvă tălaj tu chieatră, iu Ideilji li băga mortsilii a lor.

¹⁹ Ma Isusul nu lji deadi izini, shi lj-dzâsi: "Imnă la casa a ta, la-a tălji shi spună a-lor tsi lucrî mări featsi Domnul shi cum ti njilui."

²⁰ Sh-elu fudzi shi ahurhi sâ predica pri regiunea di Decapolis di tuti atseali tsi avea faptă Isusul shi tuts s-ciudisiră.

Muljearea cu Curarea a Sândzilui

²¹ Shi cându Isus tricu năpoi tu alantă parti cu varcă, un multsămi mară s-adună avărliga di năsu, sh-elu armasî mardzina di amari.

²² Deapoea vini un di ma mărli a sinagogălei, cu numa Iair, tsi cându lu vidzu, lj-cădzu la picioari.

²³ Sh-multu lă părăcâlsî dzăcânda: "Hiljea a mea ma moari, haidi shi bagă mājili pri năsă, tsi s-vindică shi s-băneadză."

²⁴ Sh-elu s-dusi cu năsu, sh-ună multsămi mari nidzea după năsu shi s-pindzea avărliga di năsu.

²⁵ Namisa di năshi eara ună muljeari tsi lj-cura sândzili di doisprădzatsi di anji.

²⁶ Sh-avea traptă multi di partea a iatsrilor sh-avea chirută tută avearea a ljei fără uflili, sh-ma s-fătsea ma rău.

²⁷ Cându avdză si zbură di Isusul, intră la multsămea, sh-după năsă timsi mână la stranjilu al Isus.

²⁸ Ea dzătsea: "Macă va bagă mână la stranjili a lui, va mi vindică."

²⁹ Sh-trăoară curarea a sândzilui păpsi shi ea sāmtsă tu truplu a ljei că s-vindică di atsea lăngoari.

³⁰ Ma trăoară Isusul sāmtsă un puteari tsi avea ishî di la năsu, s-turnă cătră multsămea sh-dzâsi: "Cai deadi di stranjili a mealî?"

³¹ Sh-ucenitsilji a lui lji-dzâsiră: "Nu vedz că multsămea ma s-pingă di tuti pārsālî shi tini dzătsi: 'Cai deadi di minî?' "

³² Elu mutrea avărliga s-videă cai u featsi aestă.

³³ Atumtsea, muljearea mplină di frică sh-trimurânda, că shtia tsi avea pāsătă, vini shi lji cădzu pi picioari shi lj-spusi tută alihea.

³⁴ Sh-elu lj-dzâsi: "Hilje, pista a ta ti-vindică, imnă tu pace că eshti vindicată di lăngoarea a ta!"

Hiljea al Iair

³⁵ Iară Isusul ninga ma grea, viniră niscăntsi di la casa a primarlui a sinagogălei dzăcândă: "Hjiljea a ta muri. Cătse lu cārteshti ninga nvitsătorlu?"

³⁶ Ma Isusul cându avdză tsi dzăsiră, lji dzăsi a primarlui a sinagogălei: "Nu ti aspară, mash s-ai pistusini!"

³⁷ Nu alăsă s-lu urmeadză nitsiun altă, dicăt mash Petrul, Iacovul shi Ioanul, fratli al Iacov.

³⁸ Shi după cum agiumsî la casa a marlui a sinagogălei, vidzu ună mintitură mari shi oaminji tsi plândzea shi văita cu boatsi.

³⁹ Intră sh-lă dzăsi a lor: "Cătse aurlats shi plândzets? Feata nu muri, ma doarmi."

⁴⁰ Elji s-pizuiră, ma elu după tsi lji scoasi tuts afoară, lo cu năsu tat-su shi mās-a-a li feati sh-atseljî tsi eara cu năsă, sh-intră aclo iu eara feata.

⁴¹ Elu u lo feata di mână shi lj-dzâsi: "Talitha kumi", tsi va s-dzacă: "Feată, atsăia ma tsă-dzăc: Scoală-ti!"

⁴² Trăoară feata si sculă sh-imnă singur. Ea eara di doisprădzatsi di anji. Sh-elji s-ciudisiră multu.

⁴³ Ma elu lă deadi ordin tsi vără s-nu shtia. Sh-lă ursi si lj-da ali feati di măcari.

6

Isus Ni-apruchiat tu Nazaret

¹ Apoea Isusul fudzi di aclo sh-vini tu tsara a lui, shi ucenitsilji a lui u urmară.

² Cându vini Sămbăta, ahurhi sã li nvitsa tu sinagogă. Sh-multsã cându lu-avdza, s-ciudisea sh-dzătsea: "Di iu lj-yinã aishtui aesti? Tsi mintiminiljii easti atsea tsi lj-easti dată? Sh-cum s-facã aesti thavmati cu mănjlili a lui?"

³ Nu easti aestu lemnar, hiljilu ali Marii, fratili al Iacov, sh-al Iose, al Iuda sh-al Simon? Sh-nu sântu aoa namisa di noi surărlili a lui?" Shi si scandalizea di itia a lui.

⁴ Isusul lă dzăsi a lor: "Nitsiunu profit nu easti dispretsuit dicăt mash tu patria a lui, tu soia a lui sh-tu casa a lui."

⁵ Sh-nu pătu s-facã atsia nitsiunã thavmă, dicăt mash s-vindică vărăndoi lăndzitsă băgānda mânia pri năshi.

⁶ Shi s-ciudisea ti nipistipsirea a lor. Isusul imna avărliga pri hoarili sh-lă-nvitsa.

Misionul a Doisprădzătsilor

⁷ Sh-lă acljimă atselji doisprădzătsi sh-ahurhi s-lji pitreacă doi căti doi sh-u deadi puteari pristi duhurili nicurati.

⁸ Sh-lă dimăndă s-nu ljea tsiva altă pri cali, dicăt mash ună ciomagă, nitsi trastă, nitsi pāni, nitsi pāradzi tu brân,

⁹ Ma s-ncalcă mash sandalili shi s-nu bagă doauă păreacli di tunică.

¹⁰ Deapoea lă dzăsi: "Iutsido tsi s-intrats tu ună casă, armānets aclo pănă s-fudzit di aclo.

¹¹ Macă niscăntsă nu vă ashteaptă sh-nu vă avdă, cându s-fudzits di aclo, ascuturats puhlu di cicioarili-a voastri, ca mārtiri contra-a lor. [Dealihea vă dzăc că dzua a giudicarăljei Sodoma sh-Gomora va si s-veadă cu ma multă lishuredz dicăt atselu cāsăbă.]"

¹² Ashă atselji s-dusiră sh-predica a oamnjilor tsi s-mitānjiusească

¹³ Sh-agunească multsă demonji sh-aungă cu untulem multsă lăndzits sh-li vindica.

Moartea al Ioan Pătidzătorlu

¹⁴ Tora amirălu Herod avdză si sbura di Isusul că numa a lui eara faptă cunoscut sh-elu dzăsi: "Ioan pătidzătorlu s-inje dit mortșă, tră atsea pri năsu ma lucreadă putearili cu mari ciudii."

¹⁵ Niscăntsă altsă dzătsea: "Easti Ilia." Sh-niscănts altsă dzătsea: "Easti un profit ică un di profitilji."

¹⁶ Ma cându Herodul avdză tuti atseali, dzăsi: "A Ioanlui, a cui lji tăljai caplu, s-inje dit mortșă!"

¹⁷ Că Herodul avea dată ordin s-acătsa Ioanul shi si s-tsănea ligată tu hapsi di itia a Herodiadăljei, muljearea al Filip, fratli a lui, că lu avea loată ti muljeari.

¹⁸ Ioanlu lj-dzătsea al Herod: "Nu ai ndriptati s-ai muljearea a fratilui a tău."

¹⁹ Herodiada lu aura sh-vrea s-lu vătăma, ma nu putea.

²⁰ Herodul s-afrea di Ioanlu tsi lu cunushtea ca om ndrept shi sāmță, sh-lu apăra, sh-după tsi avdza multi lucr di năsu, fătsea multi lucr, sh-lu asculta cu vreari.

²¹ Ma vini dzua tsi lipsea shi Herodul, tu dzua a amintariljei a lui adră uspetsi ti mārili a lui, capitānjilji sh-tinjisitsilji a Galileiljei.

²² Intră hiljea a Herodiadăljei, giucă sh-lji arăsi al Irod shi a lor tsi shidea deadun cu năsu la measă, atumtsea amirălu lji-dzăsi a featiljei: "Caftă-nji itsi vrei shi mini va ts-u dau."

²³ Sh-lji si spigiură: "Itsido tsi va nji caftsă va ts-u dau, păn la giunitatea a amirăriljei-a mea."

²⁴ Ea ishi afoară sh-lji dsăsi a mumăljei: "Tsi prindi s-lji caftă?" Shi ea apândisi: "Caplu al Ioan Pătidzătorlu!"

²⁵ Ea s-turnă trăoară la amirălu sh-lji-căftă așonjea: "Mini voi tsi tini s-nji dai trăoară tu tăpsii caplu al Ioan Pitidzătorlu."

²⁶ Sh-amirălu cu tută cā si nvirină multu di aestă, nu vrea s-arnisea ti itia cā eara spigiurată sh-ti tinjia a acljimatsilor.

²⁷ Ashă trăoară amirălu pitricu un vigljitor s-lji aducă caplu al Iaon.

²⁸ Shi elu s-dusi tu hapsi, lj-tălje caplu sh-lji lu-adusi pri ună tăpsii, lji lu deadi ali feati shi feata lji lu deadi a mumăljei.

²⁹ Cându ucenitsilji al Ioan lji avdzără aesti, viniră, loară trupu a lui shi lu băgară tu murmintu.

Prota Multsirea a Pănjilor

³⁰ Tora apostolilji s-adunară ningă Isus shi lji spusiră tuti atseali tsi avea faptă shi tsi lj-avea nvitsată.

³¹ Sh-elu lă dzăsi a lor: "Haidets tu un loc tu irnjii sh-discurmats-vă." Că oamnjilji tsi yinea shi s-dutsea eara ahăntsă multsă cāt nu avea chiro di măcari.

³² S-nchisiră cu ună varcă cātră un loc ermu shi dipărtat.

³³ Macāt multsămea lă vidzu tsi s-nchisiră, multsi di atselji lu cunuscură, sh-di tuti cāsăbadzli viniră aclo pi cicioari shi agiursiră dininti a lor shi s-adunară avărliga di năsu.

³⁴ Cându Isus ishi dit varcă, vidzu ună multsămi mară shi lj-vini rău, cā era ca oili fără picurar. Shi ahurhi s-lă nveatsă multi lucrî.

³⁵ Shi cum tricu multu chiro, ucenitsilji a lui s-aprucheară sh-lji-dzăsiră: "Aestu loc easti ermu sh-tora easti amănată.

³⁶ Dă-lă cali aishtoru oamnjii si s-ducă tu câmpurili sh-hoarili di avărliga tsi s-acumpără pāni, cā nu au tsiva ti măcari."

³⁷ Iară elu apândisinda lă dzăsi a lor: "Dats-lă voi s-măcă!" Sh-elji lji-dzăsiră: "Prindi s-nidzem noi s-acumpărăm doauă sută di denari* pāni shi s-lă dām ti măcari?"

³⁸ Elu lă dzăsi a lor: "Cāti pānji avets? Imnats sh-mutrits!" După tsi vidzură dzăsiră: "Tsintsi pānji sh-doi peshti."

³⁹ Atumtsea elu deadi ordin a lor tsi s-lji ndreagă tuts, apunats grupi-grupi pri yiarba veardi.

⁴⁰ Ashă atselji s-apunară tu grupuri cāti ună sută sh-cāti tsindzātsi.

⁴¹ Apoea elu lo tsintsi pānjili sh-doi peshti, sculă ochljilji cātră tser, ghinicuvăntānda, pārtsă pānjili sh-u deadi a ucenitsilor a lui, tsi s-u pārtsa a lor, tutashă u pārtsă a lor sh-peshtilji.

⁴² Tuts măcară pān s-fāntiră

⁴³ Sh-adunară doisprădzatsi di căneastri cu sārmi di pānji shi cu armănturi di peshti.

⁴⁴ Atselji tsi măcară pānjili eara tsintsi njilji di bărbats.

* 6:37 200 di denari easti ma putsān di plătirea a unui an.

Isus Imnă Pristi Apă

⁴⁵ Trăoară Isusul lă ursi ucenitsilji a lui s-intra tu varcă shi si s-ducă tu alantă parti câtră Betsaida, până-cându elu s-alăsa s-dispărțea mutsămea.

⁴⁶ Macăt li salută, elu s-alină tu munti ti pârăcălsiri.

⁴⁷ Cându tunică varca eara namisa di amari sh-elu singur eara tu meal.

⁴⁸ Cându lji vidzu ucenitsilji, elji ma s-pidipsea năftānda, cā vimtul eara contra lor. Tu a patrulu vigljitor a noaptăljei Isusul s-nchisi câtră năshi imnānda pri amari sh-elu vrea s-lji tritsea.

⁴⁹ Ma elji, cându lu-vidzură cā ma tritsea pri amari, mintuiră cā eara ună fantazmă shi ahurhiră s-aurlă.

⁵⁰ Tuts lu vidzură sh-eara lăhtārsitsă, ma elu trăoară ahurhi s-grească cu năshi, sh-dsăsi: "Curaiu! Mini escu, nu vā-aspārats!"

⁵¹ Deapoea s-alină tu varcă cu năshi sh-vimtul păpsi. Sh-atse lji armasiră ciudisits shi si thāvmātisiră.

⁵² Cā nu lu-avea aduchitā thavma a pānjilor cā inima a lor eara chitrisitā.

⁵³ După tsi tricură, agiumsiră tu loclu a Ghenezarethlui, sh-aclo u-ligară varca.

⁵⁴ Sh-cându ishiră dit varcă, oamnjilji lu-cunuscură dinăoară.

⁵⁵ Shi trăcānda trăoară pisti tută locurili di avārligă, ahurhiră s-aducă tuts lāndzitslji pri paturi iutsido tsi avdza cā s-afla elu.

⁵⁶ Iutsido tsi elu intra, tu hoari, tu cāsābadz icā tu mǎhǎladz oamnjilji băga lāndzitslji tu padi, sh-lu pârăcǎlsea tsi s-băga mǎna pi stranjili a lui. Sh-tuts atselji tsi băgară mǎna s-vindicară.

7

Nvitsarea ti Cătrăsierea di Năuntru

¹ Atumtsea s-adunară avārliga di năsu Fariseilji shi niscāntsă scribi tsi avea vinită di Ieruzalem.

² Atselji băgară oară cā niscāntsă di ucenitsilji a lui ma mǎca pāni cu mǎnjili lāvushiti, va s-dzācā ni-lati.

³ Fariseilji sh-tuts Iudeilji nu mǎcā ni-lati ghini mǎnjili ma năinti, tsānānda adetsili a vecjlilor.

⁴ Sh-cându s-toarnă dit pǎzari nu mǎcā macă nu sǎntu lată ma năinti. Suntu multi alti lucrī tsi atselji prindi s-li fac ti itia a adetsilor: larea a cupilor, a pocilor, a cǎldǎrilor shi a paturilor.

⁵ Deapoea Fariseilji shi scriblji lu ntribară: "Cātse ucenitsilji a tǎlji nu facă după adetsili a vecjlilor, ma mǎcā pāni ni aspālati mǎnjili?"

⁶ Ma elu apādisinda lă dzāsi a lor: "Ghini profitipsi Isaia trǎ voi, ipucrits, ashă cum easti scriatā:

*'Aestu popul cu budzili mi tinjiseashti,
ma inima-a lor easti diparti di mini.*

⁷ Ma di geaba mi alāvdsatǎ,

nvitsānda ună doctrinǎ tsi easti ună dimāndari uminească.'

⁸ Alāsānda di ună parti ordinlu al Dumnidzāu, ma tsānets adetsili a oamnjilor, aspālarea a pocilor sh-a cupilor, shi fătsets multi alti ahtāri lucrī."

⁹ Sh-ninga lă dzāsi a lor: "Voi hits axii ti arnisiri ordinlu al Dumnidzāu, sh-di tsāneari adetulu a vostru.

¹⁰ Moisiul dzāsi: 'Tinjisea tatālu a tǎu sh-muma a ta.' Shi: 'Atselu tsi blastimă tatālu sh-muma, easti giudicată cu moarti.'

¹¹ Ma voi dzātsets: 'Macă vāră lji-dzātsi a-tatālui a lui ică ali mumi a lui, itsi pot s-facă trǎ voi easti un Curban, va s-dzācā un pisches trǎ Dumnidzālu,'

¹² nu lu alăsats atselu s-facă tsiva di tatâlu a lui ică di muma a lui,
¹³ ashî voi arnisits zborlu al Dumnidzâu cu adetulu a vostru, tsi voi lu avets cirunumsitâ. Shi voi ma fătsets multi alti ahtări lucrî.”

¹⁴ Deapoea acljimă tută lumea avârliga di năsu shi lji-dzâsi: “Mi ascultats tuts shi aduchits!

¹⁵ Nu ari tsiva di nafoară a omlui, tsi intrânda tu năsu s-u lăvâshescu, aljiumtrea, sântu atseli lucrî tsi easă di la năsu tsi u lăvâshescu.”

¹⁶ [Cai ari ureclji tră avdzări, s-avdă!]*

¹⁷ Ma napoea, cându elu s-turnă la casă, diparti di multsămea, ucenitsilji a lui lu-ntribară tră achicăsirea a parabolălji.

¹⁸ Sh-elu lă-dzâsi a lor: “Sh-voi nu avets minti n-capă. Nu-u aduchitsă că itsi intră di nafoară la omlu nu poati s-u lăvâshească?

¹⁹ Că nu lji-intră tu inimă, ma tu pântică, sh-deapoea lu-scoată tu tualet?” Zburânda ashî, elu li declară curati tuti măcărili.

²⁰ Elu dzâsi: “Atsea tsi easi di la omlu, lu fatsi lăvos.

²¹ Că di năuntru, va s-dzăcă dit inima a-omlui ies minduirili arali, ncălcarea a căruniljei, furărili, vătămărili,

²² putânsirili, mănili, ruteatsili, arădearili, rushinarea, pizma, blăstemlu, mintimărirea, hăzămărili.

²³ Tuti atseli arăli ies di năuntru sh-u lăvâshescu omlu.”

Muljearea Siro-Feniciană

²⁴ Deapoea s-nchisi di aclo shi s-dusi tu cāsăbălu a Tirlui. Intră tu ună casă sh-vrea tsi nitsiun s-nu lu shtibă, ma nu putu s-armănă ascumtu.

²⁵ Ună muljeari, tsi hiljea a ljei avea un duh nicurată, avdzânda di Isusul, vini sh-cădzu la cicioarili a lui.

²⁶ Tora atsea muljeari eara elenică, cu rădătsină Sirofenică. Shi lji părăcălsi a lui tsi s-lu agunea draclu di hilja a ljei.

²⁷ Iară Isusul dzâsi: “Alasă cilimenjilji† prota s-făntească, că nu easti ghini s-ljeai pânea a-cilimenjilor shi s-u arutsă a cătsăljiilor.”

²⁸ Ma ea apândisi shi lji-dzâsi: “Ghini ma greshtă, Doamne, ma shi cătsăljiili sum masă măcă sârmili a cilimenjilor!”

²⁹ Atumtsea elu lji-dzâsi: “Tră aestu sbor a tău, fudz, draclu ishi di hiljea a-ta!”

³⁰ Sh-ea, cându s-turnă la casa a-ljei, u-află feata tu pat shi draclu avea ishită.

Vindicarea a un Surd-Mut di Decapolis

³¹ După tsi s-nchisi năpoi dit locurli a Tirlui shi s-dusi cătră Sidon, Isusul agiumsî la amarea a Galileiljei, namisa di loclu a Decapolei.

³² Sh-lji adusiră un mut tsi cu zori grea, shi lji-părăcălsiră s-bagă mănji pi năsu s-lu vindica.

³³ Cum lu lo, diparti dit multsămea, lji-băgă dzeadzitli tu urecljilji a lui, shi după tsi scuchie dzeaditlu, lji-acătsă limba.

³⁴ Deapoea sculă ocljilji cătră tser, suschiră shi-lji dzâsi: “Effatha”, tsi va s-dzăcă: “Discljidi-ti!”

³⁵ Shi trăoară s-discljisiră urechljiilji shi s-dizligă gura sh-elu gri cum prindi.

³⁶ Sh-Isusul lă-ursi atselji tsi s-nu lji-spunea a vărui. Ma cât ma multu lă ursea ahtât ma multu elji lu scurpisea sborlu.

* 7:16 Aestu stih nu s-află tu itsi manuscrisă grătsească. † 7:27 cilimenjilji Vrea s-dzăcă cilimenjilji a Israelui, shi cătsălji a cānjilor va s-dzăcă nu-iudenjilji.

³⁷ Sh-multu ciudisits, dzătsea: "Elu itsido lu ari faptă ghini, tsi surdzâlji s-avdă shi mutsilji s-grească!"

8

Multsirea a Doila a Pânjilor

¹ Tu atseali dzâli, s-adună ună multsâmi multu mari sh-nu avea tsi s-măca, Isusul lâ-gri a ucenitsilor sh-lă dzâsi a lor:

² "Nj-easti njilă di aestă multsâmi, că s-featsiră trei dzâli tsi sta cu mini, sh-nu ari tsi s-măcă.

³ Sh-ma s-lji pitrecu la casă ni măcat, va-s armănă pi cali, niscăntsă di elji au vinit di diparti."

⁴ Sh-ucenitsilji a lui lj-apândisiră: "Cum va s-lji fântea vără cu pâni aeshti aoa tu irnji?"

⁵ Sh-elu lji-ntribă: "Căti pânji avets?" Elji dzăsiră: "Shapti."

⁶ Atumtsea elu lâ-deadi ordin ali multsâmi s-apună mpadi. Sh-lo shapti pânjili, hărăstisi, li-frâmsi shi li-deadi a ucenitsilor a-lui tsi s-li pătsea ali multsâmi, sh-elji li pătसार.

⁷ Avea sh-niscănti peshti njitsi. După tsi li-ghinicuvântă, ordină tsi sh-atseali s-lji mpărta sa mutsămea.

⁸ Ashă elji măcară shi s-fântiră, sh-adunară shapti coshuri cu băcătsili tsi armasiră.

⁹ Atselji tsi măcară eara vără patru njilji di oaminji, deapoea lâ-alăsă.

Prihăbarea di Nvitsătura a Fariseilor

¹⁰ Elu trăoară intră tu varcă cu ucenitsilji a lui shi s-dusi tu locurili a-Dalmanutiljei.

¹¹ Viniră Fariseilji shi acătsară si zburăscă cu năsu, căftănda un semnu dit tser tsi su băga tu provă.

¹² Elu suschirănda dzăsi: "Cătse aestă gherenată caftă un semnu? Dealihea ma vă dzăc că aishte gherenată nu-va sã si da nitsiunu semnu."

¹³ Sh-lji alăsă, intră napoi tu varcă shi tricu di naparti.

¹⁴ Tora ucenitsilji avea agărshat s-ljea pâni, sh-tu varcă nu-avea tsiva dicăt mash ună singur pâni.

¹⁵ Isusul lâ-urilă dzăcânda: "S-avets căshtiga, afirits-vă di maeaua a Fariseilor sh-di maeaua al Irodul!"

¹⁶ Ma atselji minduia namisa di năshi, dzăcânda: "Nu avem pâni."

¹⁷ Isusul băgă oară sh-lă-dzăsi: "Cătse minduits că nu avets pâni? Ninga nu avets achicăsità sh-nu avets aduchită? Ninga u-avets inima chitrită?"

¹⁸ Avets oclji sh-nu videts, avets ureclji sh-nu-avdzăts? Nu tsinets minti?

¹⁹ Căndu pătσαι tsintsi pânjili ti tsintsi njilji, căti coshuri mplini cu băcătsi adunat?" Elji dzăsiră: "Doisprădzatsi."

²⁰ "Căndu pătσαι shaptili pânji ti patru njilji, căti coshuri mplini cu pânji adunat?" Elji dsăsiră: "Shapti."

²¹ Sh-elu lâ dzăsi a lor: "Ma cum ninga nu achicăsits?"

Vindicarea a Orbului dit Betsaida

²² Deapoea agiumsı tu Betsaida sh-lji adusiră un orb shi l-părăcălsiră s-bagă mână.

²³ Atumtsea lo di mână orbulu, lu scoasi afoară dit hoară, shi după tsi lji-scuche tu oclji shi băgă mănji pi năsu, lu-ntribă macă videa tsiva.

²⁴ Sh-elu, discljdzănda ocljilji, dzăsi: "Ma vedu oaminj ca ponji tsi imnă."

²⁵ Sh-Isusul lă bǎgǎ mǎnjili napoi pristi ochljilji a lui sh-lu featsi s-veadǎ cǎtrǎ nsus, shi atsilui lji si turnǎ videarea sh-videa ghini itsido.

²⁶ Sh-Isusul lu-pitricu s-ducǎ la-casa a lui dzǎcǎnda: "Nu intrǎ tu horǎ sh-nu lji spunǎ a vǎrui tsiva."

Mǎrtiria a Petrului

²⁷ Deapoea Isusul s-dusi deadun cu ucenitsilji a lui pri hoarili a Cesareljei al Filip. Sh-tu cali lǎ-ntribǎ ucenitsilji a lui dzǎcǎndǎ: "Cai dzǎc oamnjlji cǎ escu minǐ?"

²⁸ Elji apǎndisirǎ: "Niscǎntsǎ Ioan Pǎtidzǎtorlu, altsǎ Ilia, sh-altsilji un dit prufitsilji."

²⁹ Sh-elu lǎ-dzǎsi a lor: "Ma voi, cai dzǎtssets cǎ escu?" Sh-Petrul apǎndisinda lji-dsǎsi: "Tini eshti Hristolu."

³⁰ Atumtsea elu lǎ ursi s-nu spunea a nitsiunu ti nǎsu.

³¹ Deapoea Isusul apǎrnji s-lǎ nveatsǎ a lor cǎ Hiljilu a-omlui prindi s-mundueascǎ di multi lucrǐ, shi va-si s-alipideascǎ di aushilji, di ma mǎrlji a-preftsilor sh-di scriblji, cǎ va si-s vatǎmǎ shi dupǎ trei dzǎli va s-injeadzǎ.

³² Sh-elu lǎ dzǎsi aesti zboari pri fatsǎ. Atumtsea Petrul lu lo dinǎparti sh-apǎrnji s-lu vǎrgheascǎ.

³³ Ma elu s-nturnǎ, vidzu ucenitsilji a lui sh-lji aurlǎ a Petrului dzǎcǎnda: "Fudz di la mini, drac, cǎ tini nu ai minti ti lucrili al Dumnidzǎu, ma ti lucrili a-oamnjlilor."

Unǎ Crutsi ti Caitsido

³⁴ Sh-u acljimǎ ningǎ nǎsu multsǎmea cu ucenitsilji a lui, sh-lǎ dzǎsi: "Caitsido tsi va s-yinǎ dupǎ mini, s-alipideascǎ bana a lui, s-ljea crutsea*" a lui, shi s-mi urmeadzǎ.

³⁵ Cǎ atselu tsi va s-ascapǎ bana a lui, va su-cheardǎ, ma atselu tsi va-su cheardǎ bana a lui ti itia a mea sh-ti evanghelul, va s-ascapǎ.

³⁶ Tsi buneatsǎ va s-aibǎ omlu s-amintǎ ntreagǎ lumea ma cǎ ma napoea va s-cheardǎ suflitlu a lui?

³⁷ Icǎ tsi poati s-da omlu tu alǎxirea a suflitlui a lui?

³⁸ Cǎ a caitsido tsi va-lji yinǎ rushǎni trǎ mini sh-trǎ zboarili a meali namisa di aestǎ gheneratǎ cǎrunǎ-cǎlcatǎ shi amǎrtioasǎ, trǎ atsea va lj-yinǎ rushǎni sh-a Hiljilu a omlui, cǎndu s-agiungǎ la mǎrirea a Tatilui a lui, cu anghilji sǎmtsǎ."

9

¹ Deapoea Isusul lǎ dzǎsi a lor: "Dealihea vǎ-dzǎc cǎ namisa di voi tsi hits aoa sǎntu niscǎntsǎ tsi nu-va u gusteadzǎ moartea ma nǎinti tsi s-veadǎ cǎ va s-yinǎ cu puteari amirǎriljea al Dumnidzǎu."

Fǎnipsirea al Isus

² Dupǎ shasi dzǎli Isusul lo cu nǎsu Petrul, Iacovul sh-Ioanul sh-li adusi dinǎparti, singur atselji pri un munti analtu. Shi s-alǎxi nǎintea a lor.

³ Shi stranjlji a lui si strǎlutsirǎ shi s-featsirǎ albi ca neaua, ashǎ cum nu poati s-li alǎgheascǎ nitsiun alghitor pri loc.

⁴ Sh-a lor lǎ si fǎnipsi Elia cu Moisiu tsi ma zbura cu Isusul.

⁵ Atumtsea lo zborlu Petrul sh-lji dzǎsi al Isus: "Nvitsǎtore, trǎ noi easti ghini s-him aoa, s-adrǎm trei cǎlivi, unǎ trǎ tini, unǎ trǎ Moisiu shi unǎ trǎ Elia!"

* **8:34** s-ljea crutsea Va s-dzǎc s-hii etimu s-ti mundueshti shi s-mori tsi s-ti duts dupǎ Hristolu.

⁶ Elu nu-shtia tsi s-dzâtsea, cã elji eara aspârats.

⁷ Deapoea vini un nior tsi lâ amvâli cu aumbra a lui, sh-dit nior ishi unã boatsi tsi dzâsi: "Aestu easti Hiljilu a meu vrut! Ascultats-lu!"

⁸ Shi trãoarã elji vidzurã avârliga, ma nu vidzurã vârfã, dicât singur Isusul cu nãshi.

⁹ Tora cãndu ma dipuna dit munti, Isusul lâ-ordinã si nu spunã a vãrui lucrili tsi avea vidzut, pãnã-cãndu Hiljilu a-omlui s-nyeadzã dit mortșã.

¹⁰ Elji lu tsãnurã zborlu shi s-ntriba un cu alantu cã tsi va s-dzâtsea s-injeadzã dit mortșã.

¹¹ Deapoea lu ntribarã dzãcãnda: "Cãtse scriblji dzãc cã ma nãinti prindi s-yinã Elia?"

¹² Sh-el, apãndisinda, lâ dzâsi a lor: "Elia dealihea prindi s-yinã ma nãinti shi s-adarã itsido. Ma ashã cum easti scriatã trã Hiljilu a-Omlui, elu prindi s-hibã munduit sh-s-dispretsuit.

¹³ Ma mini ma vã-dzãc cã Elia vini sh-cu nãsu featsirã tsi vrurã, ashã cum easti scriatã ti nãsu."

Ficiorlu Epileptic

¹⁴ Cãndu s-turnã la ucenitsilji a lui, vidzu unã multșãmi mari avârliga di nãshi sh-niscãnts scribi tsi ma si-ncãcea cu nãshi.

¹⁵ Shi dinãoarã tutã multșamea, cãndu lu vidzu, s-ciudisi sh-vini trãoarã la nãsu ti salutari.

¹⁶ Sh-el, lâ ntribã scriblji: "Trã tse ma vã ncãceats cu nãshi?"

¹⁷ Sh-un dit multșamea apãndisinda, dzâsi: "Nvitsãtore, ts-adush ficiorlu a meu tsi ari un duh mut,

¹⁸ shi u-acatsi iutsido, lu-plãscãneashti sh-el, spumeadzã, cãrtsãneashti dintsilji sh-lji ngljeatsã cicioarili. Lã dzãsh a ucenitsilor a tãlji su-aguneascã, ma elji nu puturã s-lu facã."

¹⁹ Sh-el, dzâsi: "Gheneratã tsi nu-pistipseshti, pãnã-cãndu va s-hiu cu voi? Pãnã-cãndu va s-vã aravdã? Adutsets-lu aoa!"

²⁰ Sh-elji lu-adusirã. Macât duhlu lu vidzu, lu-plãscãni cu fuchii cil-meanlu tsi avea cãdzut mpadi, shi s-arucutea spumãnda.

²¹ Sh-Isusul lu-ntribã tat-su a lui: "Cãt chiro ari tsi s-fatsi aestã?" Sh-el, dzâsi: "Di cu njic.

²² Di multi ori lu ari arucatã tu foc sh-tu apã tra s-lu chearã, ma s-pots s-fats tsiva, s-ai njilã trã noi shi nã agiutã!"

²³ Sh-Isusul lji-dzâsi: "Macã tini pots s-pistipseshtã, itsido easti putut trã atselu tsi pistipseashti."

²⁴ Dinãoarã tatlu a-ficiorlui, aurlãnda cu lãcri, dzâsi: "Mini pistipsescu, Doamne, agiutã ni-pistipsirea a mea!"

²⁵ Atumtsea Isusul, vidzãnda cã multșamea ma yinea trãoarã, lâ aurlã al duhlu nicurat, dzãcãnda: "Tini duh tsi l-fats mut shi surdã, mini ti ursescu, s-eshi di la nãsu sh-nu intrã pute la nãsu."

²⁶ Sh-demonul, aurlãnda shi trunduinda, ishi di la nãsu. Sh-ficiorlu armasi ca mort, ashã cãt mults oaminj dzâtsea: "Ari murit."

²⁷ Ma Isusul lu-acãtsã di mãnã, lu-sculã sh-el, shidzu pi cicioari.

²⁸ Cãndu Isusul intrã tu casã, ucenitsilji a lui lu ntribarã dinãparti: "Cãtse noi nu putum s-lu agunim?"

²⁹ Sh-el, lâ dzâsi a lor: "Aestã soi di duhuri nu-pots s-li aguneshti altã soi, dicât mash cu pãrãcãlsiri."

Isus Spuni Pridarea a Lui

³⁰ După tsi s-nchisiră di aclo, tricură pri Galilei, sh-elu nu vrea s-lu shtibă vără.

³¹ Elu lă-nvitsa ucenitsilji a lui sh-lă dzătsea a lor: "Trăoară Hiljilu a-omlui va si s-prida tu mănji a oamnjilor sh-elji va lu vatămă, sh-după tsi va s-hibă vătămă, elu va s-injeadză a-treia dzuă."

³² Ma elji nu li-achicăsea atseali zboari sh-avea frică s-lu ntriba Isusul.

Ma Marlu tu Amirăriljea al Dumnidzău

³³ Sh-agiumsiră tu Capernaum, sh-cându intră n-casă, lă-ntribă: "Tră tsi vă ntribats namisa di voi pri cali?"

³⁴ Ma elji păpsiră, că pri cali dzătsea cu un-alantu că cai di elji easti ma marlu.

³⁵ Atumtsea elu shidzu, lă acljimă di doisprădzatsilji sh-lă dzăsi a lor: "Macă vără va s-hibă protlu, prindî s-hibă ma năpoi di tuts shi huzmichearlu a tutulor."

³⁶ Deapoea lo un cilimean sh-lu băgă namisa a lor. Deapoea luănda mbratsă lă dzăsi a lor:

³⁷ "Caitsido tsi aproachi un dit aeshtă cilimenji tu numa a mea, mi aproachi mini, sh-caitsido tsi mi aproachi mini, nu mi aproachi mini, ma atselu tsi mi ari pitricut."

Cai Easti cu Isus

³⁸ Atumtsea Ioanul lo sborlu sh-dzăsi: "Nvitsătore, noi vidzum un om tsi nu nă-urmeadză, tsi li agunea demonjili tu numa a ta, sh-noi lu chidicăm că elu nu yinea după noi."

³⁹ Ma Isusul dzăsi: "Nu lu chidicatsă că nu ari om tsi poati s-facă thavmă tu numea a mea, sh-ma napoi s-grească arău tră mini.

⁴⁰ Că cai nu easti contra a noi, easti cu noi.

⁴¹ Caitsido tsi va vă da ună cupă cu apă tu numa a mea, că hits a Hristolu, dealihea ma vă-dzăc cu sigurantsă că nu va s-cheară plătirea a lui.

Scandalili

⁴² Sh-cai va si scandalizeadză un di aeshti njitsilji tsi pistipsescu la mini, va eara ma ghini ti năsu s-lji spindzira tu zvercă ună cheatră mară di moară sh-si s-arucă tu amari.

⁴³ Tora, macă mână a ta ti scandalizeadzi ti amărtii, talji-u, easti ma ghini tră tini s-intsri tu bana eternă cu mână tsungă, dicăt s-ai doauă manji shi s-ti duts tu Ghehena, tu foclu tsi nu s-astindzi pute.

⁴⁴ [Aclo iu iermul a lor nu moari sh-foclu nu s-astindzi.]*

⁴⁵ Macă ciciorlu a tău ti scandalizeadzi ti amărtii, talji-u, easti ma ghini tră tini s-intsri tu bană shcljiop, dicăt s-ai doauă cicioari shi s-ti arucă tu Ghehena, tu foclu tsi nu s-astindzi pute.

⁴⁶ [Aclo iu iermul a lor nu moari sh-foclu nu s-astindzi pute.]

⁴⁷ Sh-macă ocljiul a tău ti adutsi tu amărtii, scoat-lu. Easti ma ghini tră tini s-intsri tu bană cu un ocljiu, dicăt s-ai doi oclji shi s-ti arucă tu Ghehena,

⁴⁸ aclo iu iermul a lor nu moari sh-foclu nu s-astindzi pute.

⁴⁹ Că caitsido prindî s-săreadză tu foc sh-itsi curban prindî s-săreadză cu sari.

⁵⁰ Sarea easti bună, macă sarea cheari njurizma, cu tsi va lu turnats njurizma? S-avets sari pri voi shi bănats tu pace namisa di voi."

* 9:44 Aesti două stihuri nu s-află tu alti manuscrisi.

10

Dispărtsărea

¹ După tsi fudzi di aclo, Isusul s-dusi tu locurili a Iudeiljei ningă Iordan, sh-năpoi s-adunară avărliga di năsu multsămea. Elu năpoi ahurhî s-lă nveatsă ashă cum eara adetea.

² Sh-Fariseilji lu băgară tu provă shi lu ntribară: "Macă ari izini bărbatlu, s-lu alasă muljearea?"

³ Sh-elu, apândisinda, lă dzăsi a lor: "Tsi vâ ari ordinată Moise?"

⁴ Elji dzăsiră: "Moise ari dată volji si-scrii cartea a dispărtsăriljei shi su-alasă muljearea."

⁵ Sh-Isusul apândisinda lă-dzăsi a lor: "Tră itia a chitrisiriljei a inimilor a voastri elu u scriă atsea regulă.

⁶ Ma tu apărnjita a adărărăljei, *Dumnidzălu lă adră mascrulu sh-theamina.*

⁷ *Tră aestă bărbatul va alasă tatul sh-muma sh-va si s-mpriuneadză cu muljearea a lui.*

⁸ *Ashă amindoiilji va s-hibă un trup singur.* Ashă elji nu sântu ma doi, ma un trup singur.

⁹ Tră atsea omul s-nu mpartsă atsea tsi Dumnidzălu ari mprionată!"

¹⁰ Sh-la casă učenitsilji a lui lu-ntribară năpoi tră aestă cauză.

¹¹ Atumtsea elu lă-dzăsi a lor: "Atselu tsi alasi muljearea a lui shi si nsoari cu ună altă, ncalcă căruna cu năsă.

¹² Tutashă macă muljearea alasă bărbatlu shi s-măriti cu un altu, ncalcă căruna."

Isus shi Cilimenilji

¹³ Atumtsea lji-adusiră niscăntsă cilimenji njitsi tsi elu s-băga mănă pi năshi. Ma učenitsilji lji-vărghiră atselji tsi lji adusiră.

¹⁴ Cându Isusul lu vidzu aestă, si nvirină sh-lă dzăsi: "Alăsats-lji nitslji cilimenji s-yină la mini sh-nu lji chidăcatsă, că a lor easti amirăriljea al Dumnidzău.

¹⁵ Dealieha ma vâ dzăc că caitsido tsi nu u-aproachi amirăriljea al Dumnidzău ca un cilimean njică, nu va s-intră la năsă."

¹⁶ Shi cum lji lo mbratsă, lji ghinucuvântă băgănda mănji pi năshi.

Tinirlu Avut

¹⁷ Tora cându ma s-fătsea etimu ti cali, ishi dininti trăoară un om, s-dzinuclje dininti a lui, sh-lu-ntribă: "Nvitsătore bun, tsi prindi s-facă tsi s-mushtinitiescu bana di totăna?"

¹⁸ Sh-Isusul lji-dzăsi: "Cătse nji-dzăts bun? Vără nu easti bun, dicăt mash un singur, Dumnidzălu.

¹⁹ Tini li cunoshti ordinli: *'Nu calcă căruna. Nu vatămă. Nu fur. Nu fă mărtirii arădioasă. Nu arăd. Tinjisea tatălu a tău shi muma a ta.'*

²⁰ Sh-elu apândisinda, lji-dzăsi: "Nvitsătore, tuti atseali mini li-am faptă di cu njic."

²¹ Sh-Isusul lu vidzu cu vreari sh-lji dzăsi: "Un lucru tsă lipseashti: vindă tuti tsi ai shi dă-li a niavutsilor shi va s-ai ună yishteari tu tser. Deapoea haidi, ljea crutsea sh-mi urmeadză."

²² Sh-elu s-nvirină tră aesti sboari sh-fudzi amăros că avea multi averi.

²³ Sh-Isusul după tsi arucă nutrita avărliga, lă dzăsi a učenitsilor a lui: "Căt greu easti tră atselji tsi au aveari s-intră tu amirăriljea al Dumnidzău!"

²⁴ Ucenitsilji s-ciudisiră di zboarili a lui. Iară Isusul gri năpoi sh-lă dzăsi a lor: "Hilji, cât greu easti tsi s-intră tu amirăriljea al Dumnidzălu [atselji tsi s-andoapiră la avearea]*.

²⁵ Easti ma lishor s-treacă pri guva a-aclui ună cămilă dicăt s-intră un avut tu amirăriljea al Dumnidzău."

²⁶ Sh-elji s-ciudisiră sh-ma multu sh-dzătsea cu un alantu: "Atumtsea cai poati si-ascapă?"

²⁷ Ma Isusul lă vidzu sh-dzăsi: "Aestă tră oamnjilji easti niputută, ma nu ti Dumnidzălu. Că itsido easti putută ti Dumnidzălu."

²⁸ Atumtsea Petrul lo sborlu sh-dzăsi: "Noi alăsăm itsido sh-ti urmăm tini."

²⁹ Isus apândisinda, dzăsi: "Dealihea ma vâ dzăc că nu ari vără om tsi ari alăsat casa, fratsilji, surărili, tatlu, muma, hiljilji ică agrili tră mini sh-tră evanghelul,

³⁰ shi s-nu-ljea tora, tu aestu chiro ună sută di ori ma mult căsi, frats, surări, mumi, hilji sh-agri, deadun cu avinărili sh-tu eta alantă, tu bana eternă.

³¹ Sh-multsă di protsilji va s-hibă atselji di ma napoi, shi atselji di ma năpoi va s-hibă protsilji."

Hiljilji al Zevedeu

³² Atselji eara pri cali cătră Ieruzalem, shi Isus imna dininti. Sh-atselji eara trumuxits sh-lu urma cu frică. Sh-elu lă adună di doisprădzatsilji năpoi dinăparti sh-ahurhi s lă dzăcă tsi va s-lji undzească:

³³ "Noi ma nidzem cătră Ieruzalem shi Hiljilu a omlui va s-prida a arhipreftilor sh-a scribilor, sh-elji va lu giudica cu moarti sh-va lu prida tu mâna a păgânjilor.

³⁴ Aeshti va lu pizuească, va lu scuchi, va lu zăpălească sh-va lu vatămă, ma elu a treia dzuă va s-injeadză."

³⁵ Atumtsea Iacovul sh-Ioanul, hiljilji al Zevedeu s-aprucheară la Isus sh-lji dzăsiră: "Nvitsătore, noi vrem tsi tini s-fats tră noi atsea tsi va-s-tsă-căftămu."

³⁶ Shi elu lă-dzăsi a lor: "Tsi vrets s-fac tră voi?"

³⁷ Elji lji-dsăsiră: "Alas-nă tsi s-nă apunăm un di nandreapta a ta shi alantu di nastănga a ta tu mărirea a ta."

³⁸ Sh-Isusul lă dzăsi a lor: "Voi nu-shtits tsi căftats! Putets voi s-bets cupa a munduirilor tsi mini va s-beu shi s-vă pătidzats cu atselu pătigioni tsi mini escu pătidzat?"

³⁹ Elji dzăsiră: "Ie, putem." Sh-Isusul lă dzăsi a lor: "Dealihea va s-bets atsea cupă tsi va su beu mini, sh-va-s-vă pătidzats cu atsea pătigioni tsi mini escu pătidzat,

⁴⁰ ma nu easti ndreptul a meu tsi s-apună di nandreapta a mea ică di nastănga a mea, ma easti tră atselji tsi easti adrată."

⁴¹ Sh-cându li avdzăra aesti, alantsă dzatsi ahurhiră s-nărească contra al Iacov sh-al Ioan.

⁴² Ma Isus lă acljimă ningă năsu sh-lă dzăsi: "Voi lu shtits că atselji tsi s-acljeamă domnitor a lumiljei lă chivernisescu atselji, sh-mărilji a lor folosească pristi năshi puterea a lor,

⁴³ ma atsea nu prindi s-undzească namisa di voi. Macă vără di voi tsi va s-facă mari, va s-hibă huzmichearlu a vostru.

⁴⁴ Sh-caitsido di voi tsi va s-hibă protlu, va s-hibă huzmichearlu a tutolor.

* 10:24 Aestu stih nu s-află tu alti manuscrisi.

⁴⁵ Că sh-Hiljilu a omlui nu-vini s-lji huzmitipsească, ma s-huzmitipsească shi di dari bana a lui ca preti ti acumprarea a multsilor."

Orbul al Ierico

⁴⁶ Ashătsi agiumsîră tu Ierico. Căndu elu ma isha di Ierico cu učenitsilji a lui sh-cu ună multsămi mari, hiljilu al Timaeu, Bartimeul orbu, eara apunat mardzina di cali sh-căfta.

⁴⁷ Căndu elu avdză că atselu tsi ma tritsea eara Isus Nazareas, apărni s-aurlă shi s-dzâcă: "Isus, Hiljilu al David, njiliua-mi!"

⁴⁸ Multsă lji-aurla s-păpsea, ma elu aurla sh-ma multă: "Hiljlu al David, njiliua-mi!"

⁴⁹ Sh-Isus chindrui sh-ordină tsi s-lu acljeamă. Elji lu acljimară orbulu, dzăcânda: "Curaiu, scoală-ti, elu ma ti acljeamă!"

⁵⁰ Atumtsea elu lu-arucă nclo mantolu a lui, si-sculă sh-vini la Isus.

⁵¹ Sh-Isus lji-dzâsi: "Tsi vrei s-tsă fac mini!" Orbulu lji-dzâsi: "Rabboni, s-nji-si s-toarnă videarea!"

⁵² Sh-Isus lji-dzâsi: "Imnă, pistipsirea a ta ti vindică!" Sh-trăoara atsilui lji si-turnă videarea shi s-nchisi pri cali după Isus.

11

Intrarea al Isus tu Ierusalim

¹ Tora căndu s-aprucheară di Ierusalem, câtră Betfaghe sh-Betania, ningă Muntili a Masnjilor, Isus pitricu doi di učenitsilji a lui,

² dzăcânda: "Imnats tu hoara di dininti a-voastră, sh-ma cât s-intrats aclo, va s-aflats un gumăric ligat, tsi nu lji-avea ncălicat vără. Dizligats-lu sh-adutsets-lu la mini.

³ Sh-macă vără vâ-dzâtsi: 'Cătse ma fătsets ashă?', apândisits-lă: 'L-hărzăeashti Domnulu. Elu va u-toarnă trăoară aoa.'

⁴ Elji s-dusiră shi aflară gumăriclu ligat aproapi di ună ushă, pi cali sh-u-dizligară.

⁵ Niscăntsă di atselji tsi eara aclo lă dzăsiră a lor: "Tsi fătsets? Cătse dizligats gumăriclu?"

⁶ Aeshtă l-apândisiră ashă cum lă avea dzăsă Isusul sh-elji lji alăsară s-fugă.

⁷ Atumtsea lji-adusiră al Isus căricilu, băgară pri supru mantolul a lor sh-elu s-apună pi năs.

⁸ Mults oaminj ashtirna stranjili a lor pri cali sh-alantsilji tăljea dedzi di ponj sh-li aruca pri cali.

⁹ Sh-cum atselji tsi nidzea năinti, sh-atselji tsi yinea după Isus, aurla sh-dzătsea:

"Hosana!"*

Ghnicuvântată easti atselu tsi yini tu numa a Domnului!

¹⁰ *Ghnicuvântată easti amirărîljea al David, tatăl a nostru tsi yini tu numa a Domnului.*

Hosana tu locurili multi analiti!"

¹¹ Ashă intră Isus tu Ieruzalem sh-tu templu. Sh-după tsi vidzu ghini itsido, băgă oară că eara amănat, ishi deadun cu doispridzatsilji câtră Betania.

Hiclu Uscat

¹² Alantă dzuă, căndu ishiră di Betania elu avea foami.

* **11:9** Hosana-vrea s-dzâc, Alăvdari a Dumnidzăului.

¹³ Sh-vidzânda di diparti un hic tsi avea frândzi, elu s-dusi di videari nacă putea s-afla tsiva aclo. Ma cându s-apruche nu află tsiva, dicăt frândzi, că nu eara chirolu a hitsilor.

¹⁴ Sh-Isus lji gri a hiclu, dzăcânda: "Vără s-nu măcă pute frut di la tini." Sh-ucenitsilji a lui lu-avdzără.

Cătărsirea a Templu

¹⁵ Ashă agiumsiră tu Ieruzalem. Isusul după tsi intră tu templu, apărni s-lji agunească atselji tsi vindea shi acumpăra năuntru a templu sh-li răsturnă measili a alăxitorilor di părădzi shi scamnili a vinditorilor di purunghi.

¹⁶ Sh-nu alăsa vără tsi s-purta lucri prit templu.

¹⁷ Sh-lă nvitsa, dzăcânda: "Vahi nu easti scriată: '*Casa a mea va s-acljeamă casa a părăcâlsirjei di tuti natsiunili*? Voi, lu avets adrată ca ună pishtireauă di furi!'"

¹⁸ Tora scriblji sh-mărilji a preftsilor cându li avdzără aesti sboari căfta că cum s-lu vătăma, ma avea frică di năsu, că tută multsămea eara ciudisit di nvitsătura a lui.

¹⁹ Cându s-featsi seară, Isusul ishi nafoară di cāsăbă.

Pistipsirea Alihioasă

²⁰ Tu alantă dzuă dimineatsa, tricânda vidzură că hiclu eara uscat dit rădătsină.

²¹ Sh-Petrul adusi a-minti shi lj-dzăsi: "Nvitsătore, ia, hiclu tsi tini blăstimash easti uscat."

²² Sh-Isusul apândisinda lă dzăsi a lor: "Avets pistipsirea al Dumnidzău!"

²³ Dealieha vâ-dzăc, macă vără va lji dzăc aishtui munti: "Scolă-ti shi arucă-ti tu amari", sh-nu va s-aibă dilemă tu inima a lui, ma va s-pistipsească că atsea tsi ma dzătsi va s-facă, itsido va s-lji si-adară.

²⁴ Tră atsea ma vâ dzăc că tuti atseali tsi voi căftats părăcâlsinda, pistipsits că va li-loats sh-va-vă si da a voauă.

²⁵ Sh-cându ahurhits s-părăcâlsits, macă avets tsiva contra a vărui, ljirtats-lu tsi sh-Tatálu a vostru tsi easti tu tseruri, s-vă ljeartă amărțiili a voastri.

²⁶ [Macă voi nu ljirtats, nitsi Tatálu a vostru tsi easti tu tseruri, nu va-s-vă ljeartă amărțiili a voastri.][†]

Ntribarea a Fariseilor

²⁷ Deapoea elji viniră năpoi tu Ierusalem, sh-cându elu imna prit templu, mărili a preftsilor, scriblji, sh-aushilji s-aprucheară,

²⁸ sh-lji dzăsiră: "Cu tsi puteari li fats tini aesti lucri? Cai ts-u deadi aestă puteari tsi s-li fats aesti lucri?"

²⁹ Sh-Isusul apândisinda lă dzăsi a lor: "Sh-mini va vâ fac un ntribari. Apândisits-nji sh-mini va vâ-dzăc că cu tsi puteari li fac aesti lucri.

³⁰ Pătidzarea a Ioanului eara dit tser ică di la oaminji? Apândisits-nji."

³¹ Elji ahurhiră s-minduea namisa di năshi: "Ma s-dzătsem 'dit tser', elu va s-dzăc: 'Atumtsea cătse voi nu lji-pistipsită?'"

³² Ma s-lji dzătsem 'di la oamnili...' (elji avea frică di populu, că tuts dzătsea că Ioanlu easti dealieha un profit).

³³ Tră atsea apândisinda, lji dzăsiră al Isus: "Nu lu-shtim." Sh-Isusul apândisinda, lă dzăsi a lor: "Nitsi mini nu ma vâ-dzăc că cu tsi puteari li fac aesti lucri."

[†] 11:26 Atselu stih nu s-află tu alti veaclji manuscruturi.

12

Ayinjitorlji Arăjji

¹ Sh-deapoea apărni s-lă grească cu parabolă: “Un om simină ună ayinji, u avărligă cu gardu, adră ună loc di zdruminari aua, adără un pirgu tră vigljeari sh-lă-u pistipsi a niscânts ayinjitori sh-deapoea s-dusi diparti.

² Sh-tu chirolu a cutseariljei pitricu un sclav la ayinjitorlji di loari di năshi ună parti di auă a-ayinjljei.

³ Ma elji lu-acătsară, lu bătură sh-lu turnară cu manjili goali.

⁴ Elu pitricu năpoi un altă sclav, ma elji după tsi lu-agudiră cu chetri, lu pliguiră tu cap sh-u turnară rushinat.

⁵ Năpoi pitricu ninga un altă, ma elji lu vătamară. Ma năpoi pitricu mults altsă sh-di aeshti mults lji-bătură, shi alantsilji lji-vătamară.

⁶ Lj-armasi ninga un di pitritseari: hiljilu a lui vrut. Tu soni l-pitricu sh-atselu dzăcânda: ‘Ti hiljilu a meu va s-aibă respect.’

⁷ Ma ayinjitorilji dzăsiră un cu alantu: ‘Aestu easti clirunomlu, hai s-lu vătămăm shi s-nă armănă a noauă clirunomia.’

⁸ Sh-lu acătsară, lu-vătamară, sh-lu-arucară nafoară di ayinji.

⁹ Tsi va s-facă domnul a-ayinjljei? Elu va s-yină sh-va s-lji cheară ayinjitorlji shi ayinjea va u-da a alantsilor.

¹⁰ Ma nu u-avets ghivăsită aestă scritura: ‘Cheatra tsi masturlji u-arcară, s-featsi cheatra a cohilui?’*

¹¹ Atsea easti faptă di la Domnul sh-easti ună thavmă tu ocljlji a noastri.’ ”

¹² Sh-elji căftară s-lu acatsă, că achicăsiră că elu lă avea dzăsă atsea parabolă contra a lor, ma avea frică di multsămea, sh-lu-alăsară sh-fudziră.

Plătirea a Tăxilor

¹³ După atsea lji-pitricură niscântsă Farisei sh-Ierodianji tsi s-lu acătsa tu zboari.

¹⁴ Aeshti viniră sh-lji dzăsiră: “Nvitsătore, noi lu shtim că tini eshtë dealihea sh-nu ntregghi di vără, că nu badză oară fânipsirea a-oamnjlilor, ma lji nvetsă calea a Dumnidzălui după ndriptatea. Easti ndreptu s-plăteshti taxa a Cezarlui ică nu? Prindi s-u plătim ică nu?”

¹⁵ Ma elu, cunuscânda ipucrizia-a lor, lă-dzăsi: “Cătse mi băgats tu provă? Adutsets-nji un denar tsi s-lu ved!”

¹⁶ Elji lji-adusiră. Shi elu lă dzăsi a lor: “A cui easti aestă fatsă sh-aestu priscris?” Elji lji-dzăsiră: “A Cesarului.”

¹⁷ Atumtsea Isus apândisi sh-lă dzăsi a lor: “Dats-lji a Cesarului atsea tsi easti a Cesarului, sh-a Dumnidzălui atsea tsi easti a Dumnidzălui.” Sh-elji s-ciudisiră cu năsu.

Sadutseilji sh-Injearea

¹⁸ Deapoea viniră niscântsă Sadutsei tsi dzăc tsi nu ari injeari, sh-lu ntribară dzăcânda:

¹⁹ “Nvitsătore, Moisu lă-alăsă scrisă tsi cându moari fratili a vărui sh-alasi muljearea ni-fără cilimenji, fratili a lui prindi si-nsoară cu veduva tra s-lji facă dupăyinitori a fratilui.

²⁰ Tora eara shapti frats, protlu si-nsură sh-muri ni alăsată cilimenji.

²¹ U lo a doilu, ma sh-elu muri ni-alăsat cilimenji, tutashă sh-a treilu.

²² Di shaptilji u loară di muljeari sh-muriră, sh-nu alăsară clirunonji (dupăyinitori). Sh-după tuts muri sh-muljearea.

* **12:10** Easti ună cheatră di sus tsi u tsăni ngărcarea a casăljei.

²³ La injeari, cându va-s injeadză, muljearea a cui di năshi va s-hibă ea? Că di shapti u-avură muljeari.”

²⁴ Isusul apândisinda lă dsăsi a lor: “Tră atsea voi hits tu căbati că nu li-shits nitsi scriturili nitsi putearea a Dumnidzălui.

²⁵ Cându oaminjili va s-injeadză dit mortșă, nitsi va si-nsoară, nitsi va si s-mărită, ma va s-hibă ca anghilji dit tser.

²⁶ Căt di nyearea a mortșilor, nu avets ghivăsît tu cartea a Moisiul că cum gri Dumnidzălu dit rudz dzăcânda: ‘Mini escu Dumnidzălu al Abraham, Dumnidzălu al Isac, sh-Dumnidzălu al Iacov.’

²⁷ Elu nu easti Dumnidzălu a mortșălor, ma Dumnidzălu a yiilor. Ashă că voi fătsets căbati.”

Ursirea Atsea Marea

²⁸ Sh-un di scriblji tsi avea avdzătă zburarea a lor, achicăsinda că elu lă avea apândisită ghini, s-apruche sh-lu-ntribă: “Cai easti protlu di tuti ordinăril?”

²⁹ Sh-Isusul apândisi: “Protlu ordin a tutulor easti: ‘Ascultă Izrael! Domnul, Dumnidzălu a nostru easti singur Domn.’

³⁰ Shi ‘S-vrei Domnulu, Dumnidzălu a tău, cu tută inima a ta, cu tută suflitlu a tău, cu tută mintea a ta, sh-cu tută putearea a ta!’ Aestă easti protlu ordin.

³¹ Shi a doilu lji-undzeashti aishtui: ‘S-lu vrei aproapilu a tău ca vetea a ta.’ Nu ari altă ordin ma mară di aestu.”

³² Shi scriblu lji dzăsi: “Ghini, nvitsătore. Ai dzăsă după alihea, că ari singur un Dumnidză sh-nu ari vără altu dicăt elu.

³³ Shi s-lu vrei cu tută inima, cu tută mintea, cu tută suflitlu sh-cu tută putearea, shi s-lu vrei aproapilu ca vetea a ta, ma multu di căt olocaustlji sh-curbănjilji.”

³⁴ Isusul vidzânda că atselu eara apândisită cu minti, lji dsăsi: “Tini nu eshti diparti di amirăriljea a Dumnidzălui.” Sh-vără altă nu cutidzea s-lu ntriba.

Hristolu, Hiljilu al David

³⁵ Sh-Isusul nvitsânda tu templu, dsăsi: “Cum pot s-dzăc scriblji că Hristolu easti Hiljilu al David?

³⁶ Că mash Davidul, prit Suflitlu Sămtu dsăsi:

‘Domnulu lji-dsăsi a Domnului a meu:

“Shedz tu nandreapta a mea,

pân-cându s-lji facă neamitsilji a tălji scamnă

di cicioarili a tali.”’

³⁷ Idhiul Davidul lu acleamă Domn, cum poati elu s-hibă hiljilu a lui?” Sh-multsămea lu avdza cu harauă.

Ipucrizia a Scribilor

³⁸ Sh-elu lă dsătsea a lor tu nvitsătura a lui: “Afrits-vă di scriblji, tsi arăsescu s-immă cu stranji lundzi shi s-lji saluteadză tu padi,

³⁹ shi s-aibă protili locuri tu sinagogă sh-protili locuri uspetsi.

⁴⁰ Elji măcă cāsili a veduvilor shi tra si s-veadă, s-părăcălsescu multu. Elji va s-ljea un giudicari ma greu.”

Oferta a Veduvăljei

⁴¹ Isusul s-apună năinti di cutia a aishteariljei sh-mutrea oamnjili tsi băga năuntru denar, avutslji băga năuntru ma multu.

⁴² Vini ună veduvă niavută sh-băgă doi părădz njitsi, tsi fac un cuadrant.†

⁴³ Sh-Isusul lji-acljimă ucenjitsili a lui ningă năsu sh-lă dsăsi: "Vă dzăc dealihea că aestă veduvă niavută ari băgat tu cutii ma multu di tuts alantsilji.

⁴⁴ Că tuts băgară năuntru dit primultulu a lor, ma ea cu ni-avearea a ljei băgă tută tsi avea di bănari."

13

Prufitsia di Templu

¹ Căndu elu ma ishea dit templu, un di ucenitsilji a lui lj-dsăsi: "Nvitsătore, vedz tsi chetri shi tsi adărături!"

² Sh-Isusul apândisinda lj-dsăsi: "Li vedz aesti adărături mări? Nu va s-armănă cheatră pisti cheatră ni dărămat."

Ahurhirea a Durearilor tră Amintari

³ Sh-după tsi elu eara apunat pri Muntili a Masnjilor năinti a templui, Petrul, Iacovul, Ioanul shi Andrea lu ntribară dinăparti:

⁴ "Dză-nă, cāndu va s-facă aesti lucrī sh-cai va s-hibă semnul a chirolu tsi tuti atseali lucrī va s-facă?"

⁵ Isusul apândisinda a lor ahurhi s-dzăcă: "Băgats mintea s-nu vā-arādă vāră.

⁶ Că va-s yinā multsă pi numa a mea dzăcānda: 'Mini escu Hristolu.' Sh-va si s-arādă multsă oamīnji.

⁷ Ma cāndu s-avdzāts si zburāscu di alumti sh-di hābāri di alumti, nu vā cutrimburats, cā aesti lucrī prindi si s-adarā, ma nu va s-hibā bitisita.

⁸ Va sā scoalā natsiunea contra a natsiunāljei, amirārīljea contra a amirārīljei, va s-facă cutremburi pri multi locuri, va s-aibā jali di pāni sh-mintituri. Atseli lucrī va s-hibā ahurihirea a durearilor di amintari.

⁹ Cāshtigats-vā ti bana a voastră! Că va vā prida la giudicātorlji sh-va vā batā tu sinagogă. Va vā scoatā năinti a guvernatorilor shi a amiradzilor tră itia a mea tsi s-mārtirsits năinti a lor.

¹⁰ Ma năinti prindi tsi s-hibā predicatā evanghelul la tuts oamnjili.

¹¹ Cāndu va vā aducă s-vā prida, s-nu avets gaile di ma năinti tră atsea tsi prindi s-dzătsets shi s-nu minduits tsiva. Dzătsets tsi vā yini tu minti tu oara atsea, cā nu hits voi tsi grits ma easti Duhlu Sāmtu.

¹² Tora fratili va prida fratilu a lui la moarti shi tatālū hiljilu, sh-hiljilji va sā scoalā contra a pārintsilor sh-va lă facă s-moară.

¹³ Voi va s-hits aurats di tuts tră itia a numāljei a mea, ma atselu tsi va s-aravdā pānā tu soni, va s-hibā ascăpat."

Munduirea Atsea Mara

¹⁴ "Sh-cāndu s-u videts urātsāmea a-aspārgātūrāljei [tsi easti spusă di prufitul Daniel], tsi sta aclo iu nu prindi s-eara [cai ghivāseashti s-aduchească], atumtsea atselji tsi va s-hibā tu Iudea, s-fugă pri muntsă.

¹⁵ Atselu tsi easti pri citia a casāljei, s-nu dipunā, sh-nitsi s-intrā tu casă di loari tsiva di la casa-a lui.

¹⁶ Atselu tsi va s-hibā tu cāmpu, s-nu s-toarnā năpoi di loari stranjilu a lui.

¹⁷ Tora cavai di muljerili sārtsinati sh-atseali cu njitsi tu sinā, tu atseali dzālī.

¹⁸ Pārăcālsits-vā tsi fudzirea a voastră s-nu hibā iarna.

† 12:42 Easti părădz nicu dip, un monetu.

¹⁹ Că tu atsea dzuă va s-hibă ună munduirei mari, ma mara dit apărnjita a adrariljei a omlui tsi featsi Dumnidzâlū pănă ază, sh-ahtari nu va s-aibă pute.

²⁰ Macă Domnulu nu va li-avea shcurtată atseli dzăli, nitsiunu om nu va s-ascăpa, ma Domnulu li shcurtă atseali dzăli tră itia a aleptsilor tsi elu lă aleapsi.

²¹ Atumtsea macă vără va vā-dzăcă: 'Ia, Hristolu easti aoa', ică: 'Easti aclo', nu lu pistipsitsă.

²² Că va s-easă hristoshi arădioshi sh-prufits arădioshi tsi va s-facă semnji shi thavmati tsi s-arădă, ma s-poată sh-aleptsălji.

²³ Ma voi băgats minti! Ia, mini vā spushă ti itsido."

Turnarea a Hiljilui a Omlui

²⁴ "Tu atseali dzăli, după munduirea atsea, soarili va sã scutidisească sh-luna nu va s-da lunjina a ljei.

²⁵ Stealili a tserlui va s-cadă sh-puterili di tu tseruri va s-trunduească.

²⁶ Atumtsea va lu veadă Hiljilu a omlui yininda pri niori, cu puteari mari sh-măiri.

²⁷ Atumtsea elu va pitreacă anghilji a lui sh-va li-adună aleptsălji a lui dit patruli vimturi, dit mardzina a loclui pănă tu mardzina a tserlui."

Parabola a Hiclui

²⁸ "Tora achicăsits nvitsătura a hiclui: cându dedzili a lui s-muljeadză shi scoată frândzi, voi u shtits că veara easti aproapi.

²⁹ Ashă sh-voi, cându va videts că ma s-facă aesti lucri, s-lu shtits că Hiljilu a omlui easti aproapi, ningă ushă.

³⁰ Dealiheha ma vā dzăc: că aestă ghenerată nu va s-treacă, pănă cându tuti aesti va s-hibă adrati.

³¹ Tserlu sh-loclu va s-treacă, ma zboarili a meali nu va s-treacă."

Băgats Oară ti Chirolu di Soni

³² "Căt di atsea dzuă sh-di atsea oară, vără nu u shtii, nitsi anghilji dit tser, nitsi Hiljilu, ma mash Tatălu.

³³ Băgats minti, s-hits dishtiptat shi părăcālsits-vă, că nu shtits cându va s-hibă oara.

³⁴ Easti ca un om tsi nchisinda ti cali, alasi casa a lui shi da puteari a huzmichearilor a lui, cathiun tu loclu a lui, sh-portarlu lu urseashti s-hibă dishtiptat.

³⁵ Tră atsea stats dishtiptat, că nu lu shtits cându va s-yină domnulu ali casi, seara ma njeadzānoapti, cându cānti cucotulu, ma dimineatsa,

³⁶ tsi turnānda niashtāptat, s-nu vā află tu somn.

³⁷ Tora, aestă tsi vā dzăcă a voauă, lă-u dzăcă a tutulor: S-hits dishtiptat!"

14

Apofăsirea a Preftsilor

¹ După doauă dzăli eara Pashtili sh-Adzāmili, sh-ma mārili a preftsilor shi scriblji căfta cum s-lu acătsa Isusul cu ilei, shi s-lu vātāma.

² Ma dzătsea: "Nu tu chirolu a sərbătoarāljei, tsi s-nu aibă mintitură tu popul."

Isus tu Betania

³ Isusul eara tu Betania, tu casa al Simon tsi eara lepros, sh-cāndu eara la measă intră ună muljear cu un vasă di alabastru cu untulem njiurizmos

cu nard curat, multu scump sh-ea lu frâmsi vaslu di alabastru sh-lji lu-vârsă untulemlu pri cap.

⁴ Niscăntsă s-nărăiră sh-dzāsiră: "Cătse tută aestă hărgiuri a untulemlui?"

⁵ Că aestu untulem putea s-vindea ma multu di trei suti di denari shi aesti si s-da a niavutsilor. Sh-eara nevrissit cu năsu.

⁶ Ma Isusul dzăsi: "Alăsats-lu! Cătse u munduits? Ea featsi un lucru bună tră mini.

⁷ Că niavutsilji va lji avets totăna cu voi, sh-cându s-vrets, putets s-lă fătsets ghini. Ma mini nu va mi-avets totăna.

⁸ Ea featsi atsea tsi putu, aumsi di ma năinti tru plu a meu tră ngrupari.

⁹ Dealieha ma vâ dzăcă că tu tută dunjeaua iutsido tsi va s-hibă predicat aestu evanghelu, va sâ spunea shi atsea tsi ea featsi, tră adutsearea aminti a ljei."

Pretsul a Pridariljei

¹⁰ Atumtsea Iuda Iscariotul, un di doisprădzatsilji, s-dusi la mărilji a preftsilor tsi s-prida Isusul.

¹¹ Sh-elji cându lu avdzără, s-hărsiră sh-lji tăxiră că va lji da părădzi. Ashă elu căfta oara tsi prindi tră pridari.

Etimăsirea a Pashtiljei

¹² Tu prota dzuă a Adzânilor, cându s-featsi curbanlu a Pashtiljei ucenitsilji a lui dzăsiră: "Iu vrei s-nidzem s-adrăm di măcari Pashtili?"

¹³ Sh-elu pitricu doi di ucenjitsili a lui dzăcânda: "Imnats tu cāsăbă sh-aclo va s-adunats un om tsi tsăni un stamnă plină cu apă, urmats-lu atselu.

¹⁴ Sh-aclo iu elu va s-intră, dzătsets-lji a domnului ali casi: 'Nvitsătorlu ntreabi: Iu easti udălu tsi putem s-măcăm Pashtili cu ucenitsilji a melji?"

¹⁵ Sh-elu va vâ spună nsus ună udă mară uidisită sh-gata. Aclo etimăsits tră noi."

¹⁶ Ucenitsilji a lui s-dusiră, agiumsiră tu cāsăbă aflară ashă cum dzăsi elu, sh-etimăsiră Pashtili.

Tsina a Pashtiljei

¹⁷ Cându s-featsi seară, Isusul vini cu doisprădzatsilji.

¹⁸ Cându ma shidea la measă sh-ma măca, Isusul dzăsi: "Dealieha vâ dzăcă că un di voi tsi ma măcă cu mini, va mi vindă."

¹⁹ Atumtsea elji ahurhiră sâ nvirineadză sh-dzătsea un cu alantu: "S-nu hiu mini?" [Shi un altă dzăsi: "S-nu hiu mini?"]*

²⁰ Sh-elu, apândisinda lă dzăsi a lor: "Easti un di doisprădzatsilji tsi moalji cu mini tu cătsân.

²¹ Ma Hiljilu a omlui ma s-dutsi cum easti scriată tră năsu, ma cava i di atselu om tsi vindi Hiljilu a omlui. Va eara ma ghini tră năsu, tsi atselu om s-nu eara amintat pute!"

Pisti-ligare a atsea Noaua

²² Sh-cându elji ma măca, Isusul lo pânea, u ghinucuvântă, u pârtsă, sh-lă-u deadi a lor dzăcânda: "Loats sh-măcats. Aestu easti tru plu a meu."

²³ Deapoea lo cupa, lu hărstăsi, lă-u deadi a lor sh-tuts biură di năsă.

²⁴ Atumtsea lă dzăsi: "Aestu easti sândzilu a meu, a pisti-ligariljei, tsi s-vearsi tră multsă.

²⁵ Dealieha vâ dzăcă că nu va beau ma dit carpolu a ayinjljei pănă tu atsea dzuă cându va s-u beau di nou tu amirăriljea al Dumnidzău."

* 14:19 Tu alti manuscrisi aestă nu s-află.

²⁶ Sh-după tsi cântară un himn[†], ishiră shi s-dusiră câtră Muntsili a Masnjilor.

Isusul sh-Petrul

²⁷ Isusul lă dzăsi a lor: "Voi tuts va s-vă scandalizats cu mini aestă seară, că easti scriată:

'Va lu agudescă picurarlu

sh-oili va s-arăspândească.'

²⁸ Ma după tsi va mi-injedz, mini va mi duc năinti di voi tu Galilea."

²⁹ Sh-Petrul lji-dzăsi: "Ca s-hibă că tuts alantsilji si scandalizeadz cu tini, mini nu va mi scandalizescu."

³⁰ Sh-Isusul lji-dzăsi: "Mini ma ts-dzăcă dealihea că ază, tu aeastă noapti, năinti tsi cucotlu s-cântă doauă ori, tini va mi alipideshti trei ori."

³¹ Ma elu insistânda, dzătsea: "Sh-ca s-hibă că prindi s-mor cu tini, nu va ti alipidescu pute." Ună soi dzăsiră sh-tuts alantsilji.

Isus tu Ghetsemani

³² Deapoea agiursiră la un loc tsi s-acljima Ghetsemani, sh-elu lă dzăsi a ucenitsilor a lui: "Apunats-vă aoa, până cându mini s-hiu pârăcălsită."

³³ Sh-lo cu năsu Petrul, Iacovul sh-Ioanul, sh-ahurhi s-aibă frică sh-agonii.

³⁴ Sh-lă dăsi a lor: "Suflitlu a meu easti multu nvirinat, până tu moarti, armănets aoa shi s-hits dishtiaptat."

³⁵ Sh-cum s-dusi niheam năinti, cădzu pi dintsi shi s-pârăcălseă, tsi ma s-eara putut, s-fudzea di la năsu aestă oară.

³⁶ Sh-dzăsi: "Abba, Tate, itsido tră tini easti putut, dipârteadz-lu di la mini aestă cupă. Ma nu atsea tsi voi mini, ma atsea tsi vreî tini!"

³⁷ Apoia s-turnă năpoi, sh-lji află durnjinda sh-lji dzăsi a Petrului: "Simon ma dornji? Nu putush s-stai dishtiaptat nitsi ună oară?"

³⁸ Armănets dishtiaptat sh-pârăcălsits-vă tsi s-nu intrats tu cărteari. Duhlu easti etimu, ma truflu easti niputut."

³⁹ S-dipărtă năpoi shi s-pârăcălsi dzăcânda idhiili zboari.

⁴⁰ Cându s-turnă, lă află năpoi tu somn, că ociljili a lor eara greli sh-elji nu shtia tsi s-apândisea.

⁴¹ S-turnă di a treia oară sh-lă dzătsi a lor: "Ninga ma durnjits sh-vă discurmats. Agiundzi, vini oara! Ia, Hiljilu a omlui ma s-prida tu mănji a amărtioshilor.

⁴² Sculats-vă, s-ni dutsem. Ia, atselu tsi ma mi prida easti aproapi!"

Acătsarea al Isus

⁴³ Sh-tu atsea oară, cându elu ninga ma grea, vini Iuda, un di doispridzat-silji, sh-cu năsu ună multsămi mară cu spăts sh-cu pălenji, pitricut di mărliji a preftsilor, di scriblji sh-di aushlji.

⁴⁴ Sh-elu tsi ma lu pridea lji avea dată a-lor un semn: "Atselu tsi va s-bashu, elu easti. Acătsats-lu shi adutsets-lu cu mari căshtigă."

⁴⁵ Sh-cum agiumsi s-apruche trăoară la năsu sh-lji dzăsi: "Rabbi, Rabbi!" Sh-lu bāshe.

⁴⁶ Atumtsea elji băgară mănă pri năsu sh-lu-acătsară.

⁴⁷ Un di atselji tsi s-alfa aclo, scoasi spata, agudi sclavlu a arhipreftului sh-lji tălje ureaclja.

⁴⁸ Sh-Isusul apândisinda, lă dzăsi: "Avets vinit cu spăts sh-cu pălenji tsi s-mi acătsats?"

[†] 14:26 Eara un adet a Iudeilor tsi s-cânta un psalm tu vahtea a Pashtiljei. Năinti di măcari elji cântau Ps. 113-114 shi Ps. 115-118 după vahti di măcari.

⁴⁹ Cathi dzuã earam namisa di voi tu templu nvitsânda sh-voi nu mi acâtsat. Ma aestã s-fatsi tra si mplineascã Scriturili.”

⁵⁰ Atumtsea ucenitsilji lu alãsarã sh-fudzirã tuts.

⁵¹ Sh-un tinir, tsi era anvãrtit cu un pãndzã pi trupu dispuljat ma lu urma, sh-elji lu acãsarã.

⁵² Elu u alãsã pãndza sh-fudzi dispuljat.

Isus Nãinti al Sinedru

⁵³ Atumtsea elji lu dusirã Isusul la arhiprefltu iu s-adunarã mãrilji a preftsilor, aushlji shi scriblji.

⁵⁴ Petrul lu urmã di diparti pãnã nãuntru tu pãlatlu a arhiprefltului shi s-apunã aclo deadun cu vigljitorlji shi s-ncãldza nãngã foc.

⁵⁵ Sh-mãrilji a preftsilor sh-tutã sinedrul cãfta mãrtirii contra al Isus s-lu vãtãma, ma nu ma afla.

⁵⁶ Multsã oamĩnj fãtsea mãrtirii arãdioasã contra a lui, ma mãrtiriili a lor nu s-uidisea.

⁵⁷ Atumtsea niscãntsã si scularã sh-mãrtirsirã cu ilei contra a lui dzãcãnda:

⁵⁸ “Noi lu avem avdzãtã cã tsi ari dzãsã: ‘Mini va lu aspargã aestu templu adratã cu mãnji, sh-di trei dzãli va s-adarã un altu tsi nu easti faptã di oamnjilji.’”

⁵⁹ Ma nits ti aestã mãrtiria a lor nu s-uidisea.

⁶⁰ Atumtsea si sculã arhiprefltul namisa di cunvendã sh-lu ntribã Isusul dzãcãnda: “Nu apãndiseshti dip? Tsi ma mãrtirsescu aeshtã contra di tini?”

⁶¹ Ma elu pãpsi sh-nu apãndisi dip. Arhiprefltul nãpoi lu ntribã sh-lji dzãsi: “Tini eshti Hristolu, Hiljilu a Ghinicuvãntãtlui?”

⁶² Sh-Isusul dzãsi: “Mini escu. Sh-voi va lu videts Hiljilu a omlui apunat tu nandreapta a Puteariljei shi vininda cu norilji a tserlui.”

⁶³ Atumtsea arhiprefltul, arupãnda stranjlji dzãsi: “Tsi ananghi avem ti mãrtirioshilji?”

⁶⁴ Voi lu avdzãt blãstemlu, cum lu videts?” Sh-tuts lu giudicarã cu moarti.

⁶⁵ Sh-niscãntsã ahurhirã s-lu scucnea, s-lji anvãlea fatsa, shi s-lu agudea cu shupleacã shi s-lji dzãtsea: “Prufitipsea!” Sh-vigljitorlji lu agudea.

Petrul Arniseashti Isusul

⁶⁶ Cãndu Petrul eara nghios tu ubor, vini un di huzmichearili a arhiprefltului.

⁶⁷ Sh-cãndu vidzu Petrul tsi ma s-ncãldza, lu vidzu cu cãshtiga sh-lji dzãsi: “Sh-tini earai cu Isus Nazareas.”

⁶⁸ Petrul alipidãnda dzãsi: “Nu lu cunosc, sh-nu achicãsescu tsi dzãtsi.” Deapoea ishi nafoarã tu intrata a uborlui sh-cucotlu cãntã.

⁶⁹ Sh-huzmicheara vidzãnda nãpoi ahurhi s-lã greascã atsilor tsi eara aclo: “Aestu easti di nãshi.”

⁷⁰ Ma elu nãpoi u-ari alipidat. Sh-niheamã ma nãpoi oamnjili lji dzãsirã nãpoi a Petrului: “Dealihea tini eshti un di atselji, cã tini eshti Galilean sh-grearea a ta s-cunoashti.”

⁷¹ Ma elu ahurhi s-blastimã shi si spigiurã: “Mini nu lu cunosc atselu om ti cai ma grits.”

⁷² Sh-cucotlu cãntã di a doaua oarã. Atumtsea a Petrului lji-vini tu minti zborlu tsi Isusul lji avea dzãsã: “Ma nãinti tsi cucotlu s-cãntã di doauã ori, tini va mi aleapidz trei ori.” Sh-cum mindui aestã, plãmsi.

15

Isusul Năinti al Pilat, Guvernatorlu Romac

¹ Curund dimineatsa mărili a preftsilor cu aushilji, scriblji sh-tut Sinedriul fătsea consiliu, u ligarā Isusul, lu dusirā nafoarā sh-lji-lu-deadirā al Pilat.

² Sh-Pilatul lu ntribā: "Tini eshti amirālu a Iudeilor?" Sh-elu apāndisinda lji dzāsi: "Tini dzāts!"

³ Mărili a preftsilor lu acuza di multi lucři, ma elu nu apāndisea dip.

⁴ Pilatul lu ntribā nāpoi dzācānda: "Nu apāndiseshti dip? Vedz ti cāti lucři ti acuzeascā!"

⁵ Ma Isusul nu apāndisi dip, sh-Pilatul arması ciudisitā.

⁶ Tu cathi sārbaşoari eara ca adet tsi sālāghea a lor un hāpsānit, caitsido tsi populu cāfta.

⁷ Sh-eara tu hapsı un om acljimatā Baraba, deadun cu sotsilji a lui rebilj, tsi avea faptā un vātāmari la un ribiljusiri.

⁸ Sh-multsāmea, aurlānda, ahurhi tsi s-caftā s-facā ashā cum avea faptā totāna cu nāshi.

⁹ Iarā Pilatul lā apāndisi a lor dzācānda: "Vrets s-vā sālāghescu amirālu a Iudenjilor?"

¹⁰ Cā lu shtia tsi mărili a preftsilor lu avea pridatā di inati.

¹¹ Ma mărili a preftsilor deadirā curaiu a multsāmiljei s-cāfta sālāghirea al Baraba.

¹² Sh-Pilatul lo zborlu nāpoi sh-lā dzāsi a lor: "Tsi vrets s-fac cu atselu tsi voi lu acljimats amirālu a Iudeilor?"

¹³ Elji aurlarā nāpoi: "Crutsisits-lu!"

¹⁴ Sh-Pilatul lā dzāsi a lor: "Ma tsi arāu ari faptā?" Atumtsea elji aurlarā sh-ma multu: "Crutsisits-lu?"

¹⁵ Trā atsea Pilatul vrānda s-lji arāsea a multsāmiljei, lā-u sālāghi Baraba. Sh-dupā tsi zāpālirā Isusul, lā-u deadir a lor tsi s-lu crutsisea.

Pizuirea Năinti a Crutsisiriljei

¹⁶ Sh-suldatsilji lu-dusirā Isusul tu uborlu di nāuntru, tu pretorium sh-adunarā tutā cohorta.

¹⁷ Lu-nviscurā cu mitashi, lji mplātirā unā cāruni di schinji sh-lji-u băgarā pri capā

¹⁸ Deapoea ahurhirā s-lu saluteascā, dzācānda: "Sānātati amirālu a Iudeilor!"

¹⁹ Sh-lu agudea pristi capā cu un cālam, lu scucnea sh-dzinucljinda dininti a lui, lu alāvda.

²⁰ Dupā tsi arāsirā cu nāsu, lu disviscurā mitasha, lu nviscurā cu stranjili a lui, sh-lu scoasirā afoarā s-u crutsisea.

Crutsisirea

²¹ Elji ursirā un cālător, Simonul di Cirenea tsi s-turna dit agru, tatālu al Alexandru sh-al Rufi, tsi s-lu tsānea crutsea a lui.

²² Deapoea lu dusirā Isusul tu loclu acljimatā Golgota, tsi va s-dzācā "Loclu a Cafcāljei."

²³ Lji deadirā s-bea yinā misticat cu njirā, ma elu nu u lo.

²⁴ Sh-dupā tsi lu crutsisirā, lji pārtsārā stranjili a lui sh-arcarā soarti tsi s-shtia tsi va avea cathiunu.

²⁵ Eara oara a treia* cādu lu crutsisirā.

* 15:25 Ora a treia va s-dzāc ora noauā dimineatsa

²⁶ Scritura tsi spunea itia a cătiğurisiriljei tsi eara băgată pristi năsu dzătsea: "Amirălu a Iudeilor."

²⁷ Deadun cu năsu crutsisiră doi furi, un tu nandreapta a lui sh-alantu tu nastănga a lui.

²⁸ [Ashă si mplini Scritura tsi dzătsi: "Elu s-luguri cu urutsilji.]"†

²⁹ Sh-atselji tsi tritsea atsia aproapi lu ngiura sh-giucănda caplu, dzătsea: "Tini tsi aspărdzeai templu sh-lu adrai di trei dzăli,

³⁰ ascapă-ti sh-dipună di crutsi."

³¹ Tutashă sh-mărilji a preftsilor shi scriblji arădănda dzătsea cu un alantu: "Alantsilji lă ascăpă, ma elu nu poati s-ascapă.

³² Hristolu, amirălu a Israelui, s-dipună tora di crutsi tsi s-lu videm shi s-lu pistipsim." Sh-atselji tsi eara crutsisit deadun cu năsu, lu ngiura.

Moartea al Isus

³³ Deapoea cându vini a shasea oară, ntuneariclu amvăli tut loclu până la a noaua oară.

³⁴ Sh-la oara a noaua Isusul aurlă cu boatsi anală: "*Eloi, Eloi lama sabacthani?*", tsi va s-dsăcă: "*Dumnidzălu a meu, Dumnidzălu a meu cătse mi ai alăsāt?*"

³⁵ Sh-niscăntsă di atselji di aproapi, cându avdzără, dzăsiră: "Ia, elu ma greashti al Ilia!"

³⁶ Atumtsea un di năshi vini trăoară mulje un sfungar tu puscă, sh-după tsi u băgă tu un călami lji-u deadi s-bea, dzăcănda: "Alăsats-lu, s-videm macă va yină Ilia s-lu dipun nghios."

³⁷ Ma Isusul cum featsi un sghileari mari deadi suflitlu.

³⁸ Sh-velul‡ tu templu s-disică pi dau di nsus până nghios.

³⁹ Centurionul tsi stătea năinti al Isus, cându vidzu că Isusul zghili ashă, sh-deadi suflitlu, dzăsi: "Dealihea aestu om eara Hiljilu a Dumnidzălui!"

⁴⁰ Atsia eara tutashă sh-muljerili tsi videa di diparti. Namisa di năsi eara Maria Magdalena sh-Maria, muma a Iacovul atsel njiclu sh-al Iose, sh-Salomeia,

⁴¹ tsi lu avea urmat sh-lji avea huzmitipsită di cându eara tu Galile, eara sh-multi alti tsi avea vinit deadun cu elu tu Ieruzalem.

Ngruparea

⁴² Tora s-apruche seara, sh-eara Etimăsirea, tsi va s-dzăcă apirirea di Sămbătă,

⁴³ Iosif dit Arimatea, un consilier respectat, cai ashtipta amirăriljea a Dumnidzălui, cu curaiu intră la Pilatul shi căftă trupu al Isus.

⁴⁴ Sh-Pilatul s-ciudisi tsi tora elu avea murit. Acljimă centurionlu sh-lu ntribă macă avea murit di mult chiro.

⁴⁵ Shi cum si siguripsi di centurionlu, lji lu alăsă trupu al Iosif.

⁴⁶ Aestu, după tsi acumpără ună pândză, lu dipună Isusul di crutsi, lu amvărti cu pândză sh-lu băgă tu un murmintu tsi erea disapt tu cheatră, deapoea arucuti un cheatră dininti di usha a murmintului.

⁴⁷ Sh-Maria Magdalena sh-Maria, muma al Iose mutrea iu lu băgară.

16

Nyearea al Isus

¹ Cum tricu Sămbătă, Maria Magdalena sh-Maria, muma al Iacov, sh-Salomea, acumpără njurizmati s-nidzea s-aundzea Isusul.

† 15:28 dit Isaia 53:12 ‡ 15:38 Velul easti ună pândză tsi diparts doauă udădzili

² Dimineatsa tu prota dzuă a stămănăljei, multu curund, eali viniră la murmintu cându ma isha soarili.

³ Sh-dzătsea namisa di năsi: "Cai va nă-u arucutească cheatra di la intrarea a murmintului?"

⁴ Ma cându sculară oclilji, vidzură că cheatra eara arucutită cu tută că eara multu mari.

⁵ Intrară la murmintu sh-vidzură un tinir tsi eara apunat di nandreapta, nviscut cu albi, sh-armasiră aspărați.

⁶ Ma elu lă dzăsi a lor: "Nu vâ aspărats! Voi căftats Isus Nazareanul tsi eara crutsisită, elu s-nyie, nu easti aōa. Ia, loclu iu eara băgată.

⁷ Tora imnats s-lă-dzătsets a ucenitsilor a lui sh-a Petrului că elu ma s-dutsi dininti di voi tu Galilea, aclo va lu videts ashă cum vâ dzăsi."

⁸ Sh-eali ishiră trăoară sh-fudziră dit murmintu că li acătsă cutremburu sh-ciudia, sh-nu lji-dzăsiră tsiva a văuri că avea frică.

Isusul Nyeat Vidzut di Niscăntsă

⁹ [Tora Isusul după tsi eara nyeat dimineatsa tu prota dzuă a stămănăljei, s-fănipsi prota ali Marii Magdalena, di la cai avea agunit shapti demonji.

¹⁰ Ea s-dusi sh-lu spusi a lor tsi eara deadun cu năsă tsi văita sh-plândzea.

¹¹ Ma aeshtsă cându avdzără că eara yiu shi s-vidzu di ea nu lu pistipsiră.

¹² După aesti lucrui, s-fănipsi tu ună altă formă a doilor di năshi, tsi ma nidzea tu hoară.

¹³ Sh-elji s-dusiră sh-lu spusiră la alantsi, ma nitsi aeshti nu lu pistipsiră.

Isusul Nyeat cu Ucenitsilji

¹⁴ Tu soni s-fănipsi a unsprădzatsilor cându eara la measă sh-lji vărghi tră nipistipsirea a lor sh-tră chitrisirea a inimăljei, că nu avea pistipsită la năshi tsi lu avea vidzută nyeat.

¹⁵ Deapoea lă dzăsi a lor: "Nidzets tu tută lumea sh-predicats evanghelul a tutulor.

¹⁶ Atselu tsi pistipseashti shi s-păteadzi, va s-hibă ascăpat. Ma atselu tsi nu ari pistipsit va s-hibă giudicat.

¹⁷ Aesti sântu semnili tsi va s-urmeadză atselji tsi va s-pistipsească: tu numa a mea elji va li agunească demonjilji sh-va s-grească limbi nali,

¹⁸ va li acatsă cu mână năpărtsili, sh-macă va s-bea tsiva ti muriri, nu va s-facă tsiva arău, va s-bagă mănjlji pi lăndzitslji sh-aeshti va s-vindică."

Scularea al Isus tu Tser

¹⁹ Domnul Isus, după tsi lă gri a lor, si sculă tu tser shi s-apună tu nandreapta a Dumnidzălui.

²⁰ Deapoea elji fudziră sh-predicară iutsido, iară Domnul lucra deadun cu năshi sh-alihipsea zborlu cu seamnili tsi lu urma. Amin.]*

* 16:20 Aesti stihuri nu s-află tu alti manuscrisi

Prota Epistolă Cătră Timoteu

¹ Pavlul, apostul al Isus Hristos, cu dimândăciunea al Dumnidzău, Ascăpătorlu a nostru, sh-al Domnu Isus Hristos, tsi easti nădia a noastră,
² al Timoteu, hiljilu a meu alihios tu pisti:

Har, njilă sh-pace di la Dumnidzălu Tatăl a nostru sh-di la Isus Hristos, Domnul a nostru.

Timoteu Prindi s-Ncuntreadză Nvitsătorlji Atselji Arădioshi

³ Ashă cum ti pārăcâlsii cându mi nchisii cătră Machidunii, shedz tu Efes s-dimândză niscăntsă oamini tsi s-nu nveatsă ma nvitsături arădioasi,

⁴ s-nu ascultă mituluyii sh-ghenealoghii tsi nu au bitisiri, tsi facă ncăceari ma multu dicăt năntirea a faptilor a Dumnidzălui sh-tsi s-andoapir tu pisti.

⁵ Năetea aishte dimândăciuni easti vrearea di-la ună inimă curată, di-la ună conshtintsă chischină sh-di-la ună pisti fără ipucrizii.

⁶ Niscăntsă, cara s-dipărtară di aesti lucrî, s-turnară la zboari goali.

⁷ Elji vor s-hibă nvitsători a legiljei, ma nu aduchescu nitsi atseali tsi dzăc, nitsi atseali tsi spun cu sigurantsă.

⁸ Sh-noi shtim că legea easti bună, macă omul u foloseashti cum prindi.

⁹ Noi shtim, că legea nu easti faptă ti ndreptul, ma ti atselji tsi ncalcă legea, tră-ribeljilji, tră atselji fără-dumnidză, tră amărtioshlji, tră nîsămtsălji sh-lăvoshilji, tră atselji tsi vatămă tatăl sh-muma, tră vătămătorlji,

¹⁰ tră curvarilji, tră homosexualilji, tră arăchitorilji a oamnjilor, tră arăditorilji, tră atselji tsi ncalcu spigiurarea, sh-tră caitsido altu tsi easti contra a nvitsăturăljei atsiljei sănătoasă.

¹¹ Aestă nvitsătură easti după Evanghelul a mărirljei a ghinicuvăntatului Dumnidză tsi nji si pistipsi a njia.

Harul al Domnu ti Pavlu

¹² Mini hăristescu Hristolu Isus Domnul a nostru, tsi nji deadi fuchii, că mi află axiu tră pistipsiri, sh-mi băgă tu lucru.

¹³ Cu tută că cama nănti earam blăstimător, avinător sh-tiran, Dumnidzălu nji deadi njilă, că li fătseam di nishtirea sh-nipistipsirea a mea.

¹⁴ Harea a Domnului a nostru nji si deadi cu artirsiri deadun cu pistipsirea sh-vrearea tu Isus Hristos.

¹⁵ Aestu zbor easti pistipsit sh-axiu ti aprucheari didip: Hristolu Isus vini tu lumi ti ascăpari amărtioshlji, di la cai mini escu protlu.

¹⁶ Tră atsea mi njilui mini ca protlu a amărtioshilor, tsi Isus Hristolu s-aspună ma nănti tu mini tută arăvdarea a lui, tsi s-earam ca urnechi tră atselji tsi va s-pistipsească tu năsu tră bana eternă.

¹⁷ Tră atsea a Amirălui eternu, nimiritlu, nividzutlu, singurlu Dumnidză, s-lji hibă tinjii sh-măriri tu eta a etilor! Amen.

Lucrul al Timoteu

¹⁸ Ma ts-u pistipsescu aestă dimândăciuni, hiljiu a meu Timote, după prufitipsirili tsi s-featsiră ma nănti tră tini, tsi după atseali s-fatsă alumta atsea buna,

¹⁹ tsănănda pista sh-ună conshtintsă bună. Niscăntsă alipidănda, cădzură di pista a lor.

²⁰ Di aeshti suntu Imeneu sh-Alexandrul, tsi mini lji pridedu tu mănjili a Satanlui tsi s-nveatsă s-nu blastimă.

2

Dimândăciunili tră Părăcâlsiri

¹ Tsă fac rigeai năinti di tuti, si s-facă spigiurari, rugăciunji, interviniri sh-hăristisiri tră tuts oamnjilji,

² tră amiradzli sh-tră tuts atselji cai suntu tu puteari, tra s-putem s-tritsem ună bană arihătipsită sh-tu pace cu itsi dumnidzăsiri sh-tinji.

³ Aestă easti bună sh-arisită năntea al Dumnidzău, Ascăpătorlu a nostru.

⁴ Elu va tsi tuts oamnjilji si ascapă shi s-agiungă la cunushtearea a alihlji.

⁵ Un easti Dumnidzălu, sh-un singur easti misitlu ntră Dumnidzălu sh-oamnjilji: Hristolu Isus om,

⁶ tsi deadi bana ca arăscumpărari tră tuts, ca mărtirii tu chirolu tsi prindi.

⁷ Tră atsea mini mi băgară predicător sh-apostul – dzăc alihea, nu arăd – nvitsător la pângănjlji tu pisti sh-tu alihea.

⁸ Voi, tsi bărbatsli s-părăcâlsescă iutsido, sculănda mănjili atseali curati, fără năriri sh-fără ngrănji.

⁹ Tutashă, voi tsi sh-muljerili si nvească cu simplitati, cu tăpinii sh-cu tinjii, sh-nu cu cusitsi sh-cu furii, cu mărgăritări sh-cu stranji scumpi,

¹⁰ ma cu facti buni, cum lă-au hari a muljerilor tsi suntu spigiurati la Dumnidzău.

¹¹ Muljearea s-nveatsă tu tătseari, sh-cu sumbăgari tră tuti.

¹² Mini nu u alasă muljearea tsi s-nveatsă, sh-nitsi s-aibă autoritati pristi bărbatlu, ma si sta tăcută.

¹³ Că ma năinti s-featsi Adamlu, sh-deapoea Eva.

¹⁴ Sh-nu s-arăsi Adamlu, ma muljearea s-arăsi sh-cădzu tu amărtii.

¹⁵ Cu tută atsea ea va si-ascapă prit amintarea a cilimenjilor, macă ea va armănu tu pisti, tu vreari sh-tu sămtătsiri cu tăpinii.

3

¹ Aestu zbor easti pistipsit: Macă vără va si s-facă episcop, lucru bun va.

² Lipseashti tsi episcoplu s-hibă fără cusuri, bărbat a unei singur muljeari, mintimen, misurat, respectat, oaspitor, cădăr s-nveatsă sh-altă,

³ s-nu hibă dată după yinlu, s-nu hibă violent, ma s-hibă arăvdător, s-nu hibă gindăvos, s-nu hibă tāmăchear a părădzilor.

⁴ Elu prindi s-hibă om tsi u nicuchireashti ghini casa a lui sh-prindi s-aibă cilimenjlji ursits sh-cu multu respect.

⁵ Că macă vără nu shtii s-nicuchirească casa a lui, cum va s-aibă căshtigă ti bisearca a Dumnidzălui?

⁶ Episcoplu s-nu hibă macăt-turnat tu pisti, tra s-nu lji crească mintea shi s-cadă tu pozita a cătădzicăsirilji a draclui.

⁷ Elu prindi s-aibă mărtirii bună di la atselji di nafoară, tsi s-nu cadă tu rushinari shi s-nu s-acatsă tu laclu a draclui.

⁸ Tutashă diaconjili prindi s-hibă cu tinjii, nu cu doauă fătă, s-nu si s-da dup multu yin, s-nu hibă tāmăchear di amintatic ni-ndreptu.

⁹ Elji prindi s-tsănă cu conshtintsă curată mistiryiul a pistolji.

¹⁰ Aeshti si s-băgă ma năinti tu provă, deapoea s-facă huzmitipsirea a lor macă suntu fără cusuri.

¹¹ Muljerili a lor s-hibă tinjisiti, nu munafitsi, ma misurati sh-pistimeni tu itsido.

¹² Diaconjilji s-hibă bărbatsilji a unei singur muljeari, s-lă nicuchirească ghini cilmenjilji sh-alants oaminji ali fumelji.

¹³ Că atselji tsi au faptă ghini diaconia, amintă numă bună shi mari sigurantsă tu pista al Isus Hristos.

¹⁴ Ma ts-li scriu aesti lucruri că am nădii că va yină trăoară la tini,

¹⁵ ma, ma mi amănai, să shtii că cum oamnjilji prindi si s-poartă tu casa al Dumnidzâu, că voi crishtinilji hits bisearica a Dumnidzâului atsilui yiulu, colona shi thimeljiu a alihiljei.

¹⁶ Shi fără shubei că mistiryul a pistiljei easti mari:

Hristolu s-fănirusi tu trup,

s-ndriptă tu Duh,

s-aspusi la anghilji,

s-ghinihăbărsi la pânganjilji,

s-pistipsi tu lumi,

s-anăltsă tu măriri.

4

Dimăndăciunili al Timoteu

¹ Duhlu dzătsi curat, că tu chirolu di soni niscăntsă va u aleapidă pista, sh-va urmează duhurili arădioasi shi nvitsăturili a demonjilor.

² Atselji nveatsă arădearili cu ipucrizii, sh-au conshtintsă moartă, sh-arsă cu her ardios.

³ Elji va curmu nsurarea shi va s-vă ursească s-nu măcats niscănti di măcărili tsi Dumnidzălu adră si s-ljea cu hăristisiri di atselji tsi pistipsescu shi l-cunosc alihea.

⁴ Că itsi făptură a Dumnidzăului easti bună sh-tsiva nu easti ti arucari, macă s-ljea cu hăristisiri,

⁵ că easti sâmtsăsită prit zborlu a Dumnidzăului sh-prit părăcălsirea.

⁶ Macă lă-li nvetsi aesti lucruri a fratsilor sh-a surărilor, tini va s-hii un huzmichear bun al Isus Hristos, hrănit cu zboarili a pistiljei sh-a nvitsăturălei atsiljei buni, tsi urmeshiti.

⁷ Dipărteadză-ti di părăvuliili zurliti sh-prufani, shi nveatsă-ti tu dumnidzăsiri,

⁸ că talimea a truplui easti ti putsăn chiro axiu, ma dumnidzăsirea easti axiu ti itsido, că ari tăxirea a banăljei di tora sh-atsiljei tsi va yină.

⁹ Aestu zbor easti pistipsit sh-axiu di apruchiari didip.

¹⁰ Tră-aestă, noi ma lucrăm multu shi aluntăm, că avem nădăit la Dumnidzălu atsel yiulu, tsi easti Ascăpătorlu a tuts oamnjilor, sh-ma multu a pistimenjilor.

¹¹ Ursea aesti shi nvetsă-li aesti lucruri.

¹² Vără s-nu u atimusească tinireatsa a ta atsea noaua, ma fă-ti exemplu di pistimenji tu zbor, tu purtari, tu vreari, tu pisti sh-tu chischineatsă.

¹³ Bagă mintea la ghivăsirea discljīsă a Scriturălei, la urnipsirea shi la nvitsătură până s-yină mini.

¹⁴ Nu lalasă după mână doara tsi ts-easti dată prit prufitipsiri, cu băgarea a mănjilor pri tini di-la aushlji.

¹⁵ Minduia-ti di aesti shi s-armănji didip tu aesti, tsi năintarea a ta s-hibă vizut di tuts.

¹⁶ Afirea-ti tini sh-nvitsătura a ta, veagljii aesti lucruri, că, făcānda ashătsi, va s-ascachi bana a ta shi atselji tsi ti ascultă.

5

Veduvili, Aushilji shi Sclayilji

¹ Nu vârghea cu aspru un aush, ma urnipsea-lu ca tatăli a tău, sh-ma tinirlji ca frats,

² moashili ca muma, fetili ca surări cu chischineatsă.

³ Tinjisea veduvili tsi suntu tu ananghi.

⁴ Macă ună veduvă ari ficiori sh-nipots, aeshti s-nveatsă ma năinti să spună dumnidzăsirea câtră atselji di casa a lor shi s-tinjisească părintsălji a lor, că aestă easti arăsită năintea a Dumnidzălui.

⁵ Shi atsea tsi easti dealihea veduvă sh-ari armasă singur, nădăeashti la Dumnidzălu shi armăni tu spigiurari shi tu rugăciunji noapti sh-dzuă.

⁶ Iară atsea tsi băneadză nifrănat, cu tută că băneadză, easti moartă.

⁷ Dimândă-lă sh-aesti, tsi nitsiună s-nu hibă cu cusuri.

⁸ Macă vără nu s-căshtigheadzi di oamnjilji a lui, sh-ma multu di atselji a casălji a lui, elu u ari alipidat pitea shi easti ma arău di un nipistimen.

⁹ Ună veduvă si s-registreadză tu lista a veduvilor, ma s-hibă nu ma noauă di shaidzătsi di anji, shi s-aibă avută un singur bărbat.

¹⁰ Ea s-aibă mărtirii tră fapți buni, tsi ari criscută cilimenjilji a ljei, ari ashtiptată xenjilji, ari asplată cicloarili a sāmtsălör, ari agiutat niavutsłji, shi easti puitută dipriună cu itsido lucru bună.

¹¹ Ma nu aproachi veduvili ma nali, că, cându va si s-da după vrearili a lor, va s-arnisească Hristolu sh-va caftă si s-mărită.

¹² Deapoea ljea pri năsi giudicata, că au ncălcăt pitea di prota.

¹³ Meti eali si nveatsă s-hibă timbeli imnānda casă di casă, sh-nu mash timbeli, ma sh-dărdăroasi zburānda di geaba.

¹⁴ Tră atsea, voi tsi veduvili atseali nali si s-mărită, s-aibă cilimenji, si s-facă nicuchiri a căsilor shi s-nu da a contrarlui vără itii tră greari ti arău,

¹⁵ că niscănti tora s-turnară s-urmeadză Satanlu.

¹⁶ Macă vără pistimen ari veduvi tră căshtigari, s-li agiută shi s-nu si facă sartsină a bisearicălji, tsi bisearica s-poată s-agiută atseli tsi suntu tu ananghi.

¹⁷ Aushilji tsi chivernisească ghini lucrili a bisearicălji, si s-tinjisească di doauă ori, ma multu atselji tsi s-apustusescu cu predicari sh-cu nvitsari.

¹⁸ Că Scriptura dzătsi: "Nu lji leagă gura a boului cându alunseashti tu grănar," shi: "Lucrutorlu u ari cu dhichi paga a lui."

¹⁹ Nu aproachi nitsi ună acuză contra un aush, mash cându ari doi ică trei martiri.

²⁰ Iară atselji tsi amărtisescu vârghea-lji năintea a tutulor, tsi sh-alantsălji s-au frică.

²¹ Mini ti spigiură năintea a Dumnidzălui, al Hristos Isus sh-a anghililor atsilor aleptsă, tsi s-li fatsă aesti dimândăciuni fără pri-giudicari, shi nu fă tsiva cu hătări.

²² Nu ağunjiseati s-badză mănji la vară tsi su numeshti tră huzmitipsiri shi nu ti fă urtac tu amărtiili altsilor: Veaglji-ti chischin!

²³ Nu bea mash apă, ma ljea putsăn yin di stomaclu a tău sh-di lāngoarili a tali atseli multi.

²⁴ La niscăntsă oaminji amărtiili s-veadă lishor sh-imnă năintea a lor tu giudicată, iară la altsă s-veadă ma napoi.

²⁵ Tutashă, sh-faptili atseali buni s-ved, ma sh-atseali tsi suntu nividzuti nu pot s-armănă ascumti.

6

¹ Tuts tsi sântu sum giuglu a sclăvililjei si lji lugursească nicuchirlji a lor axii ti itsi tinjii, tsi numa a Dumnidzălui sh-nvitsătura a noastră nu si s-ngiură.

² Shi atselji tsi li au nicuchirlji pistimenji, s-nu lji atimusească că sântu frats, ma s-lă servirească sh-ma ghini, că atselji tsi au hăiri di lucrul a lor sântu pistimenji sh-vruts.

Nvitsători Arădioshi sh-Vrearea tră Păradz

Nveats-lă aeasti lucruri sh-dimândă-lă.

³ Macă vără nveatsă ună nvitsătură altă shi nu ascultă zboarili atseali sănătoasi a Domnului a nostru Isus Hristos sh-nvitsătura după dumnidzăsirea,

⁴ elu easti fudul shi nu shtii tsiva. Elji va ma multu debatsili shi ncăcearili cu zboari, di-la cai s-amintă zilia, ncăcearea, ngiurării, shubeili atseli arăli,

⁵ debatsili di geaba a oamnjilor cu minti asparti shi guliti di alihea, tsi minduescă că dumnidzăsirea easti tră amintari.

⁶ Ma dumnidzăsirea adutsi un mari amintatic, macă omul s-hărseashti cu atsea tsi ari.

⁷ Că noi nu avem adus tsiva tu aestă dunjauă, sh-nu va-lom tsiva cu noi.

⁸ Macă avem s-măcăm shi s-nă nvishtem, s-himă hărăstisită cu aestă.

⁹ Ma atselji tsi vor si s-facă avuts, cad tu căteari, tu cearc sh-tu multi orixi ni-minduiti sh-zărāsiti, tsi li afundusescu oaminjilji tu cădeari sh-aspărdzeari.

¹⁰ Că vrearea di păradzi easti rădătsina a tut arăliilor, shi avānda orixi multă, niscāntsi s-dipărtară di pisti sh-pătsără multi dureari.

Dimândăciunili di Soni Cătră Timoteu

¹¹ Ma tini, omul a Dumnidzălui, dipărteadză-ti di aesti sh-urmeadză ndriptatea, dumnidzăsirea, pitea, vrēarea, arăvdarea shi muljeatsa-a-inimăljei.

¹² Alumtă-ti tră alumta atsea buna a pistăljei. Ambratsăsea bana eternă, tu cai ti acljimară sh-tră cai ai dată bună mărtirii tră pitea năntea a mults martirii.

¹³ Ma ti spigiură năinti a Dumnidzălui, cai da bană a tutulor shi năinti a Hristolui Isus, tsi deadi ună mărtirii bună năntea al Pontius Pilat,

¹⁴ s-lu veagljii aestă dimândăciuni fără damcă sh-cusuri, până cându s-aspună Domnul a nostru Isus Hristos.

¹⁵ Elu tu chirolu tsi lipseashti va si s-aspună di Dumnidzălu, gh-inicuvântatu shi singurlu Domnitor, Amirălu a amirărilor shi Domnul a domnilor.

¹⁶ Elu singur u ari nimurirea shi sta tu lunjină niapruheată, tsi nitsiun nu u ari vidzută pute shi nu poati s-u veadă. Atsilui s-lji hibă tinjia shi putearea eternă! Amen.

¹⁷ Dimândă-lă avutslji a lumiljei aishtei s-nu hibă pirifanj, shi s-nu nădăească la ayishtearea tsi easti nisigur, ma tu Dumnidzălu, tsi nă da cu multeatsă itsido s-nă hărsească.

¹⁸ Dimândă s-facă ghinetsi, si s-facă avuts cu fapți buni, s-hibă giumertsă sh-etinji tră dari,

¹⁹ adunānda ca ayishteari un bun thimeljiu tră yinitura, tsi s-agiundzemu bana alihioasă.

²⁰ Timote, veagljii atsea tsi tsă s-ari pistipsită, firinda di zboarili atseali di geaba sh-lumeshti sh-di cuntrării atsiljei tsi cu nindriptati (gabimisht) s-acljeami shtiintsă,

²¹ tsi lu ambrătsisiră niscāntsi shi ishiră di pisti.

Harul s-hibă cu voi!

A Doaua Epistolă Cătră Timoteu

¹ Pavlul, apostulu al Isus Hristos prit vrearea a Dumnidzâului, tră bana tăxit prit pitea tu Hristolu Isus,

² al Timoteu, hiljilu a meu vrut:

Har, njilă sh-pace di la Dumnidzâu Tatăl, shi di la Hristolu Isus, Domnul a nostru.

Hăristisiri

³ Hăristisescu Dumnidzâlu, a cui lj-huzmitipsescu ashă ca ntânjilji a melji cu conshtincă curată, tsi fără păpsiri ti aduc aminti tu părăcâlsirili a meali, noaptea sh-dzua.

⁴ Cându aduc aminti lăcrinji a tali, am multu dor s-ti ved tra s-mi umplu cu harauă,

⁵ că aduc aminti pitea atsea alihioasa tsi easti tu tini, cai ma năinti eara la maia a ta Loida sh-la muma a ta Euniche sh-escu sigur că easti sh-la tini.

Inimusiri tră Armăneari Pistmen la Pavlul sh-la Evanghelul

⁶ Ti aestu motiv ma ts-u tăcânescu, s-u dishteptsi doara al Dumnidzâu tsi easti tu tini cu băgarea a mănjiilor a meali.

⁷ Că Dumnidzâlu nu nă deadi Duhlu tsi nă da frică, ma Duhlu tsi nă da fuchii, vreari sh-frunimeatsă.

⁸ S-nu ai arushâni s-mărtirseshtă Domnul a nostru, sh-di mini, hăpsănitlu a lui, ma mundaia-ti deadun cu mini ti evanghelul după putearea a Dumnidzâlui.

⁹ Elu nă ascăpă shi nă acljimă cu ună acljimari sămtă, nu după faptili a noastri, ma după scupolu a lui sh-după harlu, tsi nă si deadi tu Hristolu Isus năinti di ahurhita a chiolui.

¹⁰ Tora s-fănirusi prit aspunearea a Ascăpătorlui a nostru Isus Hristos, tsi dărămă moartea shi scoasi tu lunjină bana sh-nimurirea prit evanghelul,

¹¹ tră atsel, mini mi băgară predicător, apostul shi nvitsător.

¹² Di idyia itii mini ma mi munduescu sh-di aesti, ma nu am arushâni, că shtiu la cai am pistipsită sh-escu sigur că elu poati s-u veagljji atsea tsi nj-ari pistipsită până tu atsea dzuă.

¹³ Tsân-lu modelu a zboarilor atseali buni, tsi avdzăsh di la mini cu pisti sh-vreari, tsi suntu tu Hristolu Isus.

¹⁴ Veagljji ayishtearea atsea buna tsi s-pistipsi a tsăia prit Duhlu Sămtu tsi băneadzi tu noi.

Exempli di Pistimenji sh-di Nipistimenji

¹⁵ Tini lu shtii că tuts atselji tsi suntu tu Asia nj turnară plătăriili, sh-namisa di elji Fighelul sh-Hermogenul.

¹⁶ Domnulu s-lji da njilă a casâljei a Onesiforlui, că di multi ori nj-deadi curaiu sh-nu avu arushâni di prănghili a meali.

¹⁷ Shi, cându vini la Roma, mi căftă multu până-cându mi află.

¹⁸ Domnulu s-lji da s-află njilă di partea a Domnului tu dzua a lui. Tini lu shtii multu ghini cât agiutari nj featsi tu Efes.

2

Un Suldat Bun al Isus Hristos

¹ Tini, hiljilu a meu, nvărtusheati tu harul tsi easti tu Hristolu Isus,

² sh-atseali tsi avdzăsh di la mini năntea a multsor martirii, dă-li la oamînji pistimenji, tsi va s-poať s-nveatsă sh-altă.

³ Tini mpartsă-li cu mini munduirili, ca un suldat bun al Isus Hristos.

⁴ Că nitsiunu di atselji tsi s-ducă suldat nu s-minteashti cu lucrili a banăljei, tsi s-lji arăsească atsilui tsi lu-ari loată tu armată.

⁵ Tutashă, macă vără ljea parti tu arenă ca dalagător, nu si ncuruneadzî ma s-nu aibă alăgată după regulili a gioclui.

⁶ Agricultorlu tsi lucreadză multu prindi s-lu ljea protlu birichetlu.

⁷ Mînduia tră atseali tsi tsă dzăc, că Domnul va tsă da mînti tră tuti.

⁸ Adu aminti tsi Isus Hristolu, di fara a Davidului, s-nyie dit mortsă, după evanghelul a meu,

⁹ tră cai mini ma mi munduescu pănă tu prănghi ca un arău-făcător. Ma zborlu a Dumnidzălui nu s-leagă cu prănghi.

¹⁰ Tră atsea mini li aravdu tuti tră itia a alepsilor, tsi elji s-aibă ascăparea tsi easti tu Hristolu Isus, deadun cu mărirea eternă.

¹¹ Aestu zbor easti pistipsit, că:

Macă noi murim cu năsu, sh-va s-bănăm cu năsu.

¹² Macă noi arăvdăm, va s-domnim deadun cu năsu.

Macă va lu alipidăm, sh-elu va nă aleapid.

¹³ Macă him nipistimenji, elu armăni pistimen.

Că elu nu poati s-aleapid bănaticlu a lui.

Cuntrarea a Nvitsătorilor Arădioshi

¹⁴ Adu-lă aminti atsilor aesti lucrî, spigiurănda năntea a Domnului s-nu să ncaci cu zboari, că nu axizeashti shi fatsi arău atsilor tsi avdu.

¹⁵ Bagă mîntea s-eshti năntea a Dumnidzălui ca om aprovat, ca lucrutor tsi nu ari cătse si arushuneadză, că dzătsi ndreptu zborlu a alihiljei.

¹⁶ Afirea-ti di zboarăli atseli goali, tsi li dipărteadză oamnjilji ma multu di Dumnidzălu.

¹⁷ Nvitsătura a lor va să scurpisească ca ună cangrenă. Di aeshti suntu Himeneul sh-Filetul.

¹⁸ Elji s-dipărtară di alihea, dzăcănda că nyiearea easti faptă shi răstoană pîstea a niscăntsălor.

¹⁹ Cu tut atsea, thimeljilu atsel vărtoslu a Dumnidzălui sta nîminat, sh-ari aestă vulă: "Domnul lji cunoashti atselji tsi suntu a lui," shi: "Caitside tsi acatsi n-gură numa a Hristolui s-dipărteadză di arătatea."

²⁰ Tu ună casă mari nu ari mash vasi di furii sh-di asimî, ma sh-di lemnu sh-di lut, născănti tră tinjisiri, alantili nu tră tinjisiri.

²¹ Macă vără s-cătărseashti di aesti lucrî, va hibă un vasu di tinjii, sămtăsit sh-lipsit di Mastru, etimăsit di itsi lucru bun.

²² Dipărteadz-ti di orixile a tinireatsăljei sh-duti după ndriptatea, după pîstea, după vrearea sh-după pacea, deadun cu atselji tsi acljeamă Domnul cu inimă curată.

²³ Afireati tutashă di cuvendzăli atseali glari sh-fără mînti, shtiinda că atseali aducă ncăceari.

²⁴ Că huzmichearlu a Domnului nu prindi si s-ncaci, ma s-hibă moali cu tuts, axiu s-nveatsă oamnjilji sh-arăvdător.

²⁵ S-nveatsă cu muljeatsă contrarălji, cu nădii că Dumnidzălu lă da a lor mîtănjiusirea tsi s-agiungă s-cunoască alihea,

²⁶ shi s-ynă tu mînti, ascăpănda di cearcul a dracului, tsi lă ari acătsat roghi s-fac vrearea a lui.

3

Dumnidzāsirea tu Dzālili di Soni

- ¹ Prindi s-u shtii aestā: tu dzālili di ma nāpoi va yinā chiro greu.
- ² Oaminjilji va hibā egoishti, tāmācheari di pāradz, alāvđatori, pirifanji, blāstimātori, niascultātori a pārintsālor, aharishti a buneatsāljei, nipistimenji,
- ³ ni-durutsi, ni-puitiutsi, zburātori, ni-tsānutsi, cātilji, tsi nu l-vor buna,
- ⁴ prudotsi, cap-groshi, fudulji, cheflii ma multu di cāt dumnidzescu.
- ⁵ Atselji suntu dumnidzescu tu videari, ma alipidats a puteariljei a Dumnidzālui. Sh-di aeshti dipārteadz-ti.
- ⁶ Cā di la aeshti suntu atselji tsi intrā pri cāsi shi li arādā muljerili atseli ngārcati cu amārtii, apucati di orixi soi di soi.
- ⁷ Elji nveatsā totāna, ma pute nu poatā s-agiungu la cunushtearea a alihiljei.
- ⁸ Shi ashā cum Iannes sh-Iambresul lu cuntrarā Moisiul, ashā shi aeshti nvitsātori s-cuntreadzā a alihiljei, suntu oaminji mintiaspartā, sh-arnisits tu pisti.
- ⁹ Ma aeshti nu va neagā multu nāinti, ashā cum lā undzi sh-atsilor doi, cā zurleatsa-a lor va s-easā tu-padi sh-va s-veadā di tutsā.

Unā Dimāndāciuni tu Soni trā Timoteu

- ¹⁰ Sh-tini lu urmash di-aproapi nvitsātura a mea, purtarea, scupolu, pitea, arāvđarea, vrearea, insistarea,
- ¹¹ avinārili, munduirili tsi pātsāi tu Antiochi, tu Iconio, sh-tu Listra. Tini shtii tsi priağuniri tricui, ma Dumnidzālu mi ascāpā di tuti.
- ¹² Sh-tuts atselji tsi vor s-bāneadzā cu dumnidzāsiri tu Hristolu Isus va s-priağuneascā,
- ¹³ ma oaminjilji atselji arāilji sh-arādzātorlji va si s-ducā arāu sh-ma arāu, arādzānda altsālji sh-mintea a lor.
- ¹⁴ Ma tini armānā tu atseali tsi nvitsash sh-ti cāndārsish didip, shtiinda di la cai li nvitsashā.
- ¹⁵ Di cu ficiureatsā lcunoshti Sāmtili Scrituri, tsi pot s-ti facā shtiut trā ascāparea prit pistipsirea tsi easti tu Hristolu Isus.
- ¹⁶ Tutā Scritura easti insuflat di Dumnidzālu sh lipsit trā nvitsari, cāndārsiri, ndridezari sh-educatsii ti ndriptati,
- ¹⁷ tsi omlu a Dumnidzālui s-hibā perfectu, sh-itimāsit ti itsi faptu bun.

4

- ¹ Ma ti spigiur, nāintea a Dumnidzālui sh-a Hristolui Isus, tsi yini trā giudicari yiilji sh-mortsālji, tu fānirusirea a lui sh-tu amirāriljea a lui.
- ² Preadicā zborlu, insisteadzā cu chiro sh-fārā chiro, ndreadzā sh-vārgha, urnipsea sh-nveatsā cu arāvđari.
- ³ Cā va s-yinā chirolu cāndu oaminjilji nu va u aravđā nvitsātura atsea buna, ma, după capriciulu a lor, va s-adunā anvārliga a lor buluchi di nvitsātori trā gādālicari urecljili
- ⁴ sh-va li dipārteadzā urecljili di alihea shi va li-aducā cātrā pārvūliili.
- ⁵ Ma tini stāi cu minta alimtā tu itsido, aravđā munduirili, fā lucrul a evanghelistului sh-mplineadz tut huzmitipsirea a ta.
- ⁶ Iarā mini ma mi versu ca biuturā cātrā Dumnidzālu, sh-chirolu a nchisirāljei a mea agiumsi.
- ⁷ Alumta atsea buna u alumtai, u bitisii dalāgātura, sh-u vigljeai pitea.

⁸ După aestă mi ashteapti curuna a ndriptatiljei tsi Domnul, Giudicătorlu atsel ndreptu, va nji-u dă atsea dzuă, sh-nu mash a njia, ma sh-a tuts tsi ashteptu cu dor fânirusirea a lui.

⁹ Aġunjisea-ti s-yinji trăoară la mini,

¹⁰ că Dima mi apărâtsi, că vrea aestă dunjauă, sh-fudzi Săruna. Creshentul s-dusi tu Galatia, sh-Titul tu Dalmatsia.

¹¹ Cu mini easti mash Luca, ljea-lu Marculu sh-adu-lu cu tini, că nj-easti multu di ofil tu huzmitipsiri.

¹² Tichicul lu pitricui tu Efes.

¹³ Cându s-yinj, adu cu tini mantelul tsi lu alăsai tu Troadă tu Carpul, sh-cârtsili, ma multu pergamenili.

¹⁴ Alexandru, căldărarlu, nji featsi multi arăi. Domnul s-lji-u arăsplătească după faptili a lui.

¹⁵ Afirea-ti sh-tini di năsu, că ncuntră multu zboarili a noastri.

¹⁶ La apărarea a mea atsea di prota tu giudic vără nu eara cu mini, ma tuts mi apărâtsiră. Aestă s-nu si s-numiră di căbati.

¹⁷ Ma Domnul stătu ningă mini sh-nji deadi fuchii, tsi prit mini predicarea a evanghelui s-eara mplinită shi s-lu avdza tuts pânganjilji. Minî ascăpai di gura a ljiundarlui.

¹⁸ Sh-Domnul va mi ascapă di itsi lucru arău tra s-mi ducă tu amirăriljea a lui tserească. Măiri atsilui tu eta a etilor! Amin.

¹⁹ Sănătăti a Prishilăljei sh-al Acuila sh-a casiljei al Onesifor.

²⁰ Erastul armasi tu Corintu, sh-Trofimul lu alăsai niputut tu Miletu.

²¹ Aġunjisea-ti s-yinj năntea a iarnăljei. Tsă pitrec sănătăti Eubulu, Pudentu, Linu, Claudia sh-tuts fratsilji sh-surăriili.

²² Domnul s-hibă cu duhlu a tău! Harul s-hibă cu voi!

Epistola Cătră Titu

¹ Pavlul, servitorlu a Dumnidzălui sh-apostulu al Isus Hristos. Mini escu aleptu sh-pitricut s-agiută pitea a oamnjilor aleptsă a Dumnidzălui sh-elji s-cunuoască alihea tsi ti dutsi tu dumnidzăsiri.

² Atumtsea elji va aibă nădia a banăljei eternă, tsi Dumnidzălu, tsi nu arădi, u tăxi năinti di ahurhita a etilor,

³ sh-tu chirolu tsi prindi lu aspusi zborlu a lui prit predicarea tsi nji si pistipsi a njia prit ordinlu a Dumnidzălui, Ascăpătorlu a nostru.

⁴ Cătră Titi, hiljilu a meu alihios tu pitea a noastră:

Har, [njilă] sh-pace di la Dumnidzălu, Tatăl, sh-di la Domnul Isus Hristos, Ascăpătorlu a nostru!

⁵ Tră aestă ti alăsai tu Cretă, tsi tini s-ndredzi lucrili tsi au armasă ni adrați, sh-tu cathi cāsăbă s-badzi aushi cum ti ursii.

⁶ Cathiun di elji s-hibă nivărghit, bărbat a unei singur muljeari, s-aibă cilimenji pistimenji, shi s-nu hibă acuzatsi ti bană disfărnată sh-niascultată.

⁷ Că episcoplu, ca administratorlu a casăljei a Dumnidzălui, prindi s-hibă nivărghit, nu fudul, nu inătos, nu dat după yinlu, sh-nu om tsi imni după amintatic arushinos.

⁸ Ma s-hibă oaspatat, ghinivoitor, dishtiptat, ndreptu, sântu, shi nfărnat.

⁹ Elu prindi s-tsănă zborlu a pistiljei ashă cum lj-easti nvitsat, s-hibă ghini-pistipsit cu nvitsătura atsea alihioasa sh-axiu s-cândărsească atselji tsi grescu condra.

¹⁰ Că suntu multsă, sh-ma multsălji di atselji tsi suntu turnat dit pitea a uvreilor, suntu nicândărsits, zburători sh-arăditori.

¹¹ Atsilor prindi s-lă si ncljidă gura că mintească fumealji ntredzi, nvitsānda atseali tsi nu prindi, tră amintatic arushinos.

¹² Un di năshi, prufitlu Cretan, dzăsi: "Cretanjilji suntu totăna arădioshi, agrinji arăi sh-pântic-timbel!"

¹³ Aestă mărtirii easti alihioasă. Tră atsea, vărghea-lji cu aspru, tra s-hibă sânătoshi tu pisti,

¹⁴ shi s-nu ascultă părăvuliili a Iudeilor sh-dimândārili a oamnjilor, tra si s-dipărteadză di alihea.

¹⁵ Tuti suntu curati tră atselji tsi suntu curats, ma tră lăvoshlji sh-tră atselji tsi nu pistipsescu, tsiva nu easti curată. Meti, sh-mintea sh-conshtints a lor suntu lăvoasi.

¹⁶ Elji mărtirescu că lu cunosc Dumnidzălu, ma cu faptili a lor lu arnisească, că suntu agnusitsi, nicândărsitsi sh-anaxii tră itsi lucru bun.

2

Nvitsătura Atsea Sânătoasa

¹ Ma tini nveatsă a alantsălor atsea tsi easti idyea cu nvitsătura atsea sânătoasă:

² Aushilji s-hibă dishteptsă, tinjisits, froninji, sânătoshi tu pisti, tu vreari sh-tu arăvdari.

³ Tutashă, nveats-lă a moashilor s-aibă purtari cum lă ari hari a sântsălor, nu munafitsi, nu sclayii a multului yin, ma nvitsătoari a ghiniljei.

⁴ Eali s-nveatsă nveastili atseali nali s-vor bărbatsălji a lor sh-hiljilji a lor,

⁵ s-hibă fronimi, curati, acătsati cu lucrili a casăljei, buni cătră altsă, cândărsiti a bărbătsilor a lor, tsi zborlu a Dumnidzălui s-nu si s-ngiură.

⁶ Urnipsea-lji tutashă tinirlji tra s-hibă misurats.

⁷ Aspună la itsido modelul a lucrilor buni: La nvitsătură s-hits curats sh-tinjisits,

⁸ s-avets ună zburari sânătoasă sh-fără cusuri, tsi contrarlă s-rushineadză shi s-nu poată s-grească tsiva arău tră voi.

⁹ Nveats-lă sclayilji s-hibă sumbăgats a nicuchirilor a lor tu itsi lucru, s-lă hibă ghini-arăsit tu itsido, ni grăită condra.

¹⁰ Elji s-nu fură atsea tsi nu easti a lor, ma s-hibă ghini-pistipsit, tsi tu itsido s-fac arăsit nvitsătura a Dumnidzălui, Ascăpătorlu a nostru.

¹¹ Că harul ascăpător a Dumnidzălui s-fănurasi tsi s-aducă ascăparea tră tuts oamnjlji.

¹² Harul a lui nă nveatsi s-alipidăm nipistipsirea sh-orixili a lumiljei, că noi bânăm cu tăpinii, cu ndriptati sh-cu dumnidzăsiri tu aestă etă,

¹³ ashtiptănda nădia atsea ghinucuvântata sh-fănurisirea multu-mărită a marilui Dumnidză shi a Ascăpătorlui a nostru Isus Hristos.

¹⁴ Elu u deadi bana a lui tră noi, s-nă arăscumpără di itsi lucru fără di lege shi s-cură tră năsu un popul aleptu, sh-etimu tu fapți buni.

¹⁵ Nveats-lă aesti lucrī la altsă, urnipsea sh-vărghea cu cathi puteari! Vără s-nu ti dispretsuească.

3

Etimu tră Itsi Lucru Bun

¹ Adu-lă aminti atsilor tsi s-hibă sumbăgats a protsălor sh-a autoritătisilor, s-hibă cândărsits, etinji tră itsi faptă bună,

² s-nu hibă munafitsi, s-hibă pacifitsi sh-imiri, spunănda frunimeatsă cătră tutsă oamnjlji.

³ Vărăoară sh-noi earam zurlji, nicândărsitsi, arăshi, sclayilji a orixilor sh-a chehilor soi di soi, bânănda tu arăutati sh-tu zilii, aurăts sh-aurănda un-alantu.

⁴ Ma cându s-aspusi bunătatea a Dumnidzălui, a-Ascăpătorlui a nostru, sh-vrearea a lui tră oamnjlji,

⁵ elu nă ascăpă, nu cu faptili atseali ndreapti tsi noi fătsem, ma după njila a lui. Elu nă ascapă cu aspilarea a amintariljei atsea noaua sh-a rinoiriljei a Duhlui Sămtu,

⁶ tsi lu vîrsă fără mizură pristi noi, prit Isus Hristos, Ascăpătorlu a nostru.

⁷ Tră atsea noi, ndreptăsitslji cu harul a lui, s-nă fătsemu mushtinitori a banăljei eternă, tsi easti nădia a noastră.

⁸ Aestu zbor easti pistipsit. Voi tsi tini s-li aspunj cu fuchii aesti lucrī, tsi atselji tsi au pistipsită la Dumnidzălu s-aibă cășhtiga s-facă fapți buni. Aesti lucrī suntū buni sh-ufilisiti tră caitsido.

⁹ Ma tini afirea-ti di zburăril glăreshiti, di ghenealoghiili, di debatili sh-di ncăcearili tră legea, că suntū anxii sh-goali.

¹⁰ Afirea-ti di omul tsi easti ngrănjarij, după tsi s-lu ai vărghit ună oară ică doauă ori, dipărteadză-ti di elu.

¹¹ Tini știi că un ahtari om easti cicărdisit, amărtiseashti, sh-easti singur-giudicată.

¹² Căndu s-pitrec Artemul ică Tihicul, aġunġisea-ti s-yinji la mini tu Nicopoli, cā apofāsii s-trecu iarna aclo.

¹³ Cāshtigheadz-ti di cālătoria al Zena, a avucatlui, sh-al Apolon, tsi s-nu lă lipsească tsiva.

¹⁴ Shi s-nveatsă sh-a noshtri si s-da tu fapti buni trā ananghili urghenti, tsi s-nu hibă nifructoshi.

¹⁵ Tutsă atselji tsi suntu cu mini ts-pitreco sânățati. Saluteadz-lji atselji tsi nă vor noi tu pisti.

Harul s-hibă cu voi tuts.

Epistola Cătră Filemon

Salutărili

¹ Pavlu, hăpsănitlu al Isus Hristos, sh-fratili Timoteu, a vrutlui Filemon, a colucrătorlui a nostru,

² a sorâljei a noastră Apfia, shi a coluptătorlui a nostru Arhip, sh-a bisearicăljei tsi s-adună tu casa a ta:

³ Har sh-pace pri voi di la Dumnidzălu, Tatăl a nostru, sh-di la Domnul Isus Hristos!

Hăristisirea sh-Părăcălsirea

⁴ Vrute Filemon, lu hăristisescu totăna Dumnidzălu a meu, cându ti aduc amintu tu părăcălsirili a meali,

⁵ avdzânda di vrearea a ta ti tuts oamnjilji a Dumnidzălui, sh-ti pitea tsi ai tu Domnul Isus Hristos.

⁶ Mini mi părăcălsescu tsi pitea a noastră unită, s-ahânduseasca cunushtearea tu itsi buneatsă tsi easti a voastră tră Isus Hristos.

⁷ Vrearea a ta, frate, mi ari hărăsită multu sh-mi ari diznjirdată, că iniljili a sâmtsălor suntu nvărtushiti.

Ună Căftari tră Onesimul

⁸ Tră atsea, cu tută că tu Hristolu am ndreptul s-ti ursescu s-fats atsea tsi prindi,

⁹ ma multu ti părăcălsescu tu numa a vreariljei, ashă cum escu mini, Pavlu, aush, ma tora sh-hăpsănitlu al Isus Hristos,

¹⁰ ti părăcălsescu tră hiljilu a meu Onesimu, a cui mi feciu tătal suflitescu tu prănghili a meali.

¹¹ Elu ma năinti eara anaxiu tră tini, ma tora easti hăirlătîc tră tini sh-tră mini.

¹² Mini ts-u pitricui atsel năpoi; elu easti inima a mea.

¹³ Mini vream s-lu tsăneam atsel ningă mini tsi s-nji huzmitipsea tu loclu a tău tora tsî escu cu prănghi tră itia a evanghelui,

¹⁴ ma nu vream s-fătseam tsiva ni fără di tini, tsi ghineatsa tsi va s-fats s-nu hibă ca cu zori, ma cu vreami.

¹⁵ Că vahi tră aestă fu dispărtsătă di tini ti putsân chiro, tra s-hibă cu tini tră daima,

¹⁶ ma nu ma ca sclav, ma, multu ma multu di sclav, ca frati vrut, ti mini, ma, ma multu ti tini, cum tu trup ashătsi sh-tu Domnul.

¹⁷ Macă tini mi lugurseshti sots, ashteaptă-lu ca cum si earam mini.

¹⁸ Macă ts-ari faptă vără zărari ică ts-ari vără mprumut, s-li badză tu luguria a mea.

¹⁹ Mini, Pavlul, ma tsă scriu cu mânia a mea că va s-tsă plătescu mprumutlu tra s-nu dzăc că tini nj-ai mprumut sh-bana a ta.

²⁰ Ie, frate, fă-nji aestă tinjii tu Domnul! Nvărtushea-nji inima tu Hristos!

²¹ Tsă scriai că pistipsescu că va mi ascultsă, că lu shtiu că tini va s-fats ma multu dicăt ma tsă dzăc.

²² Tu idyiul chiro, etimăsea-nji un loc tră armăneari, că nădăescu că, tră hătărea a rugăciunilor a voastri, va s-vă mi durusescu năpoi.

²³ Epafrul, hăpsănitlu deadun cu mini tră itia al Isus Hristos, s-pitreatsi sănătati.

²⁴ Marcul, Aristarcul, Dema sh-Luca, colucrătorlji a melji s-tsă pitrec sănătati.

²⁵ Harul a Domnului a nostru, Isus Hristos, s-hibă cu duhlu a vostru. Amin!

Prota Epistolă al Ioan

Zborlu a Banăljei Vinit tu Trup

¹ Noi va vâ u spunem atsea tsi fu dit apărniță, atsea tsi avdzâmă, atsea tsi vidzumă cu ocljilji a noshtri, atsea tsi avem mutrită sh-avem pusputită cu mănjlji a noastră tră Zborlu a banăljei.

² cã bana s-fânirusi shi noi u vidzumă sh-mărtirsimă ti năsă, shi vâ u dimândăm a voauă, bana atsea di totăna, tsi eara cu Tatâl sh-nă si aspusi a noauă,

³ atsea tsi vidzumă shi avdzâmă, tsi sh-voi s-hitsă deadun cu noi, shi comunitatea a noastră easti cu Tatălu shi cu Hiljilu a lui, Isus Hristos.

⁴ Sh-ma vâ scriu aesti zboari tsi haraua a noastră s-hibă ntregă.

Imnarea tu Lunjină

⁵ Sh-aestu easti mesajul tsi avdzâmă di la năsu shi vâ-u spunem a voauă: Dumnidzălu easti lunjină shi la năsu nu ari dip scutidhi.

⁶ Ma s-dzătsem cã avem unitate cu Elu, shi imnâm tu scutidhi, noi arădem shi nu l-băgăm tu practică alihea.

⁷ Iară, ma s-imnâm tu lunjină, ashî cum elu easti tu lunjină, avem unitate unlu cu alantu, shi sândzâli al Isus Hristos, Hiljilu a lui, nă cură di itsi amărtii.

Mărtirsirea a Amărtiilor shi Ljirtarea a Hristolui

⁸ Ma s-dzătsem cã himă fără amărtii, arădem vetea a noastră shi alihea nu easti tu noi.

⁹ Ma s-li mărtirsim amărtiili a noastre, elu easti pistimen shi ndreptu tra s-nă ljeartă amărtiili shi s-nă cură di itsi arăutati.

¹⁰ Macă va dzătsem cã nu avem amărtisit, lu fătsem năsu arăditor, shi zborlu a lui nu easti cu noi.

2

¹ Ficiorlji a melji, vâ scriu aesti lucrî tra s-nu amărtisits, sh-ca s-hibă cã vără amărtisi, avem un avocat ningă Tatălu, Isus Hristos atsel ndreptu.

² Elu easti curbanlu tră curarea a amărtiilor a noastre, shi nu mash a noastre ma sh-tră atseali di tută lumea.

³ Di aestă shtim cã lu-avem cunuscută năsu, macă vigljem dimândărili a lui.

⁴ Atselu tsi dzătsi: "Mini lu-am cunuscută atselu," sh-nu li veagljî dimândărili a lui easti arăditor, shi alihea nu easti tu năsu.

⁵ Iară cai lu veagljî zborlu a lui, tu năsu vrearea a Dumnidzălui easti faptă perfectă. Sh-di aestă shtim cã noi him cu năsu.

⁶ Atselu tsi dzătsi cã sta cu năsu, prindi s-imnă cum ari imnată elu.

⁷ Multu-vruts, nu vâ scriu un nou ordin, ma un ordin vecljiu, tsi lu aveată di tu ahurhită, ordinlu atsel vecljiulu easti zborlu tsi avdzătă di tu ahurhită.

⁸ Cu tut atsea ma vâ scriu un ordin nou, tsi easti di alihea tu elu sh-tu voi, cã ntuneariclu ma treatsi sh-tora strălutseashti lunjina alihioasă.

⁹ Atselu tsi dzătsi cã easti tu lunjină shi aurashti fratili a lui, easti nginga tu scutidhi.

¹⁰ Atselu tsi lu va fratili a lui armăni tu lunjină shi nu ari tsiva tu năsu tsi lu fatsi s-cadă.

¹¹ Ma atselu tsi aurashti fratili a lui, easti tu scutidhi, imnă tu scutidhi sh-nu shtii câtră iu s-dutsi că scutidhlu ari urghită ocljilji a lui.

¹² Vă scriu ficiori că amârțiili vă sântu ljirtati di la numa al Hristos.

¹³ Părintsă, vă scriu că voi lu avets cunuscută atselu tsi easti di tu apărñjită. Tiniri, vă scriu că lu avets bătut arăulu.

¹⁴ Vă am scriată a voaună, ficiori că lu avets cunuscută Tatălu. Vă am scriată a voaună, părintsă, că avets cunuscută atselu di tu apărñjită. Vă am scriată a voaună tiniri că hits vârtoshi shi zborlu al Dumnidzău armăni la voi shi că lu avets bătut arăulu.

¹⁵ S-nu vrets lumea*, sh-nitsi atseali tsi sântu tu lumi. Macă vără u va lumea, vrearea a Tatălui nu easti tu năsu.

¹⁶ Că tuti atseali tsi sântu tu lumi, orixea a truplui, orixea a ocljilor sh-pirifanjea a banâllei nu yinu di la Tatălu ma di la lumea.

¹⁷ Sh-lumea treatsi cu orixea a ljei, ma atselu tsi fatsi vrearea a Dumnidzălui, armăni di totăna.

Antihristolu

¹⁸ Ficiori, easti oara dit soni. Shi cum avets avdzătă va yină antihristolu, shi tora multă antihrishtsi si fânipsiră, tră atsea noi aduchim că easti oara dit soni.

¹⁹ Namisa di noi ishiră, ma nu eara di-a noshtri. Ma s-eara di-a noshtri, va-avea armasă cu noi, ma aestă spusi că nu sântu di-a noshtri.

²⁰ Ma voi avets aundzearea di la Sântulu† shi li shtits tuti.

²¹ Nu vă scriai a voaună că nu lu cunushtets alihea, ma că voi lu cunushtets shi nitsiun arădeari nu yini di la alihea.

²² Cai easti arădioslu? Nu easti atselu tsi alipideashti că Isus easti Hristolu? Antihristolu easti atselu tsi alipideashti Tatălu shi Hiljilu.

²³ Caitsido tsi alipideashti Hiljilu, nu lu ari nitsi Tatălu. Caitsido tsi cunoashti Hiljilu, lu ari sh-Tatălu.

²⁴ Atsea tsi voi avdzătă di tu apărñjită s-armănă tu voi. Macă atsea tsi avdzătă di tu apărñjită armăni tu voi, atumtsea shi voi va armănets cu Hiljilu sh-cu Tatălu.

²⁵ Sh-aestă easti tăxirea tsi elu nă featsi: bana eternă.

²⁶ Vă scriai aesti zboari tră atselji tsi caftă s-vă arăd.

²⁷ Shi, cât tră voi, aundzearea tsi avets loată di la năsu, armăni la voi shi nu avets ananghi tsi vără s-vă nveatsă. Macă aundzearea a lui vă nveatsă di tuti shi easti alihea sh-nu easti arădeari, armănets cu năsu ashă cum vă nvitsă.

²⁸ Sh-tora, ficiori, armănets cu elu, că atumtsea cându elu va si s-fânipsească, noi s-putem s-avem sigurantsă shi cu vinearea a lui s-nu nă rushinăm.

²⁹ Macă shtits că Hristolu easti ndreptu, s-lu shtits că caitsido tsi fatsi ndriptatea s-ari amintată di la elu.

3

Hiljilji a Dumnidzălui

¹ Videts tsi vreari mari nă deadi Tatăl, tra s-nă numim hiljilji al Dumnidzău, sh-dealihea noi him. Tră aestă, lumea nu nă cunoashti noi, că nu lu ari cunuscută atsel.

* **2:15** lumea easti societata uminească fără Dumnidzăul, tsi nu cunoashti Dumnidzăul. † **2:20** aundzearea di la Sântulu doara a Duhlu Sântu dată a pistimenlui.

² Multuvruts, tora him hiljilji al Dumnidzâu, ma ninga nu si-ari aspusă tsi va him. Shtim că, cându si s-aspună elu, va him un soi cu năsu, că va l-videm cum easti elu.

³ Sh-caitsido tsi ari aestă nădii tu năsu, prindi si s-cură ashă cum elu easti curat.

⁴ Cai fatsi amărtii, fatsi sh-călcarea a legiljei, că amărtiia easti călcarea a legiljei.

⁵ Sh-voi lu shtits că elu si-fănirusi tsi s-dipărteadză amărtiili a noastre, că tu elu nu ari amărtii.

⁶ Cai armăni tu elu nu amărtiseashti, cai amărtiseashti nu lu-ari vidzută sh-nu lu-ari cunuscută.

⁷ Ficiori, vără s-nu vă arădă. Atsel tsi fatsi ndriptati easti ndreptu, ashă cum elu easti ndreptu.

⁸ Cai fatsi amărtii, easti di la draclu, că draclu amărtisi di tu ahurhită. Tră aestă s-fănirusi Hiljilu al Dumnidzâu: tră asprădzeari lucrili a dracului.

⁹ Cai s-amintă di la Dumnidzâu nu fatsi amărtii, că simintsa al Dumnidzâu armăni la năsu, shi nu poati s-băneadză amărtisănda, că s-amintă di la Dumnidzâu.

¹⁰ Di la aestă s-cunoască hiljilji al Dumnidzâu di hiljilji a dracului. Caitsido tsi nu fatsi ndriptatea, nu easti di la Dumnidzâu, ahtar nu easti nitsi atsel cai nu va fratili a lui.

¹¹ Că aestă easti dimăndăciunea tsi avdzătă di tu ahurhită: s-nă vrem cu un-alantu,

¹² nu cum fu Cainul, cai eara di la slabulu shi vătămă fratili a lui. Sh-ti tsi lu vătămă? Că faptili a lui eara uruti, iară faptili a fratilui a lui eara ndreapti.

¹³ Nu vă ciudisits, fratsi a melji, macă lumea vă aurashti.

¹⁴ Noi lu shtim că avem tricută di la moartea tu bană, că lji vrem fratsilji. Cai nu va fratili a lui, armăni tu moarti.

¹⁵ Caitsido tsi aurashti fratili a lui easti vătămător, sh-voi lu shtits că nitsiun vătămător nu ari bană di totăna armas tu năsu.

¹⁶ Di aestă lu avem cunuscut vrearea: elu deadi bana a lui tră noi, tră atsea sh-noi prindi s-dămu bana a noastră tră fratsilji.

¹⁷ Macă un ari bunili a lumiljei aishtei sh-veadi fratili a lui cai easti tu ananghi sh-u ncljidi inima a lui, cum va armănă la năsu vrearea a Dumnidzălui?

¹⁸ Ficiori, si nu vrem cu zboari, nitsi cu limbă, ma cu fapti sh-cu alihea.

¹⁹ Sh-di aestă noi shtim că him cu alihea sh-va cândărsimu ininjlji a noastre năntea a Lui.

²⁰ Că, ma s-nă condemnă inima a noastră, Dumnidzălu easti ma mari di inima a noastră sh-li shtii tuti.

²¹ Multuvruts, macă inima a noastră nu nă condemnă noi him siguri năntea a Dumnidzălui.

²² Sh-itsi căftăm, u lom di la năsu, că fătsem ordinli a lui sh-fătsem atseali tsi l-arăsescu a lui.

²³ Aestă easti ordinlu a lui tsi pistipsim tu numa a Hiljilui a lui Isus Hristos shi s-nă vrem cu un-alantu cum nă ordină elu.

²⁴ Atsel tsi veaglji ordinili a lui, armăni tu Dumnidzălu, sh-elu tu năsu. Di aestă noi shtim că elu armăni cu noi: di Duhlu tsi elu nă deadi.

¹ Multuvruts, nu pistipsits pri itsi duh, ma băgats-lă tu provă duhurili, să shtits măcă sântu di la Dumnidzâul, că multsă profits arădioshi au ishită tu dunjauă.

² Di aestă putets s-cunoshtets Duhlu al Dumnidzâul: itsi duh tsi märtirseashti că Isus Hristos ari vinit tu trup, easti di la Dumnidzâul.

³ Shi itsi duh tsi nu märtirseashti că Isus Hristos ari vinit tu trup, nu easti di la Dumnidzâul. Aestă easti duhlu a antihristolui tsi cum avets avdzătă va yină, shi tora easti tu lumi.

⁴ Voi hits di la Dumnidzâul, ficiori, shi lji avets bătută atselji, că Duhlu a Dumnidzâului cai easti tu voi, easti ma mari di atselu tsi easti tu lume.

⁵ Atselji sântu di lumi, tr-atsea grescu di lucrili a lumiljei sh-lumea lji-ascultă.

⁶ Noi him di la Dumnidzâul, cai cunoashti Dumnidzâlu nă asculti, cai nu easti di Dumnidzâul, nu nă asculti, dit aestă cunoshtem Duhlu a alihiljei shi duhlu a arădearijei.

Vrearea al Dumnidzâu shi Vrearea di Fratsilji

⁷ Multuvruts, s-lu vrem un-alantu, că vrearea easti di la Dumnidzâul shi caitsido tsi va, easti amintat di la Dumnidzâul sh-cunoashti Dumnidzâlu.

⁸ Atselu tsi nu ari vreari nu lu ari cunoscută Dumnidzâlu, că Dumnidzâlu easti vreari.

⁹ Tu aestă si fānipsi vrearea a Dumnidzâului ti noi, că Dumnidzâlu pitricu Hiljilu a lui atsel unlu-amintat tu lumi, tsi noi s-bānām pri nāsu.

¹⁰ Tu aestă easti vrearea: nu că noi lu avem vrută Dumnidzâlu, ma elu nă ari vrută noi, shi pitricu Hiljilu a lui tsi s-li ljeartă amārtiili a noastri.

¹¹ Multuvruts, macă Dumnidzâul nă vru ashātsi, shi noi prindi s-vrem un-alantu.

¹² Nitsiun nu l-vidzu vārōarā Dumnidzâlu, macă nă vrem unu cu alantu, Dumnidzâlu armāni tu noi sh-vrearea a lui easti perfectă la noi.

¹³ Di aestă noi cunoshtem că armānem tu nāsu sh-elu tu noi, că elu nă ari dată di Duhlu a lui.

¹⁴ Shi noi vidzum shi märtirsim că Tatālu lu pitricu Hiljilu tsi s-hiibă Ascăpātor a lumiljei.

¹⁵ Atselu tsi märtirseashti că Isusul easti Hiljilu a Dumnidzâului, Dumnidzâlu sta tu nāsu sh-elu tu Dumnidzâlu.

¹⁶ Sh-noi cunoscum sh-pistipsim tu vrearea tsi Dumnidzâlu ari trā noi. Dumnidzâlu easti vreari, shi atselu tsi armāni tu vreari, armāni tu Dumnidzâlu sh-Dumnidzâlu tu nāsu.

¹⁷ Tu aestă vrearea easti perfectă tu noi, tsi s-avem curaiu trā dzua a giudicarāljei: că cum easti elu, ashā him sh-noi tu aestă lume.

¹⁸ Atselu tsi vrea, nu ari frică, shi vrearea perfectă aguneashti frica, că frica ari cu nāsă cātādzicāsirea, shi atselu tsi ari frică nu easti perfectă tu vreari.

¹⁹ Noi lu vrem atselu, că elu nă vru protlu.

²⁰ Ma s-dzācā vārā: "Mini lu voi Dumnidzâlu" shi aurashti fratili a lui, easti arāditor. Elu tsi nu va fratili a lui tsi lu veadi, cum poati s-aibă vreari trā Dumnidzâlu tsi nu lu-veadi?

²¹ Sh-aestă easti ordinlu tsi avem loatā di la elu: atselu tsi va Dumnidzâlu, s-aibă vreari sh-trā fratili a lui.

¹ Caitsido tsi pistipseashti că Isusul easti Hristolu, easti amintat di la Dumnidzălu, shi caitsido tsi va Dumnidzălu tsi lu ari amintat, va sh-atsele tsi easti amintat di la năsu.

² Di aestă noi shtim că vrem hiljilji a Dumnidzălui, cându vrem Dumnidzălu shi vigljem dimândărili a lui.

³ Că aestă easti vrearea a Dumnidzălui: tsi noi s-vigljem dimândărili a lui, că dimândărili a lui nu suntu greali.

⁴ Că tuti tsi suntu amintat di la Dumnidzălu anichisească pristi lumea, sh-nichisirea pristi lumea easti pitea a noastră.

⁵ Cai easti atsel tsi nichiseashti pristi lumea, mash atsel tsi pistipseashti că Isusul easti Hiljilu al Dumnidzău?

Mărtiria al Dumnidzău ti Hiljilji a lui

⁶ Isus Hristos easti atsel tsi vini prit apă ti pătîdzari sh-prit sândzili a moartăljei a lui, nu mash cu apă, mă cu apă sh-cu sândzi. Sh-Duhlu easti atsel tsi mărtirseashti, că Duhlu easti alihea.

⁷ Că trei suntu atselji tsi da mărtirii tu tser: [Tatili, Zborlu sh-Duhlu Sămtu, sh-aeshti trelji suntu un.

⁸ Shi trei suntu atselji tsi mărtirescu pri loc]*: Duhlu, apa shi sândzili, sh-aeshti trelji suntu pi un minti.

⁹ Macă noi apruchem mărtiria a oamnjilor, mărtiria al Dumnidzău easti ma mari, că aestă easti mărtiria a Dumnidzălui tsi elu deadi tră Hiljilu a lui.

¹⁰ Atsel tsi pistipseashti tu Hiljilu al Dumnidzău ari aestă mărtirii pri năsu. Atsel tsi nu pistipseashti la Dumnidzălu, lu ari faptă arădios, că nu pistipsi la mărtiria tsi Dumnidzălu deadi ti Hiljilu a lui.

¹¹ Sh-mărtiria easti aestă, Dumnidzălu nă deadi bana eternă sh-aestă bană easti tu Hiljilu a lui.

¹² Macă vără veadi fratili a lui că fatsi ună amărtii tsi nu dutsi tu moarti, ari bana.

¹³ Vă scriai aesti a voaû [tsi pistipsits tu numa a Hiljilu a Dumnidzălui]†, tsi s-shtits că avets bana eternă shi s-pistipsits tu numa a Hiljilu a Dumnidzălui.

Putearea a Părăcălsiriljei

¹⁴ Aestă easti siguranța tsi avem năintea a lui: ma căftăm tsiva după vrearea a lui, elu nă-u da.

¹⁵ Shi macă shtim că elu nă-li avdi tuti atseali tsi căftăm, noi shtim că li avem atseali tsi lji căftăm a lui.

¹⁶ Macă vără veadi fratili a lui că fatsi ună amărtii tsi nu dutsi tu moarti, s-părăcălsească a Domnului, sh-elu va lji da bana, atsilor tsi fac amărtii tsi nu duc tu moarti. Ari amărtii tsi duc tu moarti, nu dzăc tsi elu s-părăcălsească tră aestă.

¹⁷ Itsi nindriptati easti amărtii, ma ari amărtii tsi nu dutsi tu moarti.

¹⁸ Noi shtim că caitsido tsi easti amintat di la Dumnidzălu nu poati s-băneadz amărtisănda că atsel tsi easti amintat di la Dumnidzălu s-veaglji, shi Slabulu nu lu pligueshti.

¹⁹ Noi shtim că him di la Dumnidzălu shi că ntreagă lumea s-află sum putearea a Slabului.

²⁰ Noi shtim că Hiljilu al Dumnidzău vini shi nă deadi aduchirea tsi noi s-cunushtem atsel tsi easti Alihioslu, shi noi him tu Alihioslu, tu Hiljilu a lui Isus Hristos. Aestu easti alihioslu Dumnidză sh-bana eternă.

* 5:8 aesti zboari nu s-află tu manuscrisili atseli veclji † 5:13 aesti zboari nu s-află tu manuscrisili atseli veclji

²¹ Ficiori, afirits-vã di idulji.

A Doaua Epistolă al Ioan

Salutărili

¹ Mini vechljilu, a doamnăljei* aleaptă shi a hiljilor a ljei tsi lă voi tu alihea, shi nu mash mini, ma shi tutsă atselji tsi au cunuscută alihea,

² ti itia a alihiljei, tsi sta cu noi shi va s-hibă cu noi di tut eta:

³ harul, njila shi pacea s-hibă cu voi di la Dumnidzăul Tatălu shi di la Dumnulu Isus Hristos, Hiljilu a Tatălui, tu alihea sh-tu vreari.

⁴ Mi hărăsii multu că aflai născăntsi di hiljilji a tălji imnănda tu alihea, după ordinlu tsi loară di la Tatălu.

⁵ Sh-tora ti părăcălsescu, Doamnă, tsi s-lu vrem un-alantu, nu ca cum să scriu un ordin nou, ma atsea tsi aveam avută dit apărniță.

⁶ Shi aestă easti vrearea, s-imnăm după ordinli a lui. Cum u avădzătă dit apărniță, aestă easti ordinlu tsi lom tsi s-imnăm tu năsu.

⁷ Mini vā dzăc că tu lumi au inshită multsă arăditori, cai nu martirescu că Isus Hristos ari vinit tu trup. Aestu om easti arăditorlu shi antihristolu.

⁸ Băgats mintea si nu chirdets frutlu a lucrilor tsi avem faptă, ma s-loatsă ună mushtinari mplină.

⁹ Caitsido tsi s-dutsi nclo shi nu armăni tu nvitsătura a Hristolui, nu ari Dumnidză. Cai armăni tu nvitsătura a Hristolui, ari Tatălu shi Hiljilu.

¹⁰ Macă vără yini la voi sh-nu adutsi aestă nvitsătură, nu lu apruchiats la casă shi nu lu salutats.

¹¹ Că atselu tsi lji dzătsi "Ghini vinjish", s-fatsi parti tu faptili a lui atseali arăli.

¹² Cu tuti că aveam multi lucruri ti scriari, nu vream su fătseam cu carti sh-cu buiauă, ma nădăescu s-yin la voi shi s-vă grescu cu gura, tsi haraua a noastră s-hibă ntreagă.

¹³ Hiljilji a sorăljei a ta aleaptă ti saluteadză. Amen.

* 1:1 mults oamini minduescu că "doamna" easti ca un metaforă di bisearica.

A Treia Epistolă al Ioan

Salutările

¹ Mini vecliulu, a Gailu multuvrut, tsi lu voi dealihea.

² Multuvrute, mini voi s-ai ambăreatsă la tuti, shi s-hărăseshtă sânățati bună, ashî cum ari ambăreatsă suflitlu a tău.

³ Că mi hărăsii cându viniră niscăntsă fratsi sh-mărtirsiră ti pistipsirea a ta tră alihea, că cum imnji tini tu alihea.

⁴ Nu am ma mari harauă di aestă: s-avdu că hiljilji a melji imnă tu alihea.

⁵ Multuvrute, tini fats cu pistipsiri itsido tsi fats tră fratsilji shi tră xenjilji.

⁶ Elji mărtirsiră ti vrearea a ta năinti a bisearcâljei, shi va s-fatsă ghini s-ai căshtigă ti călătoria a lor cu tinjii di Dumnidzălu.

⁷ Că elji inshiră tră numa a lui, fără s-ljea tsiva di la pângânji.

⁸ Noi u avem obligatsie, s-li ashtiptăm aeshti oaminj, tsi s-himă prilucrător tră alihea.

Diotreful shi Dhimitrul

⁹ Lji scriai a bisearcâljei, ma Diotreful, tsi va s-hiibă protlu tră elji nu nă ashteapti.

¹⁰ Tr-atsea, ma s-yinu, va lji-aduc aminti a lui faptili tsi adari, zburânda zboari arăi contra noi. Cum s-nu agiungu aesti, elu nu li ashteapti fratsilji shi li ntheadică atselji tsi vor s-li ashteaptă shi li scoati di bisearică.

¹¹ Multuvrute, nu urmeadză arăulu, ma bunulu. Atselu tsi fatsi bunulu easti di la Dumnidzăul, ma atselu tsi fatsi arăulu nu lu ari vidzută Dumnidzălu.

¹² Di Dhimitrul tutsă da mărtirii bună, tutashă shi alihea: shi noi mărtirsimu ti năsu, sh-tini lu shtii că mărtiria a noastră easti alihinoasă.

¹³ Aveam multi tră scriari, ma nu voi s-tsă scriu cu buiaua shi-peană.

¹⁴ Ma nădăescu s-ti ved curundă shi si zburăm di aproapi.

¹⁵ Pacea cu tini! Oaspilji tsă pitrec sânățati. Dă sânățati a oaspilor un pi ună.

Epistola al Iuda

Salutări

¹ Iuda sclavul al Isus Hristos shi fratili al Iacov, a acljimatsilor tsi sântu vruts di la Tatâl Dumnidzâu sh-vigljeatâ di Isus Hristos.

² Njila, pacea shi vrearea si s-avdagâ la voi.

Amârtili shi Bana fără Dumnidzâ

³ Multuvruts, aveam unâ vreami marâ s-vâ scriu ti ascâparea a noastră comună, avui ananghi s-vâ scriu a voauâ shi s-vâ ursedzâ s-alumtats ti pista tsi eara datâ a sâmtsâlor un oară sh-ti totâna.

⁴ Că intrară ascumtu namisa di voi niscântsâ oaminji tsi eara arâdhâpsits di cu chiro ti aestâ condamnă, nipistipsits, tsi u toarnâ harul a Dumnidzâlui a nostru tu desfrânari sh-aleapid singurlu Mastru, sh-Domnul-a nostru Isus Hristos.

⁵ Ma voi s-vâ aduc aminti, cu tutâ că tora li shtits tuti aesti, tsi Domnul, după tsi u ascâpă populu a lui di loclu-a Eghiptului, deapoea lji dârâmâ atselji tsi nu pistipsirâ.

⁶ Anghilji, tsi nu l-tsânurâ pozitsili a lor di ma năinti, ma li alâsarâ locurili a lor iu băna, elu lji apârâ tu scutidhi, ligats cu prânghi eternâ ti giudicata a Dzuâllei atsiljei mari.

⁷ Ashi cum Sodoma sh-Gomora shi cāsâbadzli avârliga s-deadirâ după putâlichili shi innarâ după desfrânârii sexuali. Aesti s-featsirâ exemplu trâ atselji tsi pâtsârâ pidipsirea a foclui ti totâna.

⁸ Tut ashâ sh-aeshtsâ yisânda lăvushescu truplu, arnisească putearea a Dumnidzâlui sh-blastimâ creaturili tsereshti.

⁹ Ma arhanghelul Mihaili cându si ncăcea cu draclu zbura trâ truplu a Moisiului sh-nu cutidzâ s-dzătsea un zbor ti ngiurari ma dzâsi: "Domnul s-ti vârghească!"

¹⁰ Ma aeshtsâ grească arâu ti tuti lucrili tsi nu cunoscû di la natura, ca prâvdzili fără minti, tsi facâ arâu ti vetea a lor.

¹¹ Cavaî di nâshi! Că au loatâ calea a Cainlui, sh-trâ amintatic s-arcarâ după câbâtli a Balaamlui, sh-chirurâ tu cundrira a Coreul.

¹² Aeshtsâ sântu lăvushituri la sârbâtoarili a voastri di vrearea frătsească, cându măcă sh-bea deadun cu voi fără rushâni, pâshtânda vetea a lor. Atselji sântu niori fără apă, pîmtu nclo shi nculea di vimturi, ponji di toamna fără fruti, disrâdâtsinati sh-di doauâ ori mortsi.

¹³ Atselji sântu vâluri turbati a amariljei tsi spumeadzâ arushânili a lor, steali dispârtsâti di la cai easti rezervat scutidhlu ti totâna.

¹⁴ Shi trâ aeshtsâ prufitipsi shi Enocul, al shaptili după Adam, dzăcânda: "Ia, ma yini Domnulu cu njiljilji a lui sâmtsâ,

¹⁵ ti fătseari giudicarea contra a tutulor shi ti cândârsiri tuts nipistimenjilji namisa di nâshi trâ tuti faptili a lor arâli shi trâ tuti zboarili a lor arushinoasi, tsi amârtioshilji fără pisti grească contra a lui."

¹⁶ Aeshtsâ sântu murmurători tsi plângâ ti itsido tsi imnâ după orixea a lor shi gura a lor greashti zboari alâvdati shi culăchipsească oaminji trâ amintatic.

¹⁷ Ma voi, multuvruts, adutsets-vă aminti zboarili tsi vă au dzăsă apostoljilji a Domnului a nostru Isus Hristos.

¹⁸ Elji vă dzătsea tsi tu chirolu di ma napoi va s-aibă pizuitorii tsi va simnă după orixile a lor anapudzi.

¹⁹ Aeshtsă sântu atselji tsi fac dispărtsări, oaminji amărtioshi, tsi nu au Duhlu.

²⁰ Ma voi, multuvruts, adrânda bana pri pitea a voastră multu-sămtă, pârăcâlsânda tu Duhlu Sămtu,

²¹ afrits-vă tu vrearea al Dumnidzău, ashtiptânda njila a Domnului a nostru Isus Hristos tsi adutsi bana eternă.

²² Shi avets njilă di omlu tsi easti turbulat.

²³ Shi ascăpats-lă alantsălji trăgânda di focu, shi avets njilă la alantsi deadun cu frică, aurânda stranjilu pangănit di carnea.

Alăvdari

²⁴ Ma atsilui tsi poati s-vă veaglji di cathi cădeari shi s-vă scoată năinti a măririļei a lui ni-lăvushit shi cu harauă,

²⁵ a singurlui Dumnidză, a Ascăpătorlui a nostru, s-lji hibă măriri, multumăriri, pufeari shi autoritati, tora shi tu eta a etilor. Amen.